

PARADOXES² DE LA PESTE,

OV

IL EST MONSTRÉ CLAIREMENT
comme on peut viure & demeurer dans
les villes infectées, sans crainte
de la contagion.

*Traduits en François de l'Italien de SYLVESTRE
FACIO, par B. BARRALIS, Docteur-Regent
en la Faculté de Medecine de Paris.*




A PARIS,

Par FLEURY BOVRIQVANT, aux
Fleurs Royales.

M. DC. XX.

AVEC PRIVILEGE DV ROY.



MONSIEUR HENRI
 CHANCELIER
 de l'Université de Paris
 Conseil d'Etat & premier Aides
 du Roy

Ordonnance



Le bruit de la maladie d'un
 passe estant si fort est
 en fait que deserte, on a
 dans la commune apprehen
 de verser, & de voir si
 grande sur les d'elles
 lre avoir de l'ordonne
 contene en l'ordonne
 ur des faulx de l'ordonne
 re son insinuation de la
 les apprehensions de
 fests de mon d'ice se



A

MONSIEVR HEROVARDE
CHEVALIER, SEIGNEUR
de Vaugrigneuse Conseiller au
Conseil d'Estat, & premier Medec-
cin du Roy.



MONSIEVR,

*Le bruit de la maladie qui l'annee
passee estõna si fort ceste ville, qu'el-
le en fut presque deserte, m'ayant d'abord enuelopé
dans la commune apprehension, me permit par apres
de respirer, & de rechercher soigneusement si la
crainte qui suit d'ordinaire la renommée de ce mon-
stre auoit des fondemens veritables: mais ayant re-
cognu que ce n'est qu'une opinion tyrannique, fondée
sur des fausses apparences, ie me resolus de combat-
tre son iniustice, afin de guerir le monde de la vanité
de ses apprehensions: & comme ie meditois les ef-
fects de mon desir, ie rencontray vn auteur Italien*

qui autresfois pouſſé d'une pareille inclination, auoit dignement travaillé ſur ceſte matiere, l'ayant enrichie de ſi belles raiſons, de ſi fortes authorités & d'experiences ſi ſenſibles, que j'eſtimay deſlors qu'on ne pouuoit rien adiouſter à la perfection d'un tel ouvrage: c'eſt pourquoy ie delibéray de le rédre François, tant pour ne le priuér point de l'honneur que ſon extreme ſuffiſance mérite, que d'autant que ie ne croyois pas de pouuoir plus facilement remedier à ceſte maladie ſpirituelle que par les meſmes remedes qu'il auoit ſi doctement recherché; ce qu'ayant fait, & deſirant de l'expoſer à la veüe du monde, deux principales conſiderations m'ont obligé à vous le dedier: l'une parce qu'eſtant de meſme profeſſion que l'auteur, vous pourrés inger plus equitablement de ſon mérite: l'autre pour la recognoiſſance, dont ie m'eſtime redevable avec tous ceux de noſtre ordre, à ceſte rare doctrine & longue experience, qui appuyées ſur une probité naturelle vous rendent digne de l'honneur que vous poſſédez, veillant avec une admirable fidelité pour le ſalut de noſtre Juſte Monarque; fidelité qui va forçant la conſcience meſme de vos ennemis à vous rendre ce glorieux teſmoignage, que vous n'eſtes point comme le Medecin de Pyrrhus, mais comme celuy d'Alexandre, qu'on peut calomnier fauſſement, mais qu'on ne ſçauroit conuaincre véritablement. Que ſi les fables nous representent un Argus, dont le chef eſt tout

parsemé d'yeux, pour monst^rer le soin qu'on doit
apporter à la conseruation des choses grandes, la ve-
rité vous faiçt paroistre sur son theatre orné de mil-
le belles vertus, qui sont autant d'yeux, dont les re-
gards ne se destournent iamais de la personne de no-
stre grand Prince; & qui, comme des astres salutai-
res, par la bonté de leur influence, en estoignent les
maladies, à la violence desquelles la ieunesse est or-
dinairement exposée: C'est pourquoy sa Maiesté vous
cherit à l'esgal des personnes qui luy sont les plus
cheres, & vous honore avec des respects dignes de
vos vertus & de vostre vieillesse venerable, Voyãt
que vostre soin est sans pompe & sans vanité, &
qu'il procede d'une affection purement cordiale, &
de la cognoissance de vostre deuoir: Et certes parmi
tant de faueurs, dont le Ciel la benit cõtinuellement,
celle-là paroist des plus grandes, de luy auoir donné
vn depositaire de sa vie, dont la suffisance & la fi-
delité sont esgalement recommandables: qualitez si
einentes en vous, que l'enuie ne les osant attaquer,
est contraincte de demeurer chez soy, pour deuorer
ses propres entrailles. Ce sont les deux causes qui
m'ont obligé à vous offrir ceste traduction necessai-
re, à mon aduis, pour chasser ces terreurs paniques,
qui banissant toute charité du cœur des François leur
font cruellement abandonner ceux mesmes qui leur
sont plus estroittement aliez, estimant mon dessein
favorablement reconnu, si vous me faiçtes l'honneur

de l'auoir agreable, & de me permettre qu'en toutes occasions ie recherche les moyens de vous seruir & de vous tesmoigner que ie suis, & demeureray toute ma vie,

MONSIEVR,

Vostre tres-humble & tres-
affectionné seruiteur,

BARRALIS.

AV LECTEUR.

I'Auois presque resolu, Lecteur, de ne te communiquer point ceste traduction, car bien qu'elle me semblast necessaire pour combattre vne opinion, qui releue nostre cruauté par dessus celle des barbares, i'apprehendois neantmoins quelques esprits de ce siecle, qui iugeant indiscrettement de tout, veulent persuader au monde qu'ils sont les plus habiles par le mespris qu'ils font des autres, & de leur labour; mais en fin ie me suis laissé emporter à la passion que i'ay de profiter au public, estimant que l'ignorance & la malice sont des instrumens trop foibles pour empescher l'execution d'vn honorable dessein. Je te la donne doncques avec ceste protestation, que si la beauté & la necessité de l'œuure ne m'eussent forcé de le faire, ie ne l'eusse iamais entrepris, parce que la langue Italienne est si commune, que ie ne m'en estime pas plus habile pour en auoir quelque intelligence. Au reste tu verras vn autheur doüé d'vn sens commun excellent (piece qui est fort rare) & d'vne profonde cognoissance, qui l'ont fait entrer dans vnelice, où personne du monde n'auoit

encores osé courir, monstrant que la contagion n'est pas si aisée comme on la croit ordinairement, & que la peste ne peut estre portée d'un lieu à un autre par des hardes infectées, ce qu'il faict par la raison, l'autorité & l'expérience, machines si puissantes qu'elles portent par terre la commune opinion, & font iour à la verité de la sienne; ie m'asseure que tu l'aduouèras si tu prens la peine de le bien gouster, & que tu ne luy denieras point la gloire qu'il a meritee. Pour moy i'ay tasché d'expliquer ce qu'il a voulu dire, sans m'obliger trop curieusement à sa phrase, car aussi bien nostre langue marche d'une cadance plus mesurée, & ne scauroit endurer les redites des Italiens, ny leurs frequentes Perissologies: quoy que ie l'aye suiuy en quelques endroits contre ma volonté, en ayant precipité l'impression pour preuenir ces fausses alarmes qu'on nous veut donner, & pour t'asseurer à l'encontre d'un ennemy, qui est plus redoutable en apparence qu'en effect. Adieu.



PREMIERE IOVRNE'E.

M.  V' allez-vous Monsieur FACIO?
F. Monsieur ie m'en vais voir les
malheurs & infortunes des hom-
mes.

M. C'est bien dict, car on ne sçauroit
voir en ce monde vn plus grand
malheur que celuy de la maladie, comme au con-
traire vn plus grand bien que celuy de la santé.

F. Veritablement la santé est vn don tres-grand, &
presque preferable à tous les autres que nous pou-
uons receuoir du Ciel en ce mōde: parce que met-
tant à part la vertu, par le moyen de laquelle il
semble que les hommes se fassent Dieux: tous les
autres dons sont inferieurs à la santé, car avec sa
perte nous perdons la richesse, la beauté, & tous
les autres contentemens.

M. Il me semble que nous perdōs aussi la vertu qui
consiste en l'action; car si ce que i'ay ouï dire, &
que i'experimente, touchant l'ame, est veritable,
qu'elle ne peut agir sans le corps; quelle vertu
peut-on pratiquer quand le corps est attaqué de
maladie?

F. Nulle veritablement, sinon avec grande difficulté; & partant on peut dire que la vertu estant la santé de l'ame, est beaucoup plus precieuse que la santé du corps, encore que la vertu soit inferieure à la santé: en ce que ceste-cy peut produire ses effectz sans celle-là; mais sans la faueur de la santé, la vertu ne se sçauroit exercer: d'où viēt l'opinion de ceux qui ont mis le souuerain bien de la terre en la possession de la santé.

M. Ie me range à leur opinion, qui a esté de tout temps vraye, & en cestuy-cy est tres-veritable; parce que parmy tant de personnes qui deuiennent malades, & qui meurent, celuy paroist heureux qui demeure en santé: Et d'autant plus que le malheur d'estre malade en ceste saison, en porte avec soy tant d'autres, comme d'estre delaisié de ses amis & parens, quoy que tres-estroitement alliez: & sur tous celuy d'estre abandonné des Medecins aux traiçts de la mort, que i'estime beaucoup moins le mourir, & par vne seule mort trancher le fil d'vne infinité d'autres.

F. Veritablement Monsieur, vous auez raison de parler ainsi, & ce qui accroist l'estonnement, c'est la nouveauté de ce mal: veu que depuis cinquante & vn an ceste Republique n'a point resenty vne pareille disgrace, en façon qu'en cest âge il semble du tout nouveau & incogneu.

M. Dieu vueille faire pardon à celuy qui a enuoyé ou porté vne si grande ruyne à nos maisons, ie ne crois point qu'en Enfer on puisse trouuer vn tourment qui respōde à vn excez si horrible & si cruel que celuy d'auoir desia faiçt mourir miserablement plus de trente mille personnes; & semble à la ve-

rité fort estrange, que Dieu, lequel gouuerne avec tant de sagesse tout le monde, permette qu'il soit en la puissance d'un malheureux scelerat de ruyner si aisément vne ville, vn Royaume, & par consequent tout le monde, comme en portant vn sac, ou vne valise de hardes infectées.

F. Ce seroit veritablement vne chose fort estrange, & partant il ne faut pas penser que Dieu le permette.

M. On voit neantmoins qu'il le permet: & ceste cause est du nombre de celles qui semblent extrauagantes & incroyables, & toutesfois elles sont en effect, sans qu'on sçache pourquoy Dieu les souffre.

F. Il peut estre qu'il les souffre, mais i'ay de la peine à l'entendre.

M. Comment, vous auez de la peine? Et ne sçauiez vous pas que ce malheur ie ne sçay comment a esté porté de Lombardie à Pontedecimo; & toutesfois quoy que ce lieu ne soit esloigné que de dix mille, le soing & l'industrie humaine a esté inutile à empescher que les hardes infectées n'entraissent dans la ville, par la seule contagion desquelles tant de milliers de personnes ont miserablement perdu la vie. Mais à quel propos me trauaillé-ie à vous faire cognoistre cecy, que sinon pour autre chose, au moins à cause de vostre profession vous deuez mieux sçauoir que moy?

F. Ie veux croire pour l'amour de vous vne partie de ce que vous dittes: & confesse d'auoir ouï de plusieurs autres ce que vous me venez de dire touchant ces hardes.

M. Comment de plusieurs autres? Mais plustost

4
de tous, & mesmes des Medecins.

F. En cecy, comme en toute autre chose ie cognois la foiblesse de mon esprit, qui ne me permet point de voir ce que plusieurs autres voyent.

M. Vous-vous moquez, ie sçay fort bien que vous entendez toutes choses, quoy que difficiles; tant s'en faut que vous ignoriez vne chose si commune.

F. Vous estes si gentil & courtois Cavalier, qu'il ne faut point s'estonner si vous parlez si aduantageusement de moy: mais tenez pour assurez qu'il y a peu de choses au monde que nous puissions bien comprendre, non tant pour la difficulté dans laquelle la verité est quasi tousiours enuelopée comme pour la foiblesse naturelle de l'entendement humain: Et entre les autres choses, celle-cy que i'entends dire, que la peste ait esté portée de Lombardie, me semble si estrange, que ie ne la puis conceuoir; mais au contraire, plus la peste s'auance, plus ie me retire de l'opinion commune, qui ne me semble pas seulement mal-aisée, mais impossible.

M. Quelle est donc vostre opinion?

F. Que Dieu nous a enuoyé ce chastiment par le moyen de l'air empesté.

M. Vous dictes merueilles; nous serions bien miserables si l'air estoit infecté, ie crois que vous estes seul de ceste opinion; mais si cela ne vous incommode point, arrestons-nous vn peu à la fraischeur, afin que ie puisse sçauoir particulièrement ce que vous en croyez.

F. Tres-volontiers Monsieur; mais si ie ne me trompe, il me semble que Monsieur Ratto vient

vers nous, ie ne sçay où il va.

M. Oüy, c'est luy; il va peut-estre luy-mesme encores visiter quelques malades, iamais personne ne vint plus à propos, parce que ie sçay qu'il est d'opinion contraire à la vostre.

F. Ie me souuiens de l'auoit ainsi oüy dire à luy-mesme; & à la verité il ne pouuoit arriuer personne qui me fust plus agreable, ny de laquelle ie receusse plus de contentement à l'oüy parler de ceste matiere.

M. Vous soyez le bien venu Monsieur, faiçtes-nous ce plaisir de vous arrester vn peu, à tout hazard il est encore de bonne heure, vous ne manquerez pas de temps pour visiter vos malades.

R. Qui ne s'arresteroit en vn lieu si gracieux, & en compagnie si gentille & honorable?

I. Monsieur Ratto est si courtois, que nous pouuons esperer de luy tout ce que nous voudrons.

R. Ie vous remercie Monsieur Facio, ie ne m'estonne point si vous parlez ainsi de moy, car il y a long temps que ie sçay combien de vostre grace vous m'aymez.

F. Ie confesse de vous aymer beaucoup, mais le tout parce que vous estes grandement aymable.

M. Messieurs laissez, ie vous prie, à part ces belles parolles, & discourez, s'il vous plaist, de la cause qui á estouffé, & va tous les iours estouffant ce miserable peuple, veu que M^r Facio effant icy arriué par hazard de la mesme façõ que vous M^r Ratto: & passant d'vn discours à vn autre, il m'a dit qu'il ne croyoit pas que la peste affligeast ceste ville, à cause de quelques hardes infectées qu'on y a apporté de Lombardie, & dit mesmes qu'il est impos-

sible; & me semble d'auoir ouy dire que vous estes de contraire aduis avec tous les autres Medecins, aduis qui est confirmé par l'opinion de tous qui disent en Prouerbe, que qui ne touche n'est point compere, croyant qu'il est impossible de prendre la peste si l'on ne touche quelque chose infectée: & cecy me semble de pareille importance que la vie des hommes, & partant il merite qu'on n'espargne aucun soing pour en descouuir la verité, si toutesfois on le peut faire.

R. Le desir qu'on voit en vous Monsieur, est iustement digne d'un esprit noble & genereux, comme le vostre, outre la pieté que vous monstrez en cecy à l'endroit de vostre patrie, parce que difficilement peut-on donner remede à vn mal incogneu; & ne nieray point que ie suis de l'opinion que vous dites, en ce qui touche la cause de cette peste: mais vous me prenez tant à l'impourueu, que ie ne vois point le moyen d'y satisfaire, parlant d'une matiere si difficile que celle de la peste, laquelle produict des effects si estranges & si terribles qu'elle fait perdre la Tramontane, non seulement aux autres, mais aux Medecins mesmes. Il est bien vray que Monsieur Facio vous peut donner toute satisfaction, & partant ie me cognois entierement inutile, & superflu comme celuy qui desire d'escouter, & m'offre de changer promptement d'opinion, quand on fera paroistre des raisons plus fortes & meilleures que les miennes.

F. La modestie avec laquelle vous assaisonnez toutes vos actions, vous fait parler en ceste sorte, bien que ie me range à vostre opinion touchant la difficulté de ceste matiere, en laquelle ie desi-

rerois plustost escouter que parler, parce qu'il me semble que nous pouuõs dire en toute autre chose, avec honneur, que nous y sçauons peu, mais en celle-cy de la peste, que nous n'y entendons rien: des autres maladies on en peut discourir avec quelque fondement, mais ie ne sçay avec lequel nous pouuons parler de la peste, tant elle est cachée à nostre entendement, & si grãde est la tromperie, & la mocquerie, eu esgard à la cognoissance & aux remedes.

M. D'autre costé si les choses qui sont plus importantes aux hommes doiuent estre cogneuës, sans espargner aucun soin ny trauail, ie n'en vois point qui le merite d'auantage que la peste, n'y ayant aucune misere qui luy puisse estre égalee, & le seul nom de laquelle nous remplit de frayeur.

R. La famine & la guerre semblent à quelques-vns plus cruelles & espouuantables.

M. Ie ne sçay pour quelle raison, car sans doute la guerre est vne moindre misere, car elle n'a point pour sa fin la mort, mais l'empire des hommes. La famine pour l'ordinaire n'arriue point de la priuation des alimens: car en ce cas la mort de tous seroit inéuitable, malheur surpassant de beaucoup toute autre infortune, ains elle prouient le plus souuent de ce que les alimens n'abondent point, & partant ils sont chers & de grand prix, & rarement vient-on en si grande disette qu'on en meure de faim, outre qu'en la cherté qui a dequoy manger est pour le moins asseuré de ne mourir point de faim, laquelle assurance personne ne sçauroit auoir en la peste. D'auantage la cherté est beaucoup plus dangereuse, à cause de la peste, dõt

elle nous menace que pour sa propre consideration. Mais la peste, comme nous auons dit, surpasse toute misere, comme celle qui n'a pas seulement pour sa fin les biens, qu'elle gaste neantmoins merueilleusement, mais la perte de la vie, d'où viêt que chascun est en inquietude, chascun craint non sans raison de mourir; car on voit tant de malades abandonnez, & tant de morts, que chascun ressent vne peine & douleur demesurée. Celuy qui commande craint ou de mourir luy-mesme, ou de voir deuant ses yeux la mort de ses parés, ou de son peuple; & les pauvres peuples se voyent mourir les vns les autres sans remede. En la guerre & en la famine on descouure son ennemy, d'où vient presque tousiours quelque conseil salutaire, mais en la peste l'ennemy est caché, & pour plus grande confusion nous en voyons plusieurs qui se croyans assurez, à cause du soing extrême qu'ils ont à se conseruer, sont neantmoins attains & estains en mesme temps de la peste, & plusieurs qui apres les auoir touchez & embrassez eschappent sans aucun dommage, & partant puis que la vie est la chose la plus chere que les hommes puissent posseder en ce monde, il s'ensuit que ce qui nous la rauit avec plus d'effort, & nous laisse moins de moyen de la conseruer est le plus redoutable de tous les maux.

R. Vous auez si bien prouué ceste conclusion, que ie n'ay aucune raison pour luy opposer: & d'autant que le mal surpasse tout autre, autant aussi doit estre grand le soing des hommes à le chasser: & n'estant pas possible de chasser vne maladie, sinon par hazard, si elle n'est cogneuë, tout le soing

se doit rapporter à ceste cognoissance, & que personne ne croye de pouuoir entendre vne chose, s'il n'en cognoist la cause. Ceux doncques qui viuent encores, & qui viendront apres, prendront en gré & avec profit ce discours s'il peut aller si auant, sinon pour autre occasion, au-moins pour auoir le moyen de se conseruer apres que nous aurons trouué la vraye cause d'un mal si espouuantable.

M. C'est là où consiste à mon aduis le fonds & la force de tout cest affaire.

F. Ainsi estants passez d'une chose à vne autre, nous - nous sommes esgarez du discours qui nous auoit arrestez en vn si agreable lieu, & peut estre sera-il profitable de l'auoir fait & ainsi pour le discours de la peste, si apres auoir visité les malades qui nous attendent nous retournons vn autre iour au mesme lieu, chacun meditant ce qui luy plaira dauantage, & le tout pour examiner soigneusement ceste matiere.

R. Je crois que Monsieur Facio dit vray ? toutes-fois Monsieur soit comme il vous plaira, car nous auons tous deux vn extrême desir de vous seruir.

M. Je ne scaurois approuuer que ce qu'il vous plaist, & partant allez à la bonne heure, cependât que ie vous attendray avec toute sorte d'impatiencie.

Fin de la premiere Iournée.



SECONDE IOVRNEE.

F. **I**L semble que vous sortiez de disner Monsieur,

M. Vous soyez le bien venu Monsieur Facio, assiez-vous ie vous prie, car ie crains que vous ne soyez las.

F. Ie le feray puis que vous me le commandez. Vous scaurez monsieur que la quantité de clochetes, des Corbeaux, des malades, des morts, & de ceux mesmes qu'on soupçonne, d'ôt la ville a esté presque remplie durant quelque temps; ne nous point permis de venir plustost, pour nous acquitter de nostre promesse; mais maintenant qu'il semble que Dieu se soit laissé vaincre à la pitié, nous auons resolu de vous entretenir ceste apres-dinée, payant par mesme moyen vne partie de ce que nous vous deuous: & partant i'ay disné vn peu plustost que l'ordinaire pour attendre plustost monsieur Ratto, comme il est plus raisonnable, que de le faire attendre, lequel m'a promis d'estre de la compagnie.

M. I'estois fort estonné, pensant que vous deussiez manquer à la consolation que vous m'auiez promise: & ne vous accute point d'auoir tardé si longuement, car ces dangereux spectacles que vous venez de dire vous excusent assez, & moy-mesme pour les éuiter me suis tenu dans la maison autant qu'il m'a esté possible.

- F. Vous avez raison Monsieur, maintenant que le temps est si miserable, de demeurer comme dans vn port en ceste maison, qui me semble fort asseurée, non tant contre les ennemis par la force de ceste Tour, & par la vertu de ceux qui la deffendent, comme contre la Peste, pour estre située sur le panchant de ceste agreable coline, esloignée des lacs, marests; & de la multitude du peuple, desquelles choses l'air est souuent infecté.
- R. Dieu vous garde Messieurs, mais par aduventure ie vous destourne de quelque beau discours.
- M. Vous soyez le bien venu Monsieur, & ne craignez s'il vous plaist, de nous auoir interrompus, car monsieur Facio ne s'occupoit qu'aux louanges de ma maison.
- E. Et quoy? estimez-vous que ie n'aye pas raison de la louer.
- F. Vous auriez grand tort, non seulement de ne louer tout l'ouillage en gros, mais encores chaque partie en detail.
- F. Ie l'auois ainsi resolu, mais vous estes arriué lors que ie voulois parler de la plus gentille, & plus belle partie, qui seule pourroit annoblir & recommander vn lieu pour bas & abiect qu'il fust.
- R. Et quelle par vostre foy?
- F. C'est le maistre de ce Palais, la vertu & la noblesse, duquel n'acroist pas seulement avec merueille l'agreable beauté de ce lieu, mais encores la splendeur de toute ceste republique.
- R. Vous avez raison.
- M. Parlons ie vous prie de la Peste qui presse davantage, & laissons à part ces paroles qui sont fruiçts trop apparens de vostre courtoisie.

R. A la verité nous ne ſçaurions parler maintenant ſelon noſtre deſir, mais le fault qu'il nous fault faire me ſemble fort eſtrāge, paſſant d'un diſcours ſi gracieux & plaiſant à vn ſi eſpouventable & cruel comme celuy de la peſte : pour laquelle on eſt en doute ſi elle eſt eſtrangere, c'eſt à dire, ſi elle a eſté produite & a commencé par la ſeule contagion par le moien de quelques hardes infectées, qu'on a apporté de Lombardie, ce que non ſeulement a creu & croit encores le vulgaire ; mais, ſi ie ne me trompe, tous les Medecins avec leſquels i'en ay parlé. D'autre coſté, monsieur Facio tient qu'elle ne vient pas du dehors, mais qu'elle eſt née dans le pays par l'infection de l'air.

F. Adiouſtez-y encores Monsieur, que non ſeulement ie ne crois pas qu'on l'ayt apportée de Lombardie ou de quelqu'autre part dans vn ſac, ou dans vne male comme on le croit communément, mais au contraire ie tiens qu'il eſt impoſſible, & qu'il repugne à la nature de la peſte, qu'elle ſe puiſſe produire en ceſte ſorte dans vne ville.

M. Cecy me ſemble eſtrange, & confeſſe n'auoir rien oüy de ſemblable depuis que ie ſuis au monde.

R. Monsieur, la varieté des opinions profite ſouuentefois, particulierement quand on traite avec des perſonnes qui cedēt à la verité, ou pour mieux dire, aux raiſons plus viues & plus fortes, parce que la conſeſion qui en procede ne peut eſtre que bien prouuée, & tirée de bons & aſſez fondemens.

M. Ie n'ay pas dict cecy pour blaſmer monsieur Facio, mais par eſtonnement, oyant vne opinion

que ie n'ouïs iamais, & peut estre cōtraire à celle de tous les hommes, en laquelle il merite beaucoup de gloire, si elle est soustenuë, cōme ie crois avec des raisons dignes d'un homme qui faict profession des lettres.

- F. Personne ne veult estre blasmé, au contraire i'estime que la loüange plaist à tout le monde, mais ie vous assure Messieurs, qu'en tout cecy ie cherche principalement la verité, si toutesfois pour vn bié general il est possible de la cognoistre, & crois que monsieur Ratto a le mesme desir, cōme tout homme qui fait profession de la modestie, & partant ie me persuade qu'il ne deffendra point opiniastrement son opinion, mais qu'il s'estudiera à m'entendre, examinant soigneusement ceste difficulté, & donnant aussi tost l'aduantage aux raisons qui auront plus d'apparence & de force, estimant que ce n'est pas honte, mais tres-grande gloire d'éviter vne tromperie, portant avec soy vne marque tres-euidente d'une ame noble, & qui comprend facilement: & bien que les opinions communes soient la plus part du temps vrayes, ou pour le moins probables en tout ou en partie, on en voit toutesfois de tres-communes, voire enfoncées & comme gravées dans le cœur de tous les hommes, lesquelles avec le temps sont recogneuës faulses, ou par l'experience ou par des raisons plus viues qu'on trouue de nouveau.

Auant que les Portugais eussent trouué le Cap de bonne esperance, on tenoit pour tres-assuré que le passage vers le Golfe de Perse & d'Arabie estoit fermé, & qu'on n'y pouuoit aller que par terre. Et auant la nauigation de Christofle Colomb, con-

tant depuis le commencement du monde iusques en l'année 1490. parmy tant d'hommes qui auoiēt couru la Mer Occane vers l'Occidēt, on n'en veit iamais aucun qui eust obserué les vents Occidentaux en façon qu'il creust veritablement que l'on peust rencontrer de ce costé là de nouvelles terres, ou de nouveaux mondes, contre l'opinion de ceux qui viuoient alors, & qui auoient vescu auparauant, lesquels tenoient constamment ceste opinion, que du Cap de *finis terra* vers l'Occidēt on n'eust sceu trouuer aucune terre. On creust generalement en Allemagne qu'en l'année 1252. la Mer se deust secher, & en la mesme année sept mil Tudesques vindrent à Genes pour aller par terre au saint Sepulchre. L'opinion des Italiens ne fust pas moindre touchant la peste de l'année 1348. laquelle fust commune à tout le mōde, avec la perte des deux tiers des viuanis, car ils creurent qu'elle auoit esté portée en Italie par quatre Galeres Geneuoises, qui venoient de la Mer Majour, bien que les Astrologues avec leurs figures Celestes l'eussent predicte long temps auparauant, & qu'on veist manifestement que l'air estoit infecté. Le peuple d'Athenes creust assurement que la peste venoit de quelques payfans que Pericles auoit introduits dans la ville, comme si ces payfans eussent eu la peste, & qu'on ne sceust pas par Thucydide, Galien & Lucrece, qu'elle venoit de l'air infecté, & que ceste opinion coula dans les oreilles du peuple comme raconte Plutarque, par l'artifice des ennemis de Pericles: mais à quel propos perds-ie le temps à monstrier la faulseté de ces opinions communes ?

M. Vrayement vous en auez assez d'autres pour employer toute la iournée; mais nous ne croyons pas vn homme entieremēt bon & irreprochable, duquel avec le temps, nous recognoissons auoir esté trompez, & partant ie crois que ce poinct n'a besoin d'aucune preuue.

R. Je vois à la verité que c'est vne entreprise bien difficile que de s'opposer à vne opinion commune, mais ie recognois aussi que les opinions communes sont quelquesfois faulses, comme monsieur Facio a fort bien monstré, & pourroit bien estre que celle que nous auōs de la peste, quoi que commune, feust aussi faulse, & partant voyons les raisons: & pour commencer d'vn costé, on preuue en ceste façon que la peste nous a esté portée de *Pontedecimo*. Toute peste qui par le moyen des Historiens est arriüée iusques à nostre memoire a esté produite ou de la cherté des viures, ou breuages conuenables, ou des tremblemens de terre, ou de la multitude d'hommes morts ou autres cadauers priuez de sepulture, ou des estangs & marests, particulièrement si du lin, chanure, froment & choses semblables y auoient trempé long tēps, ou de l'abondance des ordures & excremens, le cours desquels auroit esté empesché, ou d'vne grande quantité de choses pourries, comme poissons, fromages & choses semblables, ou bien de l'air infecté par les figures Celestes, ou par les vêts Meridionnaux, comme par exemple en l'Europe. Je crois que voilà en peu de mots toutes les causes de toute sorte de peste, & si on en descouure quelqu'autre, ie pense qu'on la peut rapporter à quelqu'vne des susdites. Je dis donc avec vne telle

supposition que nostre peste n'a point esté produite par aucune de ces causes, il est doncques necessaire de confesser qu'elle vient de la seule contagion des hardes infectées, apportées des lieux qui l'estoient aussi.

M. On pourroit par aduenture dire qu'elle ne viét d'aucune de ces causes, mais de la seule volonté de Dieu.

R. Dieu est la cause tres-principale, tres-vniuerselle, & tres-esloignée de toutes les choses qui arriuent aux hommes, mais il a de coustume d'agir par l'entremise de ses creatures qui sont les causes susdites, lesquelles, si nous regardōs la diuine Majesté, sont effects seulement, mais nous regardans nous mesmes sont causes encores que moins vniuerselles, moins principales & moins esloignées, desquelles ont tiré leur source toutes les pestes qui sont venuës à nostre cognoissance:

F. J'ay tres-bien entendu l'argument, & pour ne vous mettre en peine d'auantage, ie responds que ceste peste ne vient point d'aucunes des causes susdites, si ce n'est de l'air infecté, adioustant qu'il est impossible qu'elle ait esté produite, ie ne diray pas d'une valise, mais encores d'une charge entiere de vestemens infectez, de façon qu'il ne vous reste qu'à prouuer deux conclusions, la premiere que ceste peste ne vient point de l'infection de l'air, l'autre que la peste peut venir d'un sac plein de tels vestemens.

M. Si l'on ne pouuoit prouuer ceste seconde conclusion, & qu'au contraire on prouuast qu'elle est impossible, que croiriez-vous monsieur Ratto touchant la cause de ceste peste?

R. Que l'infection de l'air l'auroit produicte comme croit Monsieur Facio, parce que nous sommes desia d'accord que ce n'est ny la cherté des viures, ny les corps morts priuez de sepulture, ny les tréblemens de terre, ny aucune des autres causes cy dessus rapportées.

M. Il suffit donc, si ie ne me trompe, de prouuer deux choses, la premiere que la peste peut estre produicte par la seule entremise d'un sac, ou d'une charge de vestemens infectez: l'autre, que la nostre l'a esté de ceste façon, selon le bruit commun.

R. Je ne le veux point obliger à ceste croyance vulgaire, parce que ie sçay qu'il n'est pas possible de la prouuer, veu mesmes qu'avec toute la diligence des Commissaires, touchant cest article, on n'a peu trouuer aucune chose qui la fauorifast, comme peut tesmoigner le Seigneur Baptiste Interiano, Gentilhomme naturellement tres-soigneux, lequel ayant esté enuoyé à Ponte Decimo par nostre Seigneurie, avec tres-ample authorité au commencement de ceste peste, a recherché avec vn soing extraordinaire, mais en vain, le moyen de descouuir quelque chose touchant ces vestemens, s'ils auroient esté portez, delaissez, ou vendus par quelques Villageois, ou Payfans en la maison de quelque Hostelier, parent, ou voisin.

M. Comment, il n'en peut rien descouuir?

R. Rien qui soit, & diray bien dauantage, encore qu'il n'en soit pas temps, que bien qu'on eust trouué quelque sac de vestemens sans maistre, ou quelque chemise qui eust esté vendue par quelques Payfans, avec dessein de nous apporter la

peste, & que tout cela fait prouué pardeuant le Juge, dequoy on ne voit pas mesme l'ombre, tout cela ne seruiroit pas de preuue suffisante pour faire croire que la peste eust esté produicte en ceste façon. Nous ne nions pas qu'il n'y ait eu des hommes lesquels en ont fait mourir d'autres portans dans vn sac, ou dans vn vaisseau quelque matiere pernicieuse, avec intention de semer la peste : car plusieurs ont esté pendus en diuers lieux pour vne telle occasion ; mais qu'ils ayent iamais produict la peste, ie le nie, & me reserue à monstrer vn autre iour la raison qui me force à le faire.

M. Selon que ie vois, nostre commune opinion a des fondemens bien foibles.

R. A la verité elle n'a aucune preuue touchant ces vestemens qu'on diét auoir esté trouuez à Pontedecimo ; mais ceste opinion a esté trouuée comme plus apparente, à cause de la peste qui a esté cydeuant à Milan, & qui a commencé à Pontedecimo, tirant vers la Lombardie, que l'on tient assurement n'estre point causée de l'infection de l'air.

F. De là vous pouuez cognoistre combien sont mal fondées les opinions communes, & comme il est bien seant à vn homme d'esprit de se travailler pour sçauoir autant qu'il est possible la verité des choses. Ne voyez-vous pas, Messieurs, que ceste commune opinion tenuë pour tout assurée, n'est fondée que sur vn peut-estre ? & que le peut-estre ne met rien en estre ? & que cet argument n'est pas bon : La peste peut estre portée de Milan à Pontedecimo avec les vestemens de per-

sonnes empestées, doncques elle y a esté portée. Mais en quel estat demeureroit ceste commune opinion qui luy osteroit son peut-estre, en façon qu'il parust clairement, qu'il n'est pas possible qu'elle y ait esté portée? Il vous reste doncques à prouuer ceste possibilité.

M. En verité on ne peut dire que l'aduantage que vous nous donnez soustenans ceste opinion commune, ne soit aussi grand que le désaduantage que vous prenez pour vous, vous rangeant seul à la defense d'un passage si large, par lequel ont passé, & veulent encore passer tous les hommes du monde.

R. Pour ne point perdre le temps, ie prouueray premierement que ceste peste ne vient point de l'air, commençant par la bonté & douceur d'iceluy, estimée de tout le monde, où l'on remarque tousiours vne parfaicte santé, grand nombre de vieillards qui ont atteint heureusement l'extreme vieillesse, parce que ceste ville n'est point située en lieu bas comme Pise & les Maremmes, mais eminent; ny en vn terroir humide & marescageux, mais sur vne petite colline seche; ce qui est directement opposé à la pourriture, & par consequent à la peste. Mais passons à la preuue de nostre dessein, qui est tirée des effects: parce que comme escriit Auerroës, les constitutions de l'air qui produisent les maladies, ne se cognoissent point par voye demonstratiue, qu'avec grande difficulté; mais seulement par expérience, receuant le tesmoignage des Anciens, lesquels en ont discouru, guidez par les mesmes expériences. C'est pourquoy Aëtius Paulus, Oribasius, & Ruf-

fus, lesquels apres Hippocrate & Galien tiennent
 les premiers rangs en la Medecine, & en ce qui
 regarde la peste, semblent recevoir la loy de Ruf-
 fus, tous dis- ie escriuent, mais Aetius plus claire-
 ment, que la mort des animaux sans raison est le
 premier effect de la peste. Si la peste vient de la
 malignité de l'air, les oyseaux meurent les pre-
 miers: si elle est causée des puantes exhalaisons de
 la terre, les bestes à quatre pieds meurent les pre-
 mieres, comme durant le Consulat de M. Emilius
 Lepidus, & de Quintus Mutius Scevola, que la
 peste feust fort grande à Rome: car elle exerça
 premierement sa cruauté contre les bœufs & au-
 tres bestes à quatre pieds, & puis contre les hom-
 mes. Gratiolus de Sale raconte la peste de Mader-
 ne le long de la riuere Benacus, en laquelle les oy-
 seaux moururent, qui estoit vn signe évident de
 la malignité de l'air. Or puis que nous n'auõs point
 veu en nostre peste la mort des oyseaux, c'est vne
 marque manifeste qu'elle n'est point causée de
 l'air. D'auantage, en la peste que le mauuais air
 produict, les riches meurent plus facilement que
 les pauures; ce qui se mōstre par la raison & l'ex-
 perience. Fracastor, tresbel esprit parmy nos au-
 theurs recens, apporté vne tresbelle raison, parce
 que, dit-il, les rustiques & seruiteurs, & finalement
 les pauures, estans plus accoustumez au trauail &
 aux incommoditez, & partant plus propres à les
 supporter, sont plus secs & plus forts pour resister
 aux causes des maladies. Les riches au contraire,
 comme plus oyseux & plus abondãs en sang, sont
 plus humides & moins gaillards pour y resister:
 ce qui est manifeste à tout le monde, par l'expe-

rience journaliere des autres maladies:& en la peste nous ne manquons point d'Autheurs tres-renomez. Liuius raconte la peste qui fust à Rome au tēps que M. Claudius Marcellus, & C. Valerius Flaccus estoient Consuls, en laquelle ne moururent que les hommes de qualité. Iean Villani tesmoigne qu'en la peste de Florence l'an 1340. plus de la sixiesme partie des meilleurs Citoyens moururent: pour parler comme luy, vne Comete ayant paru auparauant à la sortie de Mars vers le Leuant, à la fin de la Vierge, & au commencement de la Balance. Mathieu Villani recite la peste en l'aine de l'année 1360. qui commença en Aupil & May au Royaume d'Angleterre, avec telle furie, que le iour de S. Iean, & le suiuant, douze cens Chrestiens moururent à Londres, & puis exerçant sa rage en France, fit mourir en Prouence & en Auignon neuf Cardinaux, plus de soixante & dix Prelats, & grand' multitude d'autres Ecclesiastiques, personnes riches, ne restant aucun doute que ceste peste ne fust causée de la malice de l'air, d'où l'on montre plainement par ses raisons & experiences que les riches meurent plustost en la peste qui vient du vice de l'air. Or en la nostre il n'y a que les pauvres qui soient morts, il est doncques tres-éuidēt qu'elle ne vient point de l'air. Nous adioustons encor de l'opinion de Galien & de tous les Medecins conformément & principalement de l'experience tres-claire, & presque palpable, que la peste est vne maladie contagieuse, qui passe du malade au sain, nō seulement si l'on manie le malade avec son liēt & ses vestemens, ou bien estant à part, ou sans toucher on respire l'air infecté qui sort du malade, mais encores touchant ou maniant les vestemens des empestez en

autre temps & autres lieux, quoy qu'esloignez, & ne crois point qu'il faille disputer cõtre celuy qui nieroit que la peste se puisse ainsi conseruer, parce qu'il nieroit les principes fõdez sur les sens, cõme s'il nioit que le feu soit chaud. Ce fondement posé, comment trouuera-on estrange que les vestemens infectez qu'on a apporté de Lombardie à Pontedecimo ayent peu empester quelques-vns, & ceux-cy d'autres, & qu'à la maniere du feu la peste se soit multipliée, & ait causé vn si grand embrasement? & pour mieux faire voir la force de l'argument, ie demande si quelqu'vn par le moyen des vestemens empestez peut prendre la peste? ie croy qu'vn chacun dira qu'ouy: le demande apres si vn autre qui a touché, ou manié l'empesté, ou ses habillemens, peut prendre la peste, ou non? si vous respondes que non, vous niez la contagion que le sens mesme preuue; si vous dites qu'ouy, nous auons le fondement de nostre opinion, parce qu'apres cestuy-cy, vn autre se peut empester, puis quatre, voire cent, d'où la peste se formera.

M. Veritablement ceste raison fondée sur la contagion est fort apparente, mais peut-estre pourroit-on dire que ce fomes empesterá vn, deux & quatre, mais qu'il ne multipliera point en façon qu'il produise vne peste.

R. Pourquoi non? Il y a vne infinité de preuues d'autres pestes anciennes & recentes tesmoignées par hommes de grande autorité. Platine escrit au Pontificat de Clement VI. que la peste de l'an 1350. fut portée en Italie à l'occasion du Iubilé par la multitude des Pelerins qui venoient de delà les monts. Gaspar Torella, Euesque & Medecin, ra-

conte en vn sien conseil, touchant la peste d'Espagne, qu'elle y fut portée par l'armée que Ferdinand Roy dudit pays, enuoya en Flandres pour conduire sa fille qu'il maria à l'Archiduc. Georges Agricola, en vn sien liure qu'il a fait de ceste maladie, tesmoigne qu'il y eust vne peste en Allemagne, causée par de tres-meschans hommes qui la semerent çà & là. Sabellicus raconte la peste de l'armée Venitienne, laquelle estant venuë du Leuant à Venise, infecta toute la ville avec la mort de plusieurs, mais beaucoup plus dedans que dehors. Jacques de Bras rend tesmoignage, que la peste de l'année 1438. fust portée de Pise à Genes par vn Soldat, lequel infecta premierement sa femme, & par elle toute la ville. On pourroit encores mettre en auant la peste, de laquelle Falopius fait mentiõ, qui s'alluma à Tripoli par le moyë des hardes d'vne boutique pleine seulement de drogues Aromatiques, mais empestées, & qui auoit esté close l'espace de trois ans. François Guichardin raconte la peste de Milan en l'année 1524. laquelle y fust portée avec les hardes que les Soldats pillerent à Biagrasse, où la peste estoit desia allumée. Oddo des Oddons, ou Marc son fils Docteur fort renommé en l'estude de Padoüe, soustient avec plusieurs raisons que la peste qui fust à Padoüe en l'année 1555, y fust portée avec des hardes infectées. On peut adiouster à l'authorité d'Oddo, celle d'Altomarus, qui tient que la peste se peut porter en des lieux esloignez par le moyen de ce fomez pestilent. Chascun sçait que la peste derniere de Palerme y fust portée par vne Galeassé empestée, venuë de Barbarie, comme l'escriit l'Ingrassia. On sçait que la peste qui feust à Milan y fust portée des lieux infectez, ou de Trente,

ou de Mantouë; car telle est l'opinion de ceux qui l'ont escrit: Que les dernieres pestes de Venise & de Padouë y ayent esté produictes par la pure contagiõ des hardes portées par vn homme de Trente empesté, outre la commune opinion, presque tous les Docteurs de Padouë, selon que i'entends, le tiennent pour asseuré. A tant de raisons, à tant d'experiences & authoritez, i'adiouste celle de Fracastorius, lequel a laissé par escrit, que le mal contagieux desia conceu en l'vn sans aucune disposition de l'air, passe en l'autre, & se fait commun & contagieux, donnant pour exemple la peste d'Athenes, escrite par Thucidides, & allegant les lentilles, ou pourpre, lesquelles en son temps eurent cours en Italie: D'où si vn peut conceuoir la peste en maniant des hardes infectées, il pourra communiquer l'infection aux autres, & de particuliere la rendre commune. L'authorité des Princes & grands seigneurs, tant anciens que modernes, fortifie encores ceste opinion, lesquels par l'aduis d'hommes excellens pour garentir leurs estats de la peste font boucher avec beaucoup de soing les passages, iusques à ne permettre pas mesme le port des lettres qui viennent des lieux infectez, avec vn manifeste dommage du trafic, & du droict des entrées. Or toute ceste diligence seroit vaine si la peste ne se pouuoit porter d'vn lieu à vn autre; ce qu'on ne doit pas raisonnablement croire: Et ne manqueray pas de me souuenir à ce propos du mal de Naples, semblable quãt à la contagion, à la peste, lequel comme on sçait feust porté du nouveau môde, & se decouurit en Italie l'année 1494. pendãt que les François conqueroiẽt le Royaume de Naples, & apres par la force de la contagion s'espandit par toute la terre.

F. Que dites-vous de tant de vents qui viennent du Midy ?

R. Je ne doute point que la qualité de telles constitutions de temps n'aye de beaucoup fauorisé ceste contagion ; mais ie nie fort bien que la malice de l'air ait esté la cause de la peste, & en confirmation de tout ce que i'ay desia prouué, ie produicts encores l'expérience de tous ceux qui ont esté infectez en ceste peste pour auoir touché, ou practiqué avec personnes, ou hardes infectées. On voit que les riches, & les Monasteres des Religieuses, lesquelles sont en tres-grand nombre, & ce qui est plus admirable, les hospitaux se sont garantis pour le soin qu'ils ont eu de se tenir clos & fermez, & sans conuersation, lequel soing eust esté inutile si l'air eust esté infecté, veu que tous également le respirent, & que les malades des hospitaux ont plus de disposition pour estre infectez par la corruption d'iceluy. Mais pourquoy traueille-ie tant à prouuer que ceste peste est venue de la seule cōtagion des hardes, & non de l'air infecté, puis que ceste maladie, laquelle avec nostre ville afflige encores toute l'Europe, & que nous appellons mal galantin, oste sensiblement toute difficulté ? parce que nous voyons que prenant son origine de l'air, elle n'a esparné aucune condition de personnes, ains a affligé les riches comme les pauvres ? or le mesme seroit aduenü en la peste, si l'air en eust esté la cause. Pour ne vous ennuyer doncques d'auantage, ie conclus avec tant d'exemples & d'expériences que i'y pourrois adiouster, que la source de ceste peste est estrangere, & qu'elle nous a esté portée de Lombardie par le moyen des hardes in-

fectées, aydée neantmoins de la condition Meridionale de l'air. Laquelle conclusion, bien que preuée & appuyée de tels & si grands fondemēs, ie croy neantmoins pouuoir estre faulse, cognoissant par la foiblesse de l'esprit humain combien nous sommes plus prompts à nous tromper, qu'à cognoistre les caules des choses, & mesme de celles que nous croyons entendre parfaictement, & y estre maistres passez, pour-autant qu'elles nous seruent d'occupation ordinaire.

M. Ie n'entends pas tout cela, mais il me semble biē que vous ayez tiré vn grand fardeau sur les espaulles de Monsieur Facio; ie ne sçay qu'est-ce qu'on peut respondre à de si viues raisons.

F. I'ay entendu plusieurs, soustenans ceste commune opinion, mais ie confesse que ie ne l'ouys iamais deffendre avec tant & de si beaux fondemēs, & crois qu'estant soustenuē d'vn si rare personnage, elle ne sçauroit receuoir de plus grands auantages pour sa deffence. Et veritablement ie croirois estre desia vaincu par vn si puissant aduersaire, si ie n'estois aydé de la bien-vueillance du Seigneur Estienne, que i'ay tāt souhaittée, avec la faueur duquel, si ie ne me trompe, secondé de la force des raisons, i'espere surmonter ceste grande mer de difficultez, estimant en cecy d'autant plus loitiable le soudain changement d'opinion que ie voy en vn aduersaire que ie prise & cheris beaucoup, qu'il se trouue rarement parmy les grands personnages. Mais parce que ie me desie de pouuoir respondre sur le champ aux raisons que i'ay entēdues aujourd'huy, & aussi de peur que les malades qui nous attendent ne soient priuez de la

consolation qu'ils esperent de nous, prenons congé du Seigneur Estienne, iusques à demain à la mesme heure.

R. Vous avez raison, ie ne voyois pas que le Soleil, lequel pour estre fort esleué rendoit l'ombre si courte, maintenant qu'il s'approche de l'Occidēt la rend si longue. Allons de grace.

M. Ie croy qu'ayans tous deux pris garde au plaisir que ie ressentois, vous avez deliberé de m'en priuer : Patience, allez à la bonne heure, ie vous attends à demain.

Fin de la seconde Iournée.



TROISIÈME IOVRNEE.

R. **V**ous ne direz pas Monsieur, que nous vous ayons manqué de promesse.

M. Je ne l'ay point dict, ie ne peux ny ne le veux dire en aucune façon; ce seroit vne trop ingrate recompense pour la courtoisie avec laquelle vous me traictez, si ie le disois, mesme si ie ne preschois les loüanges de tous deux tant que ie viuray: mais, ie vous prie assées-vous Monsieur.

R. Je le veux, encores que ie ne sois pas las: mais aussi ie vous supplie Monsieur, de ne nous obliger pas plus que nous ne meritons avec vostre douceur, de laquelle à mon aduis se ressent quiconque traite avec vous.

M. Je feray mieux de ne point respondre; mais que vous semble de l'entreprise de M. Facio?

R. Veritablement l'entreprise est aussi belle & honorable comme elle est nouvelle & inouÿe, & suis expressément venu de bonne heure pour l'ardent desir que i'ay en l'ame de l'entendre sur ceste matiere.

M. Je crois que c'est vn particulier priuilege de toutes les choses nouvelles, que chacun desire de les cognoistre, mais i'en ignore la cause.

R. Aristote la monstre aux premieres paroles de sa diuine Philosophie, lors qu'il dist que tous les hommes desirent naturellement de sçauoir,

or les hommes ne desirans point sçauoir ce qu'ils sçauent desia, il reste qu'ils desirent seulement ce qui est nouveau & qu'ils ne sçauent pas encores, d'où vient le priuilege des choses inconnues.

M. Je crois qu'en voila la vraye cause, mais ie dis bien que toutes les choses nouvelles n'enflamment pas esgallement nos esprits du desir de sçauoir, & partât il me semble que ie ne me soucie pas beaucoup de sçauoir plusieurs choses que i'ignore, & que ie meurs du desir d'en sçauoir d'autres, & particulierement celle de la peste.

R. Ce n'est pas de merueille si nous ne desirôs point de sçauoir les choses desquelles on n'attend ny profit ny plaisir: & d'autre costé, si nous nous enflammons apres la cognoissance des choses que nous estimons vtils & plaisantes. A la verité, celle de la peste doit estre recherchée de toute personne qui desire la conseruation de sa vie, non tant pour vn admirable contentement qu'on retire de la cognoissance d'une chose si importâte, & parauēture ignorée de tout le monde, cōme pour le profit inestimable qu'on reçoit à se fortifier, & munir contre vn mal tres-grand & tres-importun.

M. Vne heure me semble cent ans, qu'il n'arriue pour entendre (ie le diray ainsi) choses veritablement nouvelles, & grâdes, & si ie ne me trompe, il me semble que ie l'entends, c'est luy de vray, vous soyez le bien venu, Mons. F.

F. Et vous Messieurs les biē trouuez, qu'avez vous aujourd'huy de nouveau?

M. Nous l'attendons de vous, Monsieur, car d'autât plus ie considere ce que Monsieur Ratto traite.

ta hier avec tant de doctrine, d'autant crois-je que les choses que j'attends aujourdhuy de vous doiuent estre nouvelles, & non iamais venuës à la pensée.

R. Et que peut-on attendre de M. Facio, sinon telles choses?

F. Bien que vous disiez cecy plus pour me favoriser, que pour autre chose, si neveux-je pas dire que l'opinion ne soit nouvelle, veu que tous les Auteurs qui me sont venus en main, non seulement ne la tiennent point, mais à peine en font-ils mention: bien que par consequence necessaire on la puisse colliger des princes de ceste professiõ Hippoc. Gallien, Paulus, Actius, Oribbasius, Ruffus, Auicene, & de plusieurs autres auteurs de grãde reputation anciens & modernes, que j'ay peu lire, lesquels n'ont tenu, non pas mesme (comme ie crois) songé ceste commune opinion que vous defendez avec les autres.

R. Il me semble toutesfois que Fracastor est vn Medecin de grande estime.

E. Il est vray, mais il s'est bien gardé d'escrire ceste opinion, comme j'espere de monstrier.

M. C'est cecy qui me semble beau, sus donc aux mains.

R. Je prends garde qu'il est impossible de s'accorder en ce point. si, allongeant vn peu nostre chemin, nous ne cherchons la nature, & la diffinition de la peste, & de l'air infecté.

M. Je crois que c'est vn travail entierement necessaire.

F. Necessaire sans doubte, comme celuy auquel consiste la force & la vigueur de ceste entreprise:

& diray bien dauantage, avec le respect de tout le monde, que la grande difficulté qui parauanture se rencontre en ceste recherche a esté cause de ceste erreur, de façon que i'estime pouuoir dire sans vanité que ie n'ay peu treuver iusques à maintenant, autheur ny ancien, ny moderne qui me l'aye enseignée: Et plusieurs d'entr'eux tres-clairs, & faciles aux choses de la Medecine, en ce qui regarde la matiere de la peste me semblent auoir commis de si grandes fautes, que les voyant en toute autre chose dignes de tres-grande admiration, ils semblent estre sortis d'eux-mesmes en recherchant la nature de la peste, ou changeant de face estre deuenus autres qu'ils n'estoient auparauant, comme i'espere de faire toucher au doigt. Et pource retournant à nostre propos, nous ne pouuons parler de ceste matiere, ny resoudre les raisons de M. Ratto, si premieremet nous ne sommes d'accord de la nature de la peste, & de l'air infecté. Comment pouuons-nous sçauoir, si ceste aptitude & condition que la peste peut estre portée çà & là, se peut accorder avec la nature de la peste, si nous ne sçauons auparauant si la peste est, & quelle chose elle est: comme par exemple, i'amaïs personne ne sçaura si la terre se meurt, s'il ne s'assure premieremet de deux problèmes, comme enseigné Aristote; Il est vray que les deux premiers estans cogneus, les deux autres se cognoissent facilement par la force de la definition, laquelle (la cause estant treuuee) est vn moyen tres-suffisant pour nous les faire entendre.

R. Voila qui va bien, mais c'est vne chose si difficile de treuver les dernieres differences en toutes

les autres choses que nous voulons définir, qu'il n'est pas de merueille si l'ō souffre beaucoup pour les treuuer en definissant la peste, qui est chose si difficile & cachée.

F. Je ne commence pas à sçauoir la difficulté qui se treuue aux definitions, mais suiuant les voyes qui nous sont plus cognues, à sçauoir les effects, par lesquels a passé celuy duquel nous auons appris les formes & la maniere d'apprendre, nous descrirons la nature de la peste, laquelle estant trouuée, les autres problemes ou questions qui se peuuent faire sur la matiere de la peste resteront clairs & sans difficulté.

M. Qu'on voye donc premierement que c'est que peste?

F. Pour commencer par le nom, les Grecs l'appellent *λαμψ*, les Latins l'appellent *pestilentia*, ou *pestis à pascendo*, dit Rustique, comme si elle se paissoit des corps humains & les deuorait, en les tuant. On l'appelle encores *anguinalia*, parce que le plus souuēt elle faict voir ses effects aux aisnes avec enflures; & d'auātage sous les oreilles, & les aisselles, pour la ressemblance & rapport de toutes ces parties, qui sont destinées à receuoir les humeurs pernicieuses qui leur sont enuoyées des parties nobles. Mais laissant à part les noms lesquels sont imposez aux choses selon le caprice du vulgaire, & souuent par fortune, cherchons par la voye des effects, comme nous auons desia dict, la nature du mal qu'on appelle peste. Nous voyons que si dans vne ville, par exemple entre cinquante mille personnes 30. 70. ou 100. deuiennent malades, & que la troisieme partie d'iceux meure, il n'y a langue

langue qui ose dire que c'est peste, si semblablement trente ou quarante mille, ou tous encores deuenoient malades, & qu'il n'en mourust pas cēt, tous les autres estās restablis à leur premiere sāté, il n'y a aucun, qui de bouche ou par escrit dise que la peste se treuve là, mais plustost auons-nous accoustumé d'appeller vne telle maladie mal galantin, ou courtois, nous contentans de nous affliger lors qu'il y va de la vie: Si pareillement dans le mesme pays en l'espace de dix années trēte mille personnes deuenoient malades, il n'y a aucun qui dise que ceste maladie ou mortalité soit peste. Mais si d'vn autre costé en la mesme ville dans douze, ou vingt mois, vingt-cinq, ou trente mille personnes tomboiēt malades, avec la mort de la plus grande part, il n'y a homme si aucegle qu'il n'appellast ceste maladie peste. Nous tirons donc de ces effects que la peste est vne maladie non seulement commune & vulgaire, mais aussi mortelle, rēclose dās les bornes, & espace de peu de tēps: & partāt pour plus grāde preuue de ceste cōclusion Galiē escrit, que si en vn mesme lieu, dās vn traict de temps, vne maladie en attaque plusieurs, elle est appelée vulgaire, ou populaire, mais si encores elle en faict mourir beaucoup, on l'appelle peste.

R. Je crois, Monsieur, que vous auez oublié vne propriété inseparable de la peste, comme si elle ne luy estoit pas propre, qui est d'estre contagieuse.

M. Auant que passer plus outre, Messieurs, ie vous prie de me faire entēdre que c'est que contagion, de laquelle on parle tant, parce que si estre contagieux ne veut dire autre chose, comme i'entends dire, que communiquer l'infection à vn autre, le

feu fera aussi contagieux, & de fait ie n'entens pas bien en quoy consiste ceste contagion.

F. Je satisferay premierement au seigneur Estienne, & puis ie vous respondray M. R. & ie crois, pour entendre la nature de la peste, qu'il est necessaire de chercher avec grand soin ceste contagion. Hierosme Fracastor, homme veritablement d'un noble esprit, & autant agreable aux hommes studieux en ceste matiere de cōtagion, qu'aucun que i'aye iamais veu, semble declarer par le mot que c'est que contagion, à sçauoir vne infection qui passe de l'un à l'autre.

M. Donques le feu sera contagieux, parce que ceste qualitez passe du feu à mon corps: & pourroit-on dire encores que le vice & la vertu sont qualitez contagieuses, puis que conuersant avec les hommes vertueux ou vicieux on deuiet ou vertueux ou vicieux.

F. Fracastor respond que ce passage, qu'on appelle contagion, ne se fait aux accidens, sinon par similitude, comme sont les exemples par vous allegués, mais veritablement la contagion ne se fait qu'en la substance?

R. Si l'embrasement d'une maison passe à sa voisine, en façon que toutes deux soient bruslées, pourquoy n'est ce pas en substance?

F. Belle difficulté, à laquelle Fracastor respond, disant que la contagion est vne infection, laquelle ne commence pas seulement par des petites parcelles du corps mixte, mais aussi par celles mesmes qui sont imperceptibles.

R. De maniere que l'embrasement pouuant commencer par des petites parcelles comme fait la

contagion, & celle-cy pouuant corrompre tout le mixte, comme l'embrasement, il s'ensuit que la difference spécifique de la contagion & de l'embrasement sera, en ce que les petites parcelles de la contagion sont imperceptibles, & celles de l'embrasement perceptibles.

F. Voila qui va tres-bien. Mais cecy est digne de consideration, à sçauoir, si la corruption de tout le mixte naist ou peut naistre de la contagion, & si ceste corruption est pourriture, ou vne destruction violente faicte par vn contraire, & estant pourriture si toute pourriture est contagieuse?

R. Je crois qu'il est clair, sãs autre preuue, que ceste corruption qui se faict par la force d'vn contraire n'est point faicte par voye de contagion, parce qu'on ne sçauroit deffendre la description que nous auons tantost faicte de la contagion; il s'ensuit doncques que la corruption qui naist de la contagion, se faict par voye de pourriture: & encores que toute vraye contagion se face entre choses distinctes, & separées, toutesfois on peut par similitude appeller contagion celle qui se fait aux parties continuës; comme si vne partie d'vne pomme est pourrie, on sçait que ceste pourriture est contagieuse, sinon à quelque chose separée, au moins au reste de la pomme.

F. Nous sommes d'accord, si vous n'appellez vraye contagion que celle qui passe d'vn corps à vn autre, distinct & separé.

R. Prenant doncques la contagion en toute l'estenduë de sa signification, on peut soustenir que toute pourriture est contagieuse, & principalement aux mixtes d'vne mesme espece.

F. Cela va bien. Mais si la pourriture est cōtagieuse ou proprement, ou par ressemblance, il s'ensuivra que la cause efficiente de la pourriture sera contagieuse, & par consequent l'air, qui pourrit la chair en Esté sera contagieux.

R. Il ne s'ensuit pas, parce que nous auons dict que la contagion est vne infection ou pourriture semblable, laquelle passe de l'vn à l'autre, & partant si l'air doit estre contagieux, il fault qu'il aye en soy ceste infection ou pourriture.

M. Il est necessaire de dire qu'il l'a en soy, puis qu'il l'a produict en la chair, si vous ne voulez que l'air donne la pourriture, qu'il n'a point.

F. Il a la vertu de la dōner, quoy qu'il ne l'aye pas en soy-mesme, cōme le Soleil qui a la force d'eschaufer, & le vin d'enyurer, encores que celuy-là ne soit pas chaud, ny cestui-cy, yure. Mais par aduantage l'occasion se presētera de discourir en quelle façon l'air a la force de pourrir quelque chose.

R. Pour doncques produire la contagion, il ne faut pas seulement que la pourriture qui passe du premier au second, soit virtuellement & en puissance au premier, mais aussi formellement, comme disent les Philosophes.

M. Ie l'entēsiusques icy, mais cōment est-ce que la contagion peut estre pourriture, si la morsure de la vipere, du chien enragé, & ce qui est le plus clair, la veuë de la catoblepe, le toucher du roytelet, & autres animaux venimeux sont contagieux sans pourriture du costé du patient, & moins encore de l'agent?

R. Agréable difficulté, & necessaire pour l'intelligence de la contagion, qui a tres-grande ressem-

blance avec les venins, & presque toutes les maladies contagieuses contiennent ie ne sçay quoy de venimeux.

M. J'ay mesme oüy dire, que la peste qui est contagieuse est encore venimeuse.

R. Il est vray, parce que comme le venin est ennemy de la vie, & comme par trahison il tasche de la perdre, ainsi fait la peste, & semblable maladies, que les Medecins pour expliquer leur malice appellét venimeuses, mais ils differét en cecy que le venin ne prouigne point, oüy biē la peste, à cause de la pourriture, laquelle produit la contagion, & ne se treuve point aux venins.

F. On dit toutesfois que l'arsenic, les cantharides, & autres venins bruslans sont cause de pourriture.

R. Il est vray, mais par consequēce produisans des viceres, & ceste pourriture n'est pas contagieuse en façon qu'elle produise des vlcères de mesme nature en vn autre, outre qu'une telle pourriture finit promptement, & quand mesme elle dureroit long temps elle seroit bien contagieuse, causant parauanture quelque pourriture aux humeurs d'un autre, mais nō pas des vlcères en l'estomach, comme ont ceux à qui on a donné ces venins bruslans.

F. L'exemple du Phtisique fournit quelque difficulté en cecy, qu'en dictes-vous?

R. On respond, non tant parce que la pourriture du phtisique dure plus longuement, & se conserue dans la voye de la respiration, d'où vient que la contagion est aisée, cōme encore parce que ces semences ne produisent point vn vlcere dans les poulmons d'autruy, si ce n'est en ceux lesquels

pour l'aage, disposition de poictrine, & constitution du corps sont fort prompts à recevoir vn tel mal, desquels encore rarement est-il receu.

M. Escoutez-moy ie vous prie, si la contagion est vne pourriture de mesme nature, qui passe de l'vn à l'autre, il s'ensuit que le second ne s'infectera iamais sans toucher au premier, car il semble que le mot le porte; mais nous auons veu par experience en ceste peste, qu'elle s'est attaquée à plusieurs, lesquels n'ont pas seulement veu vn homme qui eust la peste.

R. Encore que le mot sonne comme il semble, que la pourriture n'attaint iamais, si ce n'est par l'attouchement, toutesfois cet attouchement se prend avec vne signification de grãde estenduë, veu que ce passage de mesme nature, ou qui se fait du premier au second se peut faire comme tous le tiennent en trois façons. Quelques pourritures infectent seulement en touchant: les autres sans toucher, en laissant dans les vestemēs ou choses semblables, les semences de la pourriture, laquelle peut-estre est desia estainte: & nous appellons ceste façõ de cõtation par voye de fomes, les autres infectent non seulement en touchant & par voye de fomes, mais encore de loing sans toucher le corps de la pourriture ny le fomes. Et ces trois sortes de contagion gardent cest ordre entre elles, que ce qui infecte en touchant n'infecte pas tousiours par voye de fomes, ny ce qui infecte par voye de fomes ne le faict pas de loing, mais ce qui infecte de loing le peut faire aussi par la voye du fomes & de l'attouchement, & ce qui le faict par voye de fomes le faict aussi tousiours par l'atou-

chement, comme par exemple celuy qui a la peste peut infecter de loing, estant toutesfois dans la mesme chãbre ou semblable lieu : & on sçait que le mesme peut infecter si l'on touche au fomes, c'est à dire aux choses qu'il a desia infectées, ou à luy-mesme. Le mal de Naples laisse le fomes, avec lequel & l'attouchement il infecte, mais non pas de loing: vne piece de chair pourrie infectera vne autre chair en touchãt, ou presque touchant, mais non pas par voye de fomes, ny de loing.

M. Je crois bien qu'il faut entendre toutes ces choses, si l'on ne veult parler par hazard de la contagion, mais ie ne descouure point encores cõme elle se faict; parce que l'infection qui se treuve en l'vn passant en l'autre, ie desire sçauoir si ce passage se faict par le moyen des vapeurs qui sortent du premier infecté, & vont infecter celuy qui ne l'est point.

R. Vous cherchez, Monsieur, la cause efficiente la plus prochaine de la contagion, laquelle n'est pas beaucoup difficile à cognoistre en la contagion qui ne se faict que par l'attouchement, parce que si ceste pomme pourrie touchant vne qui ne l'est point, la pourrit semblablement, il est raisonnable de croire que la cause de la pourriture de la seconde soit la mesme que de la premiere: en la premiere, la chaleur de l'air du dehors en a esté la cause, faisant euaporer l'humide substantiel de la pomme, avec lequel la chaleur naturelle qui se conseruoit dans luy s'est aussi euaporée, de mesme en la seconde, touchée de la premiere pourrie, l'humide naturel est tiré au dehors, par le chaud & l'humide de la pourriture d'icelle: d'où viẽt vne pour-

riture en la seconde semblable à celle de la premiere, la cause maintenant pour laquelle la premiere pomme pourrie ne laisse point de fomes, est en ce que mal-aisémēt les semences de la premiere pourriture se peuuent conseruer en ces vapeurs. Mais la merueille n'est pas petite de considerer que les vapeurs qui sortent d'un galeux, tigneux, verolé, phtisique, & empesté, se peuuent conseruer long temps dans les habits & choses semblables, & partant ie crois que qui cōsiderera soigneusement la fumée qui teint les murailles, & les odeurs lesquelles se conseruēt longuement dās les vestemens & le bois, iugera que ces odeurs, & couleurs ne sont point seules; mais comme dict Fracastor, accompagnées des corps, lesquels puis qu'ils se conseruent si long temps, il faut dire que non seulement ils sont si subtils, qu'ils peuuent penetrer & se loger dans les passages plus estroits du bois & des vestemens, en façon qu'ils ne soient subiects ny exposez aux alterations & chāgemens du dehors, mais outre la subtilité, qu'ils sont d'un meslange beaucoup fort, serré, & gluant, lequel se faiēt aisément où l'euaporation ne se pert point, ains est serrée en façon que ces vapeurs se mellēt long temps ensemble, & fomentées continuellement par d'autres nouvelles font vn tres-subtil meslange, acquerans vne telle & si gluante viscosité que les semences contagieuses s'attachent facilement & se conseruent long temps propres à produire au second vne pourriture telle qu'elle estoit au premier.

F. Voila qui est excellemment bien.

R. Et partant il arriue que les fruiçts pourris sont

contagieux quasi pour le seul attouchement, laissant difficilement aucun fomes en la laine ou autres sēblables choses, lesquelles touchāt par apres vn autre fruiēt le puissent alterer, ou pourrir. La cause en est claire, parce que les fruiēts estants de substance fort aqueuse produisent des vapeurs aisées à alterer, & dissiper d'autre part les pourritures qui laissent vn fomes sont tousiours glutineuses, espesses, & visqueuses: ie ne sçay si ie me fais entendre en matiere si difficile.

M. Il me semble que ie touche tout avec le doigt, tant vous avez clairement expliqué ceste matiere, & i'entends encore par vostre discours que toutes choses ne sont pas propres à seruir de fomes, mais seulement celles qui ont des pores, ou petits trous, dans lesquels se peuvent conseruer ces petits corps contagieux, comme pelices, laines, & semblables; & non point le fer, le maibre, & autres corps espais, qui sont sans pores.

F. I'adiouste encore que ces semences contagieuses se desseicheroient & s'esteindroient briefuement en l'air, si l'on desploioit ses laines & pellices; mais estant pressées, pliées, & renfermées, on ne sçauroit croire combien elles se conseruent longuement.

M. Ie serois grandement aise sur ce propos d'entendre la cause pour laquelle les viures ne peuvent retenir ces semences, & partāt ne sont point contagieux.

F. Ceste opinion est vne des communes qui sont faulses, & les hommes, & les Medecins bien estimez ne disent, & ne sçauroient dire pourquoy ils la tiennent.

- M. Comment, qu'ils ne sçauoient? Voudriez-vous qu'ils donnassent vn iugement de si grande importance sans aucune raison?
- F. Ie ne le veux pas autrement. Mais encores que les hōmes soient tousiours obligez de parler avec raison, toutesfois ils n'obseruent pas tousiours ce debuoir. Ie voudrois sçauoir si le froment, ou le grain d'vn nauire, ou plusieurs seroient infectez, si la mie d'vn pain qui auroit esté dans le sein d'vn infecté, & le fromage manié de mesme façon & semblable viures spongieux, qui ont des pores ou petits trous peuvent estre contagieux?
- M. Ie sçay bien qu'il ne m'arriuera pas de les toucher, mais d'où vient ceste commune opinion?
- F. Encores que l'opinion soit commune, si crois-ie qu'elle est faulse, parce que ie ne puis descourir pour quelle raison ces semences pestilētes se peuvent conseruer, comme plusieurs disent, dans le bois, & non point dans le pain, dans le grain, dans la farine & autres viures.
- R. Pour le grain ou farine dans lesquels seroient morts ou auroient couché des pestiferez avec charbons ou enfleurs, qui auroient esté ouuertes, ie croy qu'il se pourroit faire du pain par les mains d'vn autre pestiferé, duquel tout le monde pourroit manger par apres en toute asseurance.
- F. Ie le crois aussi, car il est raisonnable de iuger que le feu a consumé toutes ces semences contagieuses qui pourroient auoir esté retenuës dās le grain ou farine. Mais ie parle du mesme grain ou farine, auant que le feu les aye purgez.
- R. Cecy est sans difficulté, mais parce qu'il arriue rarement que les hommes se seruent des choses

propres à la nourriture, pour dormir, ou se vestir, de là sort ceste commune opinion : & d'autant qu'il faut croire que ces semences pestilentés, lesquelles sortēt d'un corps pestiferé se cōseruent dans les choses où elles sont continuellement enuelpées, qui sont vestemens ou draps pour se vestir & dormir, & non choses pour la nourriture, il s'ensuit mal à propos que celles-cy ne peuvent point donner la peste.

M. Je croy qu'il est ainsi.

R. Mais retournant à nostre propos, ie dis que la difference est telle, comme nous l'auons desia expliquée, entre les vapeurs qui infectent seulement en touchant, & celles qui le font & en touchant & avec fomes. Mais l'admiration & la difficulté est bien plus grande aux maladies, lesquelles n'infectent pas seulement en touchant & avec fomes : mais de loing comme font les phtisiques, ou malades du poulmon, les pestiferez, & ceux qui sont trauaillez de l'inflammation des yeux ; & en verité ie ne sçauois avec quelle raison reprēdre ceux qui se soulagent avec les qualitez, ou proprietēz occultes, quand on leur demande pourquoy la Catoblepe, le Roitelet, & autres semblables venins infectent, & pourquoy la calamité tire le fer, & se tourne vers la Tramontane. Mais s'ils pensent satisfaire avec la mesme responce à toutes questions, ie croy qu'ils se trompent. Il est certain, dit Fracastor, que la contagion qui se fait de loing ne vient point d'aucune qualité spirituelle, comme la lumiere, le son, l'odeur, le regard de la Catoblepe, le toucher du roitelet, la veüe, ou autres qualitez qui meuuent les sens, & qui produisent

leurs effects spirituellement, parce que ces effects durent autant que la presence des choses, desquelles sortent ces qualitez spirituelles. Mais ce qui infecte de loing, bien qu'il s'absente en effect, demeure neantmoins contagieux en l'air, & en son fomes, avec les semences qui en sont sorties: & mesme, comme tesmoigne Galien, passe en ceste façon d'un lieu à vn autre, & la mer encore avec l'aide des vents, & partant croit-on iustement que ce qui produict dans le second vne infection égale à celle du premier est vn corps.

- F. Ils diront par-avanture que ces petits corps operent en apres par vne qualité spirituelle & cachée.
- R. On ne doit pas dire cela des qualitez spirituelles, parce qu'elles ne prouignent point: car celuy qui manie vn autre qui est malade ou mort par le venin de la vipere, ou de la Catoblepe n'est point infecté du mesme mal, comme celuy qui manie quelqu'un qui sera malade, ou mort de la peste, & moins encores le troisieme qui maniera le second, & ainsi successiuement, parce que les formes spirituelles ne peuvent produire au second, ce qui estoit au premier, d'autant que la generation se fait par l'entremise des premieres qualitez. D'un autre costé, si la cause ne se peut rapporter aux qualitez spirituelles, ie ne scay comment elle se rapportera aux qualitez cogneües, comme dit Fracastor de l'opinion d'Aristote & de Galien: car bien que les premieres & secondes qualitez concourent à la generation de ces seminaires, ie ne vois point pourtāt comme ceste semence pestilente produicte & formée de la façon que nous auons dict, puisse agir par quelque qualité manife-

ste & cogneüe, parce que ie ne vois point à quelle qualité, ou premiere, ou seconde se peut rapporter le venin, qui sort des semences produictes d'un si fort meslange. l'aduoüe bien qu'elle n'est point spirituelle pour les raisons susdites, mais qu'elle soit cogneüe veritablement il seroit à desirer que Fracastor l'eust nommée.

- M. Je m'estonne comme ces semences se peuuent soustenir en l'air, puisque ce sont corps.
- R. Vous-vous devez estonner encores des oignons & des aux qui prouoquent les larmes de loing, du poivre, & de l'Euphorbe qui font esternuer, du saffran qui fait dormir, & de quelques metaux qui affoiblissent les nerfs, parce qu'il est clair que si le poivre, ou l'euphorbe, qu'on manie quatre pas loing, me fait esternuer, il faut que quelque parcelle entre dans mon nez. Ainsi produisent leurs effects les oignons, le saffran, & les metaux, ce n'est donc pas de merueilles si ces corps (encores qu'ils contiennent en eux des parties pesantes & terrestres, bien que tres-menües & insensibles, la vapeur & l'exhalaison predominant qui sont les corps aériens & ignées) se soustiennent en l'air, & s'ils s'esleuent en hault, ce qui se voit clairement en la fumée, laquelle esleue tout autant de petits corps qu'on en voit aux cheminées; & partant si les vapeurs qui portent ces petits corps s'esleuent de la pourriture pestilente, par exemple d'un infecté, lesquelles esleuées, pour dire ainsi, iusques au plancher de la chambre, de la mesme façon que la fumée, se meüent par apres à costé & en bas, de maniere qu'elles remplissent toute la chambre, l'air de laquelle deuien

par ce moyen pestilent.

M. Croyez-vous que ces semences durent long temps en l'air ?

R. Beaucoup moins qu'en leur fomes, parce que c'est le propre de tout humide qui mouille, ou qui ne mouille point, c'est à dire de l'eauë & de l'air, de desassembler & estêdre, & par cōsequent dissiper & desseicher, comme on voit en vne poignée de poivre subtilement pilée, qui tombe d'enhault, lequel poivre est tellement desvny & desassemblé par l'air, qu'estant auparauant contenu dans vne main s'espend en apres tres-largement : D'où viêt qu'il y a beaucoup plus de danger à conuerser, ou dormir avec les pestiferez, ou se vestir de leurs robes, que d'habiter seulement dās leurs chambres, parce que l'air desseiche ces semences, & les separe en parties indiuisibles, les rend plus petites & plus subtiles, & par consequent de moindre force, comme vne petite estincelle de feu a moins de force qu'une grosse.

M. Si quelqu'un entroit dans la chambre d'un pestiferé sans respirer, croyez-vous qu'il peut prendre la peste ?

R. Il y pourroit estre si peu, qu'il s'en retourneroit sain.

M. S'il y demeueroit long temps sans respirer, comme ceux qui sont dans l'eauë si longuement ?

R. Il pourroit prendre la peste.

M. Comment sans respirer ?

R. L'air entre dans les veines, non seulement par la voye de la respiration, mais encores par les pouls & les pores il entre dans les petites veines, & par

voye de prouignement dans les grandes.

M. Mais celuy qui entre par l'inspiration, sort par l'expiration.

R. Il ne sort pas comme il est entré : parce que ces semences pestilentes pour leur tenacité demeurent attachées aux membres, & aux humeurs, & si par fortune elles attaquent les esprits sans trouuer aucun empeschement, elles font mourir en peu d'heure, parce qu'estant meslées avec les esprits qui courent dans le cœur, elles l'estouffent soudainement.

M. Comment, elle n'attaque pas tousiours les esprits ? i'ay ouï dire que la peste comme les autres venins, a ceste propriété de courir soudainement au cœur ?

R. Plusieurs ont eu ceste opiniõ à cause de la mort soudaine, ce qui a fait croire que le venin, comme ennemy cherche seulement la mort du cœur, comme principe de la vie. Mais tout ainsi que les venins & tous medicamēs ont des proprieté differentes qu'on appelle analogies ou rapports aux humeurs, & aux membres, comme l'agaric avec le phlegme de la matrice ou de la teste, la rhuubarbe avec la bile iaune, & l'hellebore avec la noire ou melācholie, les cantharides avec la vessie, & pareillement plusieurs autres; de mesme ces semences contagieuses & pestilentes ont diuerses & fort estranges analogies : parce qu'on a veu quelquefois la peste s'attaquer seulement aux plātes, quelquefois aux animaux sans raison, & entre ceux-là aux bœufs, aux brebis, & quelquefois seulement aux hommes. Nous voyons semblablement, que quelques maladies contagieuses ont du

rapport à vn seul membre, l'ophthalmie aux yeux, l'alopecie à la teste, & la phtise au poulmon. On trouue des pestes qui attaquent seulement les esprits, d'autres les humeurs, les autres produisent vn accident, d'autres vn autre : la cause desquelles analogies, comme de plusieurs autres, personne ne m'a sceu monstrier encore, comme ie ne les scaurois monstrier aux autres. Qu'en dictes-vous Monsieur Facio?

F. Ie dis la mesme chose, & m'est õne d'vne si grãde ignorance qui se voit en nous, non seulement à trouuer les causes des choses desia dictes, mais encore pourquoy l'aymãt tiré le fer & se tourne vers la tramontane, pourquoy le diamant s'amollit seulement avec le sang de bouc, pourquoy le diamant & l'ambre jaune tirent la paille, pourquoy le lyon animal si courageux craint le coq & son chant, pourquoy l'inimitié de la ruë & du chou est si grande, pourquoy l'or s'imbibe d'argent vif, & non pas d'eauë ny d'huile; pourquoy la catoblepe tuë seulement de son regard, & plusieurs autres effects que nous voyons, la cause desquels nous pouons demãder à Dieu, car luy seul la cognoist. Et Fracastor tourne & retourne à l'entour de ces sympathies & antipathies que les Grecs appellẽt, les admirant plustost qu'il n'en descouure les causes.

M. Retournons ie vous prie à la contagion, que si elle est ou pourriture, ou ne se trouue point sans pourriture, d'où vient que plusieurs maladies qui abondent en pourriture ne sont point contagieuses comme les grandes playes, & les apostemes.

R. Tout homme est bien animal, mais tout animal n'est

n'est pas homme: toute contagion suppose pour-
 riture, mais toute pourriture ne suppose point
 contagion, & particulieremēt de loing, parçē que
 pour faire que la pourriture produise la cōtagion,
 il faut qu'elle puisse produire des semēces, lesquel-
 les ne s'engendrent qu'aux pourritures profondes
 & sales, & qui sont tellement renfermées que les
 vapeurs n'en peuuent sortir, lesquelles venant à se
 mesler longuement ensemble acquierent la tena-
 cité que nous auons dite, & particulièrement aux
 pourritures pestilentes, encore qu'il ne faille pas
 tant d'apprest aux pourritures qui produisent par
 exemple la gale,

M. Je confesse d'auoir ouïy auioird'huy avec grād
 plaisir de tres-belles choies touchāt la contagion.

R. Et pour s'en ressouenir nous auōns dict que la
 contagion est vne pourriture semblable qui passe
 du premier au second en prouignant, cōmençant
 par des parties imperceptibles, & que les differēces
 de la contagion sont principalement trois, la pre-
 miere qui se fait en touchant, la secōde par voye
 de fomes, la troisiēme de loing sans toucher, &
 qu'en toutes les trois differences les semences
 contagieuses qui sortent de ce qui est pourry sont
 la cause efficiente, bien qu'en chasque differences
 elles soient encores differentes comme nous auōs
 monstré, quelle est la contagion qui se fait seule-
 ment en touchant, quelle celle qui se fait par
 voye de fomes, & si les viures peuuent infecter, &
 quelle celle qui se fait de loing, & comme ces se-
 mences entrent dans l'animal, quelles sont leurs
 analogies, & si toute pourriture est contagieuse.

F. Veritablement pour discourir de la peste, ce di-

scours estoit necessaire; & plus ie m'arreste sur la difficulté de ceste matiere, plus il me sēble qu'on n'y sçauroit rien adiouster dauantage. Mais pour retourner au propos duquel le Seigneur Estienne nous a faict destourner auec tant de profit pour ce discours, ie me souuiens que par de certaines experiences, i'alois ainsi montrant la nature de la peste, disant que la peste est vne maladie non seulement commune, mais aussi mortelle, & comprise dans vn petit espace de temps.

R. Et ie vous feis souuenir qu'elle estoit contagieuse, propriété inseparable de la peste.

F. Nostre discours estoit tel, lequel venant à reprendre, ie dis qu'estre contagieuse n'est point condition inseparable de la peste, tant parce que Galien ne la met point en la definissant, comme parce qu'elle n'est point condition essentielle, veu que pour faire qu'une maladie soit appelée peste, il suffit que dās vn ou deux ans, nō seulement plusieurs deuiennent malades, mais qu'une bonne partie meure, comme par exemple si les viures ou les eauës d'une armée estoient empoisonnées, en façon que la plus grande partie mourust, comme il peut estre aduenü & peut aduenir, sans doute on diroit que telle maladie est vne peste, & qu'elle n'est point contagieuse: & nous pouons amener pour exemple celle qui fust en l'armée de M. Anthoine contre les Parthes, rapportée par Apian Alexandrin, en laquelle les soldats furent contraints par la faim de manger des herbes, lesquelles pour leur plus grand malheur estoient venimeuses, qui saisis de fureur mouroient en vomissant. Or ceste peste ny aucune semblable ne peut

estre appellée contagieuse; parce que, comme vous auez monstré, le venin & la contagion sont differens, en ce que ceste-cy prouigne, & celuy-là ne prouigne point, & comme dict fort bien Fracastor, on peult par aduenture dire que ceux qui meurent pour auoir beu du venin sont infectez, mais non pas qu'ils ayent receu la contagion. La terre semblablement par ses tremblemens se peut entr'ouuir, d'où quelques fois sortēt des vapeurs metalliques venimeuses, si abondantes qu'elles en font mourir vne infinité sans contagion, & par la mesme raison on ne nie point la generation de la peste. On peult amener à ce propos la peste qui fut à Rome au Consulat; de M. Claudius Marcellus, & C. Valerius Flaccus recitée par Tite-Liue que vous proposastes hier pour exemple, en laquelle moururent presque tous les principaux de la ville, empoisonnez de leurs femmes, pour vne coniuration qu'elles firent contre leurs maris. Ce qu'estant vray, il faut confesser que ceste peste ne fust point contagieuse. Salo raconte vne peste laquelle fut en Hongrie & en Allemagne sans cōtagion, parce que les hommes mouroient soudainement avec sueür, car ces semences pestilentes n'ayant analogie qu'avec les esprits, ne produisoient aucune pourriture, partant la contagion n'en prouenoit point. On voit dōcques que toute peste n'est point maladie contagieuse.

- M. Toutesfois i'ay tousiours ouï nommer la peste avec ce mot, contagieuse.
- F. Cecy vient, parce que le plus souuent la peste at-
taque les humeurs, & faict pourriture, d'où suit la contagion.

R. Il est vray, & en çecy ie suis d'accord avec M. Facio.

F. Jusques icy nous auons dict que la peste est vne maladie commune, mortelle, & contenuë dans vn petit espace de temps, & le plus souuent contagieuse.

M. Cès autres maladies qui ne sont que trop communes, n'ont-elles point d'autre nom que galantines? car il me semble qu'excepté la mort, elles causent les mesmes accidens que la peste.

F. Vous auez tout à propos touché la difference spécifique, qui distingue la peste d'avec ces autres maladies communes, & ne manqueray point en si belle occasion de vous dire ce que disent Hipp. & Galien, que toutes les maladies se diuisent en deux branches, à sçauoir en maladies esparfes & communes: Les Latins appellent les maladies esparfes, & les Grecs Sporadiques celles qui sont diuerses & differentes, & qui suruiennent en tout temps, comme fiebures quartes, tierces, iournalietes, ephemerres ou dieres, hectiques, hydrophisie, gouttes, difficulté d'vrine, mal de costé, & les autres qui affligent indifferemment les hommes: Communes, vulgaires, & populaires que les Grecs appellent epidemique, celles qui dans les termes d'vne saison, de deux ou plus ou moins ataquēt plusieurs en vne ville & Prouince; de sorte que telle maladie merite bien à propos le nom de commune ou vulgaire, comme sont par exemple les quatre qu'à descrit Hipp. & celles-cy se soustiuisent encores, parce que les vnes sont pernicieuses, & les autres sont salutaires: les pernicieuses sont accompagnées, de la mort de plusieurs,

comme de 60. ou 70. parmy cent malades, & ces maladies sont appellées pestes, comme la nostre, celle de Milan, de Venise, & tant d'autres qui ont esté: les salutaires sont celles qui sont suivies de la mort de peu de personnes, comme toux, catarrhes, flux de ventre, douleur de teste, rougeole, & autres maladies qui affligent la plus part des habitans, avec la mort de bien peu, comme par exemple ce mal galantin qui regne maintenant à Genes, Lombardie, Thoscane, en France, & en Espagne. Je reuiens donc aux maladies communes, & dis, que quelques vnes sont particulieres à vne region, comme la sueur d'Angleterre, les fiebres malignes, qui souloient naistre en Automne, au pays de Pise, & Mareme, le Goëtre en Espagne, les sciaticques aux Africains, comme dict Jean Leon, qui leur viennent de s'asseoir à terre, la cheute des dents pour le trop grand vsage des dates aux Numidiens, la debilité de la veüe aux mesmes, pour l'abondante poussiere que le vent du Leuant esleue souuentes fois, & plusieurs autres maladies qui s'ont particulieres à d'autres pays & Prouinces. Les autres qui ne sont propres à aucun pays, & qui peuuent arriuer en tous, sont la peste & ce mal galantin.

- M. D'où vient qu'aucuns pays sont subiects à certaines maladies?
- F. De diuerses causes, comme d'estre situées sous le Ciel, ou trop chaud, ou trop froid, ou vers le Midy, Septentrion, Orient, ou Occident, ou d'estre exposez à diuers vents, ou situez en hault ou en bas, en terroir pierreux ou marescageux, ou souphreux, ou d'autre mineral, ou pres de la Mer.

ou de quelque riuere, ou contre vne mōtagne, ou pour les coustumes, ou pour la façō de viure, & de se vestir, pour lesquelles differences les pays sont subiects en quelques temps à certaines maladies, que les Grecs appellent *endemi*, ou *endimij*, & les Latins *patty regionales* ou *vernaculi*, desquelles Hipp. discourt diuinement & en peu de paroles: de maniere que toutes les maladies qui arriuent aux hommes sont ou esparfes ou communes: les communes ou elles sont endemiques, c'est à dire propres à vne region, ou epidemiques qui viennent soudainement, & toutes deux ou sont malignes ou salutaires, celles-cy viennent avec l'affliction de plusieurs & la mort de bien peu, & celles-là avec l'affliction & la mort de plusieurs qui sont les pestilentes. Ceste doctrine est d'Hipp. & Galien, receuë de toute l'eschole des Medecins.

R. Je crois la mesme chose, & ne peut on nier que ces fondemens ne soient fort fermez & assurez: mais ie ne crois pas que vous puissiez trouuer la nature de la peste, si vous ne trauallez à la recherche des causes, desquelles ie ne vois point cōment on en pourra discourir auiourd'huy, en sorte qu'il nous reste assez de temps pour visiter ces malades, qui nous ont faict si grād' instance ce matⁱⁿ comme vous scauez.

F. Vous auez raison, ie ne m'en souuenois plus, il est vray qu'ils sont en fort grand danger. Monsieur, demain à la mesme heure nous viendrons assurement continuer nostre discours, s'il vous plaist cependant de nous donner congé pour vne œuure si charitable.

M. Allez, Dieu vous conduise, ne tardez point de grace, puis que le temps que nous auons de reste manque à des malades si affligez.

R. Allons doncques, à reuoir, comme a diét Monf. Facio.

Fin de la troisieme Iournée.

D iij



QUATRIÈME IOVRNEE.

- F. **I**E ne voudrois point estre arriué pour vous destourner de vostre repos.
- M. Assez-vous, Monsieur, si vous ne voulez faire ce que vous craignez d'auoir fait.
- F. O que ces sieges sont propres pour l'apres-dinée.
- M. I'y repose volontiers apres dîner, & quelques-fois i'y dors vn petit, ie ne sçay comment vous en iugez pour la santé.
- F. Ie l'appreue & loüe grandement, specialement pour ceux qui dînent bien.
- M. Pourquoi ? au contraire i'ay oüï dire aux Medecins que le dormir de iour nuist grandement à la santé.
- F. Le dormir, estant couché deux ou trois heures le iour, nuist pour l'ordinaire à tous ceux qui sont subiects aux catharres, & autres maladies de teste, & à qui ne l'a accoustumé : mais reposer vn petit en dormât sur ces sieges vne demie heure, est autât profitable pour la conseruation de la santé, cômme il est dommageable d'aller & s'exercer en quelque affaire.
- M. Vous estes donc bien du guet, vous autres Medecins, avec plusieurs autres, qui sont souuēt pressez d'aller aussi tost qu'ils ont dîné.
- F. Ie pense auoir pourueu à ce desordre en ne dis-

nant point.

M. Quoy? sans manger du tout rien?

F. Je mange quelque peu, comme par exemple la troisieme partie de ce que i'auois accoustumé de manger quand ie disnois, mangeant puis apres mieux le soir, de quoy ic me trouue bien.

M. Je m'en estonne, car il me sèble d'auoir oüy dire, & de l'auoir experimenté, que de manger sobrement le soir fait mieux dormir la nuict, fait que nos sens sont plus esueillez au matin, & aide grandement à la santé.

F. Il sera tousiours profitable à qui a bien dîné, & qui n'a pas par aduétude l'estomach trop bon d'aller au soir legerement au lièt, parce qu'il n'est pas possible qu'il aye suffisamment digeré vn bon repas en l'espace de neuf heures, qu'ordinairement on met entre le dîner & le soupper, & ne chargeant point le soir son estomach, qui n'est pas encores deschargé, il n'est pas malaisé à la nature de digerer la nuict en soupant peu, le dîner qui n'est pas encore digeré, comme il seroit si sur vn bon repas du matin on en mettoit vn autre le soir.

M. Il sera donc plus profitable de manger bien le matin, & sobrement le soir.

F. Il ne s'ensuit pas, parce qu'encores qu'il soit profitable à celuy qui a biē dîné, d'estre sobre le soir, il ne faut pas pourtant conclurre qu'il soit plus conuenable de r'emplir dauantage son estomach au matin qu'au soir, mais bien est-il plus profitable pour la santé, d'estre grandement sobre au matin, & manger dauantage le soir: ce que ie pourrois prouuer par plusieurs raisons, mais ie me contenteray de deux qui sont demonstratiues; la pre-

miere parce que la chaleur naturelle qui est la cause de la digestion, ne digere iamais mieux la viande qu'en dormant, mesmes les veilles & l'exercice empeschent grâdemment la digestion; bien que la distribution de la viande, qui est digerée, & conuertie en sang en soit grâdemment aydée. L'autre, parce que la digestion qui se fait en l'espace de quinze heures, qu'il y a du souper au disner, est bië plus accomplie (c'est la coustume d'Italie) que celle qui se fait en l'espace de neuf heures, qu'on met entre le disner & le souper.

M. Je croyois veritablement que l'exercice déchargeast l'estomach, & prouoquast à bien manger.

F. Vous auez raison, parce que l'exercice est fort profitable, quand il est fait sans violence auant le repas, car le sang venant à se conuertir en chair, laquelle se consume continuellement, les veines par leur action attirent successiuement de l'estomach où l'appetit de manger s'engendre, lors qu'il n'y a plus rien dedans: mais si l'on vient à faire exercice quand il est encores plain, l'aliment sans estre cuit descend dans les veines qui engendre mille maux, si ce deffault n'est corrigé par vne bonne complexion: & partant i'estime que ceux qui mangent plus le matin que le soir font fort mal, mais particulièrement ceux qui embrassent les affaires, ou qui s'exercent immediatement apres le repas.

M. Que croyez-vous de ceux qui sans disner ne mangent qu'une fois en vingt-quatre heures?

F. Paraduenture ceux-cy ont l'estomach tardif à digerer, & font tres-bien s'ils ne ressentēt aucune morsure dās l'estomach, ny tournoyement de te-

ste, ny aucun accident qui prouienne de la faim avec affliction ; encores que la plus grande partie mange quelque peu le matin.

R. Dequoy vous entretenez-vous Messieurs, de manger peu le matin? blasmez-vous parauanture telle coustume?

R. Non, Monsieur, mais plustost Monsieur Facio la loïe, bien qu'il me semble d'auoir ouï d'autres Medecins qui disent le contraire.

R. Pourmoy ie la loïe, & pratique tant que ie puis, & outre que ma vie en reçoit les fruits d'une plus heureuse santé, elle me semble aussi conforme à l'opinion & coustume d'Hipp. & Galien, qui ont esté les premiers Medecins du monde, & de ceux qui les ont suiuis, comme Oddo des Oddes, & Nicolas Ballian ont fait voir par leurs honorables traux.

F. Ie ne crois pas qu'on puisse tenir meilleure voye pour se cōseruer, ny opinion meilleure que cellecy, quoy que Pierre d'Arbane, Hierosme Cardan & quelques autres se soient efforcez de la rejeter.

M. I'ay eu d'autant plus agreable ce discours touchant le manger plus sobrement au matin qu'au soir, que ie vois qu'il est autremēt entendu & pratiqué en ceste ville, & peut-estre avec non moins de dommage que de la vie des hommes. Mais retenons de courtoisie là où Monsieur Facio nous promet hyer de traicter des causes des malades esparfes & communes pour entendre plus auant la nature de la peste.

F. Vous auez bonne memoire Monsieur, & pour m'aquitter de ma promesse, ie dis que la cause des maladies esparfes & communes est écrite par

Hipp. difant, que toutes les maladies arriuent pour deux caufes, à fçauoir, pour la façon defreglée de viure, & pour la malice de l'air, & monstre le moyen de les cognoiftre en cefte maniere. Quand plusieurs en mefme temps deuiennent malades d'une mefme maladie, de telle forte que l'on cognoift que la maladie eft commune, alors on tient que la caufe eft commune, & celle-cy eft l'air que nous respirons tous efgalement : mais quand les maladies font diuerfes, & efparses, quoy qu'en mefme temps, il faut iuger que le defordre de la nourriture, qui eft different en chacun, en eft la caufe. D'où felon l'opinion d'Hipp. on voit clairement que l'air eft la caufe de toutes les maladies communes & populaires.

R. Je vous attendois tout à propos fur ce paffage; car il femble veritablement qu'Hipp. l'efcrit de la forte; mais prenez garde que ce fecond liure n'eft point de luy, comme Galien le remarque, lequel reprouue mefme cefte opinion, amenant outre l'air plusieurs autres caufes des maladies communes & populaires, donnant l'exemple des Habitans d'Eno pays de Trace, lesquels pour la neceffité des viures conuenables, fe nourriffants de legumes & d'herbes tumberent en vne foibleffe de jambes, & de genoux, comme raconte Thucide. Il allegue pareillement d'autres peuples, lesquels contraincts par la famine de manger du grain à demy pourry, deuiendrēt presque tous malades. Il rapporte encores qu'une armée empoiffonnée par l'vfage de l'eau fut toute accablée de maladie: & ie pourrois amener des exemples femblables, moins efloignés; en quoy nous voyons

que non seulement ceste opiniõ n'est point d'Hippocrate, mais qu'elle est manifestement faulſe.

F. Je crois que vous auez raison, encores que Galien l'attribuë à Polibe, escolier d'Hipp. & qu'il recommande fort ce passage qui s'accorde assez bien avec son art, auquel Hippocrate distingue les maladies populaires des espartes, qui est tout à propos le lieu où ceste opinion est escrite, & partant il l'a voulu cõmenter, ce qu'il n'a point voulu faire aux liures des maladies populaires, entre lesquels il a seulement commenté le premier, & le troisieme, comme enfans legitimes d'Hipp. & entre le deuxiesme, quatriesme & sixiesme ce dernier seulement comme luy plaisant d'auantage, car il tient que Tessalus fils aisné d'Hippoc. le composa non de son inuention, mais de la doctrine de son pere qu'il treuua escrite dans des peaux ou membranes, y adioustant beaucoup du sien. Pour le cinquiesme, il croit qu'il est de Draco fils puisné d'Hippocrate, encores qu'apres le mesme Galien condamne le quatriesme, cinquiesme & septiesme comme bastards, tout à fait indignes de sa doctrine, & de son nom, croyant aussi pour legitimes les liures des prognostiques, des aphorismes, de l'air, des eaux, & des lieux, & de la maniere de viure aux maladies aiguës: encores que quelques-vns comme remarque Galien, Soranus, & Montanus ayent voulu dire qu'Hippocrate retira ce dernier de la Librairie des Gnidiens, le chargeant faulſement de l'auoir bruslée, & pource d'auoir quitté son pays. Mais laissons à part la consideration touchant les liures legitimes d'Hippocrate, desquels vous

m'avez fait ressouvenir avec beaucoup de plaisir, puis que nous discourons ensemble des choses qui appartiennent à la Medecine, en laquelle l'authorité d'Hip. Prince de tous les Medecins par la confession de tout le monde, doit estre receuë de nous comme d'un oracle, comme aussi Galien & tous les Medecins successivement l'ont receuë.

R. Voilà qui va bien, mais l'authorité ne peut estre d'Hippocrate, puis que le liure n'en est point.

F. Je suis d'avec vous, que l'opinion n'est point d'Hippocrate, & qu'elle n'est pas entierement veritable, encores qu'elle le soit en la plus grande partie des maladies populaires, auoiant que quelques-vnes ne viennent point de l'air. Mais ie ne pense pas qu'aucun Medecin puisse nyer que toutes les maladies communes n'ayent leur cause commune, parce que ceste opinion qui est vnaxiome en la Medecine n'a pas seulement esté prononcée d'Hippocrate, mais encores recommandée & receuë de Galien, & puis souscrite de toute l'Academie des Medecins de la plus grande & moindre reputation, anciens, modernes, Grecs, Arabes, & Latins: Ruffus, Paulus, Aëtius, Oribasius, Auicenne, Rhafis, Mesüe, & pour dire dauantage, de François, Piemōtois, Celse, Fernel, Montan, Fracastor, Falope, & finalement presque de tous les autres, desquels ie ne me ressouuiens point, lesquels tous d'une voix sans aucune condition posent ce principe en la Medecine, que la maladie commune est produite d'une cause commune, de la meisme sorte que le Geometre tient pour preuue que le tout est plus grand que sa partie; & quiconque oseroit nyer ce principe de la

Medecine, pourroit aussi nyer cestuy-cy de Mathematique.

R. Il me semble neantmoins qu'il y a quelque difference entre ces deux principes, car celuy de Mathematique se preuue par les sens.

E. Il est vray qu'il y a de la difference, parce que la Medecine & la Geometrie sont aussi sciences differentes, & celle là ne peut auoir ses principes si sensibles comme celle-cy. Mais le principe de la Medecine est aussi constant à l'endroiçt du Medecin, comme celuy de la Geometrie à l'endroiçt du Geometre; & si le Geometre prouue le sien par les sens, le Medecin preuue semblablement le sien par experiences presque sensibles, car ramenant toutes les maladies communes, montre sensiblement que toutes ont leur cause commune, ou qu'elles naissent de l'air, ou des figures celestes, ou de quelque erreur commune qu'on aura non seulement commise au manger & boire, mais encores au veiller & dormir, en l'exercice, & au repos: quant aux affections ou passions de l'ame, & à l'euacuation ou retenuë des excremens, ie ne crois pas qu'aucune maladie commune en puisse arriuer; Mais comme d'un exercice immoderé, vne armée où tout vn peuple se peut tellement trauailler, que la plus grande partie deuienne malade, de mesme par l'oyssiueté vne multitude nourrie en l'exercice se peut si fort relascher, & affoiblir, que toute la plus grãde partie en tombe malade, & n'est pas impossible qu'une armée en campagne, ou bien vn peuple, qui deffend son pays, soit pressé de l'ennemy iour & nuict, en façon qu'il soit cōtrainct de veiller si longuement,

que quelque indigestion ou maladie commune en suruienne: quât au trop dormir qui n'est point contrainct, ie ne pense pas que telle chose en arriue; mais bien que ces communes maladies arriuent rarement de trop grand exercice, d'oyfiueté, & de trop veiller, parce que ces causes communes suruiennent aussi bien peu souuent. Mais qui se voudroit travailler apres l'Histoire, peut-estre en trouueroit-il quelque exemple: mais quât au manger & boire par excés, les Histoires en sont toutes remplies, & comme plusieurs maladies communes en sont proueuës, car il est plus facile qu'vn peuple deuienne malade de trop manger & boire, que pour l'exercice, l'oyfiueté, ou veilles immoderées.

M. Vous auez l'exemple que Monsieur Ratto a allegué tantost.

F. Bien; non seulement ceste maladie commune que Galiē dit estre auenuë en Eno pour la cherté des viures conuenables, mais encores plusieurs autres ont esté produites pour semblable cause, comme la peste de Rome durant le Consulat de P. Curiatius, & S. Quintilius; & vn autre du tēps de M. Fossius, & Sergius Fidena; & ceste autre du temps de Q. Fabius Ambustus, & C. Furius Pacilius, sans celles que Plutarche recite de l'armée d'Alexandre, & celles qu'Apian Alexandrin escrit de l'armée d'Asdrubal contre Massinissa, & de l'armée de Mithridates pressé par Luculle. Ie laisse à part celle de l'année 1316. qui affligea l'Allemagne, la Frise, & la Flandre que ie me souuiens d'auoir leuë dans Tracagnote, & plusieurs autres qu'on peut lire dans les Histoires anciennes & nouvelles

uelles, parce que les corps humains estans accoustumés à se nourrir de viures conuenables, s'ils s'ont contraints durant quelque temps, de se nourrir de mauuais aliments, il est necessaire qu'ils se remplissent d'opilations, & d'humeurs vicieuses, & faciles à se pourrir, d'où necessairement viennent les maladies communes, lesquelles se peuuent aussi bien produire du mauuais breuuage, que des mauuaises viandes, comme celle que recite Sabellicus qui ruina l'armée de Venise en l'année 1165, les eaux estant empoisonnées par Emanuel Empereur de Constantinople, & semblables exemples, qui ne manqueroiēt point, à qui se plairoit de considerer les guerres passées. Mais il est bien vray que la plus grande partie des maladies communes, viennent de l'air, pour être, entre les autres causes, tres-facile à recevoir toutes impressions; veu que nous voyons avec quelle soudaineté il est eschauffé du Soleil & du feu, & avec la mesme rafraischi de la Tramontane: Et les draps de toute façon tesmoignēt combien il s'humecte & desseiche facilement, lesquels en temps humide pesent beaucoup, & en temps sec ne pesent pas la moitié tant: Et les bois des portes & fenestres semblablement, lesquels croissent par l'humidité de l'air, & diminuent par sa secheresse. Dauantage, outre que l'air reçoit aisément toutes impressions, il entre continuellement dans nos corps par l'inspiration, par les pouls, & les pores; & comme il arriue dans nous, il attaque aussi tost le cœur & le cerueau, premieres & principales parties de la vie humaine, en façon qu'il altere & charge nos corps admirable-

ment entre les six choses que les Medecins appellent non naturelles; & parmi cent maladies communes, l'air en cause pour le moins 90.

M. Veritablement on voit qu'il se change souuent, & facilement.

F. Comme souuent? presqu'à toute heure: car estant de iour en son estat naturel, sans estre attaqué d'aucune nouvelle alteration, il se change quatre fois seulement par le mouuement diurne du Soleil, l'air du matin estant different de celuy de midy, & cestuy-cy de celuy du soir & de la nuit. D'auantage les quatre saisons de l'année se forment du propre mouuement du Soleil; car de son esloignement trop grand, l'air deuiet froid & humide; de son trop grand voisinage, chaud & sec; & d'vne moyenne qualité, de sa moyenne distance.

M. I'ay ouy souuent & diuersement discourir de ces saisons de l'année: & si entre cent maladies communes les nonante comme vous aués dict viennent de l'air, estant la peste vne maladie commune, il me semble que parlant de l'air l'on failliroit grandement, si l'on n'en disoit quelque chose en passant.

F. Je diray en peu de mots ce que i'en sçay. Veritablement les anciens ont discouru diuersement des saisons de l'année, & les Astrologiens & Medecins avec quelque difference; ceux-là font quatre saisons esgales, faisant que le Printemps commence quand le Soleil entre au Belier; l'Esté, quand il entre en l'Escreuiffe; l'Autōne, quand il entre en la Balāce, & l'Hyuer au Cheurecorne. Mais les Medecins plus curieux en l'observation

des alterations & changemens de l'air, ont diuisé l'année fort diuersement, & entre-autres Galien, Auicene, Montan & plusieurs autres en ont escrit. Et encores que long-temps auant Hippocrate, l'année fust diuisée en deux membres seulement marqués par les deux Solstices, neantmoins elle a par apres esté diuisée non seulement en quatre, mais en sept parties, separant l'Esté en deux, & l'Hyuer en trois, laissant le Printemps & l'Automne sans diuision. Le Printemps d'un cōmun accord dure presque deux mois commençant à l'Equinoxe, c'est à dire l'onzième ou douzième de Mars, iusques au leuer des Pleiades ou Vergilies qui se leuent le sept ou le huit de May; de façon que le Printemps est compris dans l'espace qui se treuve lors que le Soleil entre au premier poinct d'Aries, iusques à ce qu'il entre dans les Gemeaux: l'Esté commence à la naissance des iudictes Estoiles iusques au leuer d'Arcturus, qui est douze iours auant la venuë de l'autre Æquinoxe, c'est à dire du commencement de May, iusques au commencement de Septembre; de maniere que l'Esté dure quatre mois, lequel les anciens ont diuisé en deux parties, l'une est appelée des Grecs, Ora, qui est celle en laquelle meurisissent les fruiets qui sont meurs auant la saison, que les Latins appellent Præcocés & Horarij, qui meurisissent auant le Solstice qui se faict le 12. ou le 13. de Iuin. L'autre est appelée des mesmes Grecs Opora, qui est celle en laquelle meurisissent les fruiets qui se gardent plus long temps, & dure tout l'espace qui se treuve depuis le Solstice desia dit iusques au leuer d'Arcturus, & comprend les

iours caniculaires qui commencent lors que le Soleil entre au Lion, l'onzième ou douzième de Juillet. L'Automne dure iusques au coucher des Pleiades, c'est à dire du leuer d'Arcturus iusques à ce que le Soleil entre au Sagittaire le 8. ou 9. de Nouembre. De maniere que l'Automne dure autant, ou peu d'auantage que le Printemps. L'Hyuer apres dure plus que l'Esté, & commence au temps que les Pleiades se cachent iusques à l'Equinoxe du Printemps, c'est à dire du commencement de Nouembre iusques à l'onzième ou douzième de Mars. Ceste saison a esté diuisée par les anciens en trois parties, la premiere est appellée des Grecs *Spora*, des Latins *Semencita*, en laquelle on seme; la seconde *Brumale* qui est celle en laquelle les plus grands froids regnēt; la troisieme *Fitalia*, c'est à dire temps de planter les arbres; la premiere va iusques au Solstice froid enuiron le 13. Decembre, la seconde iusques au temps de planter, la troisieme iusques à l'Equinoxe premier, c'est à dire au dix ou vnzième de Mars, adioustant toutesfois à nostre discours les dix iours qu'on a ostés par le Calendrier du Pape Gregoire. D'où l'on voit à combien d'alterations l'air est subiect, passant d'un extreme chaud à un extreme froid, & de cestuy-cy à celuy-là, faisant le mesme entre l'humide & le sec.

M. Veritablement ceste diuision de l'an me semble fort agreable; & sans quitter vostre discours, ie vous supplie de dire deux mots de la qualité de ces saisons.

F. Tres-volontiers; car discourir des diuerses qualités des saisons, ce n'est point quitter le dis-

cours de la peste, ains y sert grandement, comme aussi à toutes autres maladies populaires: & premierement, si nous considerons la cause de tant de mutations, selon l'opinion generale de tous les Philosophes & Medecins, elle n'est autre que le Ciel avec ses Estoilles errantes, & fixes, du mouuement desquelles, & particulierement du Soleil, viennent ces varietés. Et mesmes Aristote veut que les corps cœlestes avec la chaleur qui prouient de leur mouuement, gouernent ce monde inferieur; bien que Auerroës & les autres qui ont expliqué Aristote y adioustent la lumiere de toutes les Estoilles, & particulierement du Soleil, duquel les rayons de soy-mesme, & par leur reflexion eschauffent l'air, comme il semble qu'il vueille dire: lesquels rayons sont de ceste nature, que plus ils frappent perpendiculairement, plus ils eschauffent; & plusieurs voulants rendre raison de cecy ont estimé fort iudicieusement que ces rayons frappans sur des corps solides, comme l'eau & la terre indirectement comme sous l'Equinoxe, font des angles par leur reflexion, parce que s'ils descendoient directement sur nostre teste, comme ils font à ceux qui vivent sous la Zone torride, ils ne pourroient faire des angles, ains se redoublant & reflechissant en eux mesmes deviendroient si espais qu'ils enflammeroient merueilleusement l'air. Mais s'ils ne frappent point directement sur nostre teste, ou ils sont proches, ou esloignés de la rectitude, si proches ils font les angles aigus, si moins proches, moins aigus, s'ils sont esloignés, ils les font obtus, ou moullés. D'où vient que le Soleil s'approchant de nostre

Q V A T R I E S M E

teste en Esté, les rayons font les angles aigus, pour dire moins obtus ou mouffes, en façon qu'ils retournent presque en eux mesmes, & deuiennēt plus espais, & par consequent l'air s'eschauffe & desseiche. L'Automne semble froid & sec, parce que le Soleil s'estant desia beaucoup esloigné de nous, les rayons duquel faisoient les angles plustost droicts qu'aigus, l'air qui estoit tres-chaud, commencent à deuenir moins chaud; par comparaison nous semble froid, comme l'eau tiede semble froide à celuy qui a accoustumé de pescher en eau bouillante; & l'air de l'Automne se refroidit d'autāt plus facilement qu'il est alors rare & subtil, comme l'eau qui se glace plustost estant chaude que froide: & n'estant suruenu aucune cause d'humidité, la seicheresse imprimée en l'air par la grande chaleur de l'Esté regne tousiours; & le Soleil reculāt vers la partie qu'on appelle Tropicque de Cheurecorne (où se forme le Solstice, outre lequel le Soleil ne s'esloigne plus de nous) l'air qui estoit comme tiede & nous sembloit froid, commence de paroistre, & d'estre extremément froid, parce que les rayons du Soleil descendans vers nous fort de trauers font leurs angles si obtus qu'ils nous priuent de chaleur: & pour ceste occasion la faculté de consumer & resoudre les vapeurs desia esleuées, & qui s'esleuent continuellement en la moyenne region de l'air venant à failir, les pluyes suruiennent, & partant on peut appeller ceste saison non seulement froide, mais humide. Le Soleil par apres retournant vers nous, il est necessaire qu'une si grande froidure se tempere, en façon que l'air qui estoit extremément

froid semble quelque peu chaud. Mais la chaleur du Printemps n'estant point si grande que celle de l'Esté, elle ne peut pas consumer toute l'humidité engendrée en Hyuer, en façon que le Printemps ne reste yn peu humide, bien que la seconde partie qui voisine l'Esté ne le soit pas tant que la premiere qui touche l'Hyuer: c'est pourquoy Hipp. Arist. Teophraste & les autres ont estimé que le Printemps est chaud & humide.

- R. Il semble neantmoins que Galien dict le contraire.
- F. Certainement on ne peut pas nier que le Printemps & l'Automne, qui sont deux saisons logees entre deux extremes Hyuer & Esté, ne soient beaucoup chauds, beaucoup froids, beaucoup humides, & beaucoup sec; mais ils ont du temperé par la participation de leurs extremes, encorres que le Printemps en son commencement participe à l'humidité de l'Hyuer, & qu'il semble pour cela qu'il panche du costé de l'humide, plutost comparé à l'Automne qu'à soy mesme; parce que s'il estoit chaud & humide, il seroit la pire saison de l'année estant la plus saine.
- R. Je ne scay comment on peut dire que l'Automne soit temperé, puis qu'Hippocrate le blasme tant.
- F. Vous aués raison. Parce qu'encorres que l'Automne semble estre temperé, n'estant pas si chaud que l'Esté, ny si froid que l'Hyuer, Galien toutesfois nous fournit quatre ou cinq causes de sa mauuaistié. La I. que c'est le propre de l'Automne d'estre inegal, ce qui se voit quand en yn mesme iour maintenant le chaud, & tantost le froid.

nous molestent. Et i'estime qu'une telle variété vient du despart du Soleil, pour laquelle les vapeurs prennent plus de force, n'estant pas si propres à estre consommées, & resoutes comme en Esté, ceste variété estant plus dommageable aux lieux plus bas & humides, qu'aux secs & pierreux; parce qu'à Genes, par exemple, l'Automne le plus souuét est egal en façõ qu'on appelle en proverbe commun l'Esté saint Martin, le mois qui precede ceste feste. La deuxiesme cause allés puissante de la mauuastie de l'Automne vient de ce qu'il succede à l'Esté, auquel s'engendrent plusieurs humeurs bilieuses & bruslees, qui sont les plus dangereux ennemis que nous ayons dans nos corps. La 3. qui fauorise la 2. est qu'en Esté les mauuaises humeurs s'exhaloient par la peau, laquelle estant ferrée par le froid de l'Automne, elles se renferment avec vn domniage incroyable. La 4. parce que l'Automne treuve nos corps affoiblis par l'Esté, ces quatre causes sont communes à tous. La 5. regarde seulement ceux qui mangent quantité de fruiçts, les corps desquels sont remplis d'humens superflus en Automne, que lesdicts fruiçts ont engendrees; Pour laquelle cause, bien que l'Automne soit vne saison temperee de soy-mesme, comme le Printemps, toutesfois pour les causes susdites qui presque toutes regardent nos corps, il deuient tres-mauuais, comme assurent non seulement Hippocrate & les autres Medécins, mais encõres Aristote & tous les Philosophes.

R. Celuy-là paraventure ne meritoit aucun blâme, qui diroit que l'Automne est dangereux &

mauvais, non seulement eu esgard à nous, mais encores à soy-mesme, estât plus froid que chaud; outre qu'il est plus sec qu'humide, parce que le Soleil est plus esloigné en Automne qu'au Printemps, & les nuits sont plus longues en ceste saison là, qu'en ceste-cy; outre que l'air de l'Automne estant plus rare, se refroidit plus promptement: l'Automne doncques ne meute en aucune façon le nom de temperé, comme le Printemps.

M. Si l'Automne est blasmable, parce que les corps se treuvent remplis de mauvaises humeurs engendrées en Esté, pourquoy est-ce que le Printemps ne sera pareillement mauvais, s'il se treuve avec les corps remplis d'humiditez, engendrées en Hyuer?

F. Auicenne respond à ce doute. si bien ie m'en ressouviens, disant, que le sec & l'humide confidez comme qualitez, qui suruiennent à l'air, sont (comme le froid & le chaud,) pretique habitude & priuation, l'Automne est sec, à cause de la priuation de l'humidité, qui arriue en Esté, & ne suruenant aucune humidité, il demeure sec, comme l'air de l'Hyuer seroit tousiours froid si le Soleil ne s'approchoit iamais. Le Printemps ne doit point estre humide pour deux causes, Premièrement, parce que le Soleil s'estant desia fort auâcé, vient à le dessecher. Dauantage, l'humidité dure presque autant que les causes qui humectent & mouillent se maintiennent, & partant les longues pluyes & vapeurs de l'Hyuer venant à manquer, l'humidité manque aussi, ce que l'on cōnoist par experience, car les choses seches ne s'humectent point en vn air chaud ou froid, mais les hu-

mides se desseichent; & le sec estant naturel à l'air s'y affermist tousiours, & n'en part iamais si quelle cause ne survient pour l'humecter: laquelle estant partie le sec reuient incontinent, & ce qui s'euapore au Printemps le Soleil le resoult. D'où l'on voit que le Printemps a du temperé, parce que son commencement qui confine à l'Hyuer panche aucunement à l'Humide; & ne semble pas à propos que le Soleil, quoy qu'il se soit approché, l'aye peu resoudre si promptement: Et quoy qu'on dise que l'Esté est chaud & sec, l'Hyuer froid & humide, le Printemps tēpere, & l'Automne froid & sec (parlant tousiours de ces saisons considérées en leur temperament naturel) neantmoins ils ne sont point tels esgalement, parce que par exemple la premiere partie de l'Esté qui arriue iusques à my-Iuin, n'est pas si chaude comme celle qui atteint la my-Aoust, ny la troisieme comme la seconde, encores que la troisieme soit plus seche que la premiere ny la seconde; & les autres saisons sont differentes en la mesme façon; On voit doncques comme l'air est subiect à vn continuel changement.

- M. Je ne puis entendre que le Printemps soit si temperé & si sain, si d'un autre costé nous voyons qu'en ceste saison tout le monde deuiet malade.
- F. Ceste difficulté est vne de celles qui ont esmeu Galien, à laquelle luy-mesme respond, disant, que ces maladies ne viennent point au Printemps, leur cause estant engendrée aux autres saisons, renfermée par le froid de l'Automne & de l'Hyuer, & esmeuë par la chaleur du Printemps: c'est pourquoy certaines maladies naissent en ceste saison;

qui sont propres aux autres.

R. On pourroit par aduantage dire le mesme de l'Automne, qu'il produit les maux dont la cause s'est engendrée en Esté.

F. En cecy, on peut dire qu'ils se ressemblent, mais ils sont differens en autres choses, parce que l'Automne & les autres saisons produisent des humeurs qui sont cause des maladies mortelles; mais le Printemps ne produit aucune humeur mauuaise, ains il deliure les membres de la vie des humeurs pernicieuses, qui ont esté produictes aux autres saisons, les renuoyant à la peau, aux ioinctures, & autres lieux ignobles: C'est pourquoy on ressent plustost au Printemps des douleurs de ioinctures, gales, lepres, qu'aucune autre maladie, comme il arriue, dit Galien, à celuy qui s'exerce estant plein de mauuaises humeurs.

R. Vous me faictes ressouvenir d'une autre difference escrete par Galien, que si vn corps estoit pur & net des humeurs, il ne receuroit aucune incommodité du Printemps, quoy qu'il fust offensé des autres saisons, au moins en receuant de l'Automne des humeurs melancholiques, de l'Hyuer des phlegmatiques, de l'Esté des bilieuses & brûlées.

M. Bien que les maladies du Printemps ne soient point causées par luy-mesme, ne doit-on point pour cela practiquer aucun remede en ce tēps-là?

R. Auicenne n'en croit point de plus grand que tirer du sang, purger, manger & boire sobrement.

M. Dictes ie vous prie les maladies qui viennent des autres saisons.

F. Hippocrate les décrit, à sçauoir en Esté fieures

continuës, ardantes, tierces, grands vomissemens, fluxions, mal d'yeux, sueurs, douleur d'oreilles, ulcères en la bouche, & aux parties de la generatiõ, & autres semblables, lesquelles sont produites ordinairement des humeurs bilieuses qui regnent en ceste saison. En Automne, outre plusieurs de celles-cy, naissent encores les fiebres quartes, errantes, enflures de rate, hydropisies, fiebres hectiques, difficulté d'vrine, sciaticques, schinancies, difficulté de respirer, douleurs des boyaux, le hault mal, manies, melancholies, & autres que l'humeur melancholique produit d'ordinaire en ceste saison. En Hyuer mal de costé, inflammation de poulmons, pesanteur & douleur de teste, & des lombes, tournoiemens de teste, gouttes & autres maladies, que l'humeur phlegmatique fait regner en telle saison.

M Mais nous ne voyons pas que chacun soit travaillé de ces maux en ces saisons là?

F. Vrayement il ne faudroit que cela, que tous ou la pluspart sentissent ces infirmités; lesquelles comme dict Galien, ne sont communes qu'à raison de leur cause efficiente, qui est l'air commun, & non point parce qu'elles en affligent plusieurs, voire mesmes personne n'en seroit offensé, si tous estoient de bonne complexion & d'age robuste, & qu'ils ne manquassent point aux reigles qui appartiennent à viure sainement. Mais d'autant que les hommes sont de diuerses complexions, les coleriques ou bilieux sont offencez de l'Esté, les trop phlegmatiques de l'Hyuer, les trop melancholiques de l'Automne. Outre, que ceux qui sont de bonne complexion, ont au reste la teste

débile, les autres l'estomach, les autres le foye, & par ainsi de main en main, il s'en trouue bien peu à qui le Ciel aye fait la faueur que de leur donner vne complexion entierement bonne. Dauantage, nous ne viuons pas tousiours en vn aage vigoureux & florissant, parce que les petits enfans sont subiects aux ylcères de la bouche, aux vomissemens, à la toux, à des frayeurs, aux grandes veilles, aux inflammations du nombril, & humidité d'oreilles, & quand les dents leurs sortent, ils sont subiects à d'autres infirmités, & ainsi des autres âges, & les vieillards ont leurs propres maladies, lesquelles tourmentent la dernière & decrepite vieillesse, si elles espargnent la première, dequoy Hippocrate & Galien discourent amplement: & quand chacun seroit de tres-loüable complexion, qu'il nasquit & vescu en vn aage tres-vigoureux, & tres-florissant, les fautes lesquelles nous commettons presque par necessité en la maniere de viure ne manquent point, laquelle maniere de viure consiste aux six choses que les Medecins appellent non naturelles: Je ne dis pas pourtant qu'il soit impossible d'estre exactement réglé au manger & boire, en l'exercice & au repos, au veiller & dormir, & ainsi des autres, mais ie crois bien qu'il est si difficile d'estre tousiours sur la regle, qu'il tient de l'impossible.

M. Et quoy, ces saisons sont-elles destinées à ne faire que du mal? nous voyons toutesfois que plusieurs se portent bien?

F. Elles font beaucoup de bien, voire mesmes les biens qui en prouiennent surpassent sans comparaison les maux, moyennant qu'elles se tiennent

en leur estat naturel ; & Hippocrate & Galien tiennent que les mutations naturelles des saisons ne guerissent pas moins les maladies qu'elles les causent, parce que l'Automne, qui semble la pire, modere avec sa froideur le feu de l'Esté precedēt, outre que les corps, qui durant l'Esté auoient leur chaleur esparse, & qui à ceste occasion ne faisoient pas bien la digestion, & qui sembloient estre sans appetit, & languissans, commencent en Automne de l'auoir plus viue & serrée, à faire bonne digestion, à sentir l'appetit, & non la lāgueur de l'Esté: en apres la chaleur naturelle croist en Hyuer à cause du froid qui la pousse dans le centre, & partant la digestion se fait fort bien, les superfluitez sont consommées, & les corps deuiennent tresgaillards : Le Printemps, dict Hippocrate, fait le mesme, & mieux encores, parce que outre l'assistance merueilleuse que la chaleur naturelle reçoit de la chaleur diuine & temperée, les corps se nettoient des extremēs qui se sont amassez en Hyuer ourant les pores, & consommant & digerant. L'Esté suit par apres qui les ouure dauantage, & fait que les choses superfluës sortent plus commodément, les humeurs froides & humides se consomment ; & ceux qui ont la chaleur naturelle foible & languissante, reçoient en Esté vn notable secours, comme les vieillards, les complexions froides & humides. De mesme les ieunes, ceux qui sont de moyen aage, & les cholériques se portent fort bien sur la fin de l'Automne, en Hyuer, & au commencement du Printemps: & les enfans, & ceux qui approchent de la vingtiesme année iouissent d'vn pareil benefice au

Printemps, & au commencement de l'Été.

- M. Voila qui va bien : mais dites-moy de grace, pourquoy les maladies qui viennent des saisons de l'année n'affligent point tout le monde, puis que l'air est commun à tous ? Vous ne m'avez point encores satisfait en cecy.
- F. Ceste difficulté est de mesme nature que celle qui me meust contre l'opinion de tous ceux qui pésent que la peste qui nous afflige maintenāt ne vient point de l'air; & ie sçay biē que chacun sera satisfait de ceste responce, que les maladies des saisons de l'année ne viennent point à tous, encores qu'elles naissent de l'air qui est commun à tous, mais seulement aux corps qui sont plus disposez à les recevoir; laquelle disposition prouient non seulement des fautes que nous faisons à nous nourrir, mais encores de l'aage & de la complexion; Laquelle responce suffiroit à ceux qui m'ont proposé la difficulté de la peste, si l'opinion de la pure contagion n'estoit si enracinée : mais ie vois bien que pour l'arracher il fault des arguments extraordinaires, & tres-forts.
- M. Je les attends avec vn extrême desir: mais dites-moy ie vous prie, si vous estimez que ces années-là soient bonnes & saines, aux saisons desquelles les maladies desia dictes suruiennent.
- F. Oüy, Monsieur, parce que c'est vne chose vaine que d'attendre en ce monde aucune saison sans maladie, encores que toute l'année soit la plus saine qui pourroit estre.
- M. En quelle façon nous pourrions-nous représenter vne année saine?
- F. Hippocrate & Galien la descriuent en ceste fa-

ste façon : si l'on ne se fait aucune conionction de
 Planettes au Ciel qui soit importante, & qu'il
 pleue conuenablement en Automne, & oportu-
 nement au Printemps & en Esté, les saisons de-
 meurans au reste en leur nature; & comme dict
 Auicenne, si l'air est sans vapeurs & sans fumées,
 avec vn Ciel libre & ouuert, il est raisonnable
 qu'une telle année soit appelée saine, & avec tout
 cecy, il n'est pas possible de faire que les susdites
 maladies ne suruiennent. Il est vray, comme es-
 crit Galien, que nous apprenons par l'experience
 & par la raison, que l'année passant de ceste sorte,
 il n'y a aucun danger de peste ny d'autre maladie
 populaire, encores que les autres maladies espar-
 ses ne manquent iamais, lesquelles ne meritent
 point d'estre mises en consideration qui regarde
 le bien public, si les fautes qu'on commet en la
 nourriture ne sont notables & bien grandes.
 Mais si par hazard l'année ou les saisons sortent
 de leur nature, on ne seuroit croire combien l'air
 apporte de dommage à nos corps, & combien cet
 ennemy des hommes est peu cogneu: si doncques
 par exemple l'air de l'Esté estoit plus chaud & sec
 qu'il ne fault, les maladies de ceste saison se mul-
 tipleroient, & ainsi les autres, si les qualitez de
 leurs saisons outrepassoient leurs bornes. Mais si
 elles se peruertissoient de sorte que l'Esté qui doit
 estre chaud & sec, sans vapeurs & fumées fut froid
 & humide, vaporeux & fumeux; qui doute qu'il
 ne fust necessaire que la santé des corps se peruer-
 tisse: & ce peruertissement seroit encores l'appa-
 rant il ne passoit point quinze ou trente iours:
 mais venant à continuer vne saison entiere, il faut
 que

que la vie des hommes reçoive vn notable dommage ; & le dommage croist merueilleusement si apres le détraquement d'une saison , celui d'un autre vient encores : c'est alors que les maladies populaires se font sentir, lesquelles battent & affligent vne bonne partie des habitans du lieu, où regne vn tel desordre. Considerez maintenant, Messieurs, l'accroissement des maladies populaires, si ce desordre duroit vn an entier.

M. Representez-nous s'il vous plaist, vn de ces détraquemens.

F. I'en pourrois représenter vne infinité, mais les quatre d'Hipp. iuffiront: si l'Hyuer dit-il estoit fort sec regnant la Tramontane & le Printemps pluvieux, avec les vents Meridionaux, l'Esté suivant les fiebres aiguës, le mal d'oreilles, & les douleurs des boyaux arriuent. La seconde, si vn Printemps sec & Septentrional succede à vn Hyuer austral & pluvieux, les femmes produisent leurs enfans foibles, si elles ne les perdent: les autres sont trauaillez du mal des yeux, difficulté de boyaux, & les vieillards de fluxions mortelles. La troisiéme, si l'Esté est sec & aquilonere, l'Automne par apres estant pluvieux & meridional, les douleurs de teste, les toux, les pesanteurs & autres maux regnent en Hyuer. La quatriéme, si à vn Esté sec vn semblable Automne succede, ceux qui sont humides, & les femmes ressentiront du secours; mais les autres, des maladies des yeux seches, fiebres aiguës & longues, & autres que la bile noire a accoustumé de produire, & Hippo. & Galien donnent la raison pour laquelle les susdites maladies viennent de telles saisons: mais, ie ne

tairay point comme Galien escrit, que ces saisons n'ont point esté obseruées en pratique par Hippocrate : mais que guidé de la raison naturelle, affinée & subtilisée par d'autres obseruations, il a iugé que les susdites maladies pourroient venir de telles saisons. Je me souuiens aussi, touchant ce qu'escrit Hippocrate, de plusieurs choses, que par aduventure n'ont point esté obseruées des autres, lesquelles ie laisse à part pour n'interrompre le cours de ceste dispute.

M. Et pour la mesme occasion, ie ne vous veux point prier de discourir touchant la generation, qualitez, & nombre des vents qui soufflent assez souuent, parce que ie vois que vous auriez trop à dire s'il falloit faire vn discours sur chacun point.

F. Et puis la matiere est cōmune, & Aristote & ses interpretes en discourent, & Hippocrate en plusieurs lieux.

R. Il semble qu'Hippocrate & Aristote ne s'accordent point, puis que cestuy-cy escrit, qu'une exhalaison chaude & seche est la matiere des vêts, & celuy là vne exhalaison froide & humide.

F. Veritablement il semblent contraires si on ne regarde qu'à l'escorce de leurs paroles, mais si l'on considere que l'exhalaison humide va ensemble avec la seche, & celle-cy comme dit Aristote ne quitte iamais celle-là iusques à ce qu'elle arriue à la moyenne region de l'air, où l'humide se cōuertist en pluye, & la secheresse en vêt, & que (comme le mesme Aristote veut) les exhalaisons ne s'esleuent iamais sinon d'une terre humide à cause de l'eau, de la neige, ou de la glace : Il fault confesser que les vents en leur premiere naissance

non seulement s'esleuent, quant à leur matiere, des eaux, estangs, neiges & glaces, mais encores qu'ils ont tous le pouuoir de refroidir & mouiller comme dict Hippocrate, encores qu'Aristote, comme Philosophe considerant la matiere immediate des vents, qui se separe de la matiere de la pluye, aye dict qu'elle est seche, ce qu'Hippocrate n'eust pas nié s'il eust voulu philosopher sur ceste matiere immediate, mais il l'a considerée en sa premiere naissance, meslé avec la matiere de la pluye qui surabonde.

M. Paraduanture pourroit-on dire que l'exhalaison de la Tramontane & des vents de terre, est seche, mais ie ne sçay comment on le peult dire des vents de la Mer.

F. Encores que la matiere des vents soit seche, & que, quittant sa chaleur par le rencontre de la moyenne region, elle deuiène froide, elle change neãtmoins sa nature pour la qualité des lieux par où elle passe, car celle qui passe par vn pays sec, & esloigné du Soleil, garde & augmente sa froideur & secheresse, comme sont à nostre regard les vêts Septentrionaux: celle qui passe par vn pays battu du Soleil retient sa secheresse, mais elle quitte sa froideur, ce qu'experimentent les Numidiens, & les Africains. Celle qui passe par plusieurs riuieres, lacs & Mers, deuient humide, portant avec soy tant de vapeurs qu'elle rencontre en chemin, telle experimentons-nous celle qui souffle du Midy, & telle sentent les Africains celle qui souffle du costé de la Tramontane, encores qu'eux l'experimentent froide, & nous chaude. Le nombre des vents n'est point determiné, & ne le peut estre

conuenablement, bien que pour l'ordinaire on en nomme douze, quatre cardinaux, & deux lateraux pour chacun. Le Septentrion ou Tramontane, que les Grecs appellent *Aparétias*, a du costé du Leuant l'Aquilon, que les Grecs appellent *Boreas* ou *Meses*, & le Trascias vers le Ponant; Celuy du Midy que les Latins appelēt *Auster*, & les Grecs *Notus*, a du costé d'Orient le vent, que les Latins appellent *Vulturnus Auster*, & les Grecs *Euronotus*, & *Phanicias*, qui est le Siroc; & vers le Ponant l'Africo-auster, dict des Grecs *Libonotus*, qui est le Lebech. Le Leuant que les Latins appellent *Subsolanus*, & les Grecs *Apeliotes*, a pour voisin du costé du Midy le *Vulturnus* appelé des Grecs *Eurus*, où se leue le Soleil d'Hyuer, & du costé de la Tramontane le *Circius*, que les Grecs appellent *Cacias*, & les Mariniers le vent Grec, où se leue le Soleil en Esté; Le Ponent que les Latins appellent *Fanonius*; & les Grecs *Zephirus*, a du costé de la Tramontane le *Caurus* ou *Corus*, ainsi appelé des Latins, & *Argeslis* des Grecs, & Schiron; & de Ptolomée *Iapiga*, qui est le maestral des nauigeās où se couche le Soleil d'Esté, & du costé du Midy *Africus* des Latins, & *Libicus* des Grecs, où se couche le Soleil d'Hyuer. Or parmy les Nautōniers, les vents ne sont point distinguez si exactement, car ils n'en nombrent que huit, le Leuant, le Ponant, la Tramōtane, le Midy, le Maestral, le Grec, le Siroc, & Lebech, ne distingant point le *Vulturnus* du Siroc, le *Libicus* du Lebech, le Grec du *Boreas*, & le *Thrascias* du Maestral, & les Medecins de l'Europe n'ayant autre obiect que la santé pesent sur tous les vents, la Tramontane & l'Auster,

considerant les autres comme participans de la qualité de ces deux contraires; parce que l'Auster & les vents de la Mer ont accoustumé de porter l'humidité en Europe, comme la Tramontane & les autres vents de terre la secheresse, outre que ceux-là soufflent le chaud, & ceux-cy le froid; & Hippocrate nous aduertit que les temps froids sont plus sains, & moins mortels que les pluuieux & humides, ce qui paroist veritable, non seulement par l'experience, mais aussi par la raison, cōme dit Galien, parce qu'en la secheresse les humidités superflues se consomment, lesquelles en temps pluuieux se pourrissent dans les corps.

M. Il me semble qu'on se trouue plus mal en temps nuageux qu'en temps pluuieux.

F. Il est vray, & Hippocrate ne l'entend pas autrement, & mesmes Aristote declare qu'il y a deux humidités en l'air, l'une pluuieuse, & l'autre vaporeuse, la premiere regne quand il pleut, l'autre lors que sans pluye, l'air est plain de vapeurs & de nuages espais: lesquelles humiditez sont differentes, non seulement en elles-mesmes, mais encores pour la diuersité de leurs effects, parce que l'humidité vaporeuse penetre beaucoup plus que la pluuieuse, voire mesmes l'air se purge, & s'inspire moins vaporeux, & nuageux, & moins chaud & humide par l'humidité pluuieuse; le contraire de quoy se voit en l'humidité vaporeuse, chaude & humide, qui allume les pourritures & les fièvres dans nos corps, appesantit la teste, endort les sens, & nous rend paresseux & foibles: & ceste seconde humidité ne remplit seulement pas les corps des hommes, mais elle mouille les pierres dans les

maisons sans qu'il pleuue, & les bois en deuiennent plus pesans & plus grands qu'ils ne sont en temps sec, & encores en temps pluuiieux: mais retournant aux extraordinaires mutatiōs de l'air, & laissant à part ces quatre qu'Hippocrate represente plus par discours naturel, que pour en auoir fait aucune experience: Venons à celles que luy-mesme a experimentées & escrites, en Thaso Isle voisine de la Thrace en la mer Egee, dans le premier & troisieme liure des maladies communes: lesquels liures sont sans dispute ses enfans legitimes, & voyons par le tesmoignage du plus celebre Medecin du monde, que tous les maux populaires, pestilens ou non, qu'il décrit, sont venus de l'air: l'Automne, pour la premiere cōstitutiō, ne fust point naturel, mais austrin, humide & pluuioux, d'où les corps se remplirent d'humiditez superflnēs; laquelle cōstitution ne fut point corrigée en Hyuer par l'accroissement de la chaleur naturelle produite d'une cōstitution aquilonere, par laquelle, moyennāt vne bonne digestion, les opilations eussent esté ostées, & les excremens resouls, conformément à l'opinion d'Hippocrate; & ainsi comme dit Galien, l'Hyuer auroit gueris les hommes des maux de l'Automne; mais l'Hyuer fut de mesme austrin, chaud & humide, vapoureux, & nuageux sans pluyes (lesquelles eussent esté profitables & salutaires en purgeant l'air,) d'où les excremens se multiplierēt dans le corps, & la chaleur naturelle deuint foible & languissante. Et si vn bon Printemps eust succedé à ces deux saisons, qui eust par sa chaleur celeste accru la naturelle, & ouuert les pores pour l'excretion & sortie des

humeurs superflus, paradvantage que les maux qui nasquirent apres eussent esté moindres : mais le Printemps fut en partie austrin, en partie aquilonere, encores que plus austrin, & partant les excremens s'accreeurent, & les ennemis furent enfermez dans le logis par la froideur de l'Aquilon: & l'Esté mesme avec sa constitution naturelle ne corrigea point la malice des saisons precedentes, en cuisant & corrigeant plusieurs cruditez, en dissipant plusieurs, & en chassant les autres hors du corps, parce qu'il fut tout nuageux, humide & plain de vapeurs tenebreuses: La pourriture donques suiuit vne année toute austrine, dās les corps pleins d'humiditez superflus, avec vne chaleur languissante, qui fondoit plustost qu'elle ne resoluoit, & puis suiuirent toutes les maladies qu'Hippocrate raconte bien au long, & que Galien interprete, qui en firent mourir plusieurs, & specialement les Hectiques, & Phtisiques qui ne furent pas peu; or la constitution ne fut point pestilente, parce qu'il n'en mourut pas beaucoup, mais elle en fut biē proche. La seconde que raconte Hippocrate fut differente de la premiere, & commença bien en Automne, mais auparauant sur la fin d'Aoust, les grands froids avec les vents de Midy, & les pluyes auoient precedé: l'Automne donc fut tres-mauuais, tant pour les froids si soudains comme à cause des pluyes qui durerent iusques au coucher des Pleiades: & ceste grāde humidité, avec l'ayde de l'Esté precedent, & de ce peu de vents austrins, entra aisément dans les corps, où elle s'enferma par le moyen de l'Aquilon. Il fut encores tres-mauuais pour les grandes inegalitez.

qui entre toutes choses trouble grandement les corps humains. L'Hyuer par apres fut froid & plein de pluyes & de neiges, avec vn Ciel courroucé, & plein de nuages obscurs. Le Printemps fut tout de mesme, & l'Esté ne fut pas beaucoup different, ains les vents, que les Grecs appellent Etesies soufflerent continuellement depuis le lever de la canicule, lors que le Soleil entre au Lion, & que la chaleur du Soleil commence à se faire sentir aux parties Septentrionales vers le Leuant: là où les neiges & glaces venans à se fondre remplissent l'air de vapeurs desquelles ces vêts se forment, le Soleil ne les pouuant refondre, lesquels vents nous pouuons appeller subsolans & leuātins. Or ceste seconde constitution fut sans doute pire que la premiere, pour les grandes mutations des saisons, & pour la grande humidité enfermée dās les corps par le froid, mais sur tout pour sa grande inegalité: c'est pourquoy il ne se fault point estonner si elle produisit tāt & si diuerses maladies avec rencheutes, douleurs, & mort de plusieurs, & particulièrement de petits enfans. La troisieme ne fut pas beaucoup differente de la seconde, mais bien plus vehemente, impetueuse & pire: car si la seconde commença vers la fin d'Aoust avec grāde quantité de pluyes & vents froids & aquiloneres, aussi fit la troisieme, bien qu'avec de plus grādes pluyes, qui durerent iusques à ce que l'equinoxe fust parfaict: de sorte que les saisons sauterēt, sans moyen d'vn grand chaud & sec de l'Esté à vn grād froid & humide: & depuis l'equinoxe survint vne constitution contraire, c'est à dire austrine, avec quelques pluyes, qui dura iusques au cou-

cher des Vergilies; & ainsi tout l'Automne fut humide, & d'humidité pluvieuse, & d'humidité vaporeuse; chose qui est extrêmement mauuaise, & fut encores froid au commencement, & chaud à la fin, ce qui est entierement contraire à sa nature, & quant aux premieres qualités, & quant à leur ordre, le froid venant au commencement, & le chaud à la fin. L'Automne de la seconde fust inegal pour les vents austrins, & la Tramontane qui iousterent continuellement, & humide à cause des pluyes qui durerent depuis la fin d'Aoust iusques au coucher des Pleiades. Mais cestuy-cy fut pire pour son impetuosité, parce qu'il commença par vn froid aquilonaire avec pluyes sans aucuns vents austrins, lesquels toutesfois suruindrent par apres avec quelques pluyes, & continuels nuages qui estouffoient la chaleur naturelle, & acumuloient les excremens. En la seconde l'Hyuer suiuit avec des neiges & pluyes espelles & grandes, mais meslees avec quelque temps serain. L'hyuer de la troisieme fut entierement froid & sec avec des neiges sans pluyes, & la secheresse fut grande contre la nature de l'Hyuer, c'est pourquoy les excremens de l'Automne se ressererent dauantage, & s'affermirent dans les corps, ce que le Printemps confirma, & accreust estant froid & sec, qui est la constitution naturelle de l'Automne, & fut different du Printemps de la seconde, lequel fut froid & humide. Mais ceste intemperie du Printemps grandement froid & sec avec les Aquilons, dura iusques au leuer de la canicule, qui est l'onzieme ou douzieme iour de Iuillet: & fust veritablement vne intempere

grande, de voir regner de si grands froids avec vne secheresse notable au temps de la canicule, & durer si longuement; ce qui n'arriua poin à l'Esté de la seconde, lequel n'estât pas beaucoup chaud aussi ne fut-il point beaucoup froid. En la seconde, les vents Etesies soufflerent doux & gracieux, & en la troisieme l'Aquilon qui est impetueux & gaillard; & apres des froidures si estranges, sans aucun moyen suruindrent des chaleurs tres-grandes & continuelles qui durerent depuis la canicule iusques à l'Acturus presque deux mois, du commencement de Iuillet, iusques au commencement de Septembre. Et le Ciel n'estant point encores contant des susdictes mutations malencontreuses, les vents austrins recōmencerent, qui regnerent durant l'Automne & l'Hyuer entierement avec pluyes, de sorte que iusques à l'Equinoxe ces saisons furent chaudes & humides à sçauoir six mois, estant de leur nature froides. Ceste troisieme donques fut pire que les deux premieres: outre qu'elle dura dix-huict mois, & les maladies furent diuerses, qui en firent tant mourir, que si l'epidemie ne fut entierement pestilente il s'en falut bien peu.

M. Ceste consideration touchant la qualité des saisons me semble belle & presque diuine, par laquelle les hommes preuoyant la santé & les maladies populaires semblent en quelque façõ estre portés de ialousie contre les dieux: ie crois que cest Hippocrate a esté vn grand personnage, & que le monde luy est grandement obligé: & crois que bien souuent plusieurs maladies arriuent de ces mutatiõs de saisons, auxquelles nous ne pre-

nous point garde ; & nous allons cherchant de^s causes plus sensibles & qui s'accordent mieux avec nostre esprit, ne prenans point garde à celle qui est la vraye.

- F. Il est comme vous dictes , car nous auons veu en nostre temps plusieurs deuenir malades en vne saison, de rougeole, en vne autre de catherres, en vne autre de petite verole, en vne autre de fiebures tierces, en vne autre de fiebures malignes, quelquefois les petits enfans seulement, quelquesfois les ieunes gents, en autre temps les vieillards, maintenant les femmes presque seules, tantost les hommes, & autresfois seulement les femmes enceintes, qui presque toutes perdoient leur fruct. On sçait aussi combien de maladies ont ataqué seulement les bestes, sans offencer les hommes, & non pas toutes generalement, mais vne seule espece : comme par exemple, celle que Virgile touche, qui affligea seulement les brebis.

Hic quondam morbi cœli miseranda coorta est tempestas.

Et ce qui s'ésuit. On sçait celle des bœufs en l'année 1514. Quelques-vns escriuent que le mesme arriua aux poules : & qui ne voit donques que toutes ces maladies, qui participent du commun ont tousiours leur cause cōmune, laquelle le plus souuent est l'air? partāt l'opiniō d'Hipp. & de Galien a esté tousiours sacree & digne de memoire, qui veulent qu'entre toutes les causes des maladies , & particulierement communes, la mutation non naturelle des saisons soit tousiours la plus principale : & non seulement de toutes les maladies tres-cōmunes, desquelles l'air en a tousiours esté la cause, mais encores des moins com-

munes: Or non seulement les mutations de deux, trois ou quatre saisons produisent les maladies populaires, comme nous auons veu aux trois susdites constitutions, mais aussi les mutations vehementes de l'air en vne seule saison du chaud au froid, du sec à l'humide ont accoustumé d'engendrer les mesmes maladies; comme par exemple, si aux iours caniculaires vne notable inégalité du chaud & du froid duroit vn mois; ou si la chaleur & l'humidité duroient cinquante iours continuels comme l'année passée.

M. Bien que ie ne m'entende point en ces matieres, il me semble toutesfois que vous voulés inferer par vos discours, que toutes les maladies communes ont leur cause commune, à sçauoir l'air, ou quelque autre, moyennant qu'elle soit commune, & la peste pareillement, si toutesfois elle est vne maladie commune.

F. Vous aués excellemment bien formé vostre argument: & que la peste soit vne maladie cōmune il ny à point de difficulté tant selon l'opinion de tous les medecins, que pour la supposition que nous fismes hier: par laquelle nous feusmes d'accord que la peste est vne maladie non seulement commune & vulgaire; mais encores mortelle, & comprise dans vn brief espace de temps, & le plus souuent contagieuse. Et encores que l'argument concluë de soy-mesme en façon que ce seroit vne chose superflue d'amener aucune autre preuue, ne nous contentant point toutesfois d'auoir monstré que toutes les maladies communes ont leur cause cōmune, & non point particuliere, nous monterons maintenant aux causes de

ceste commune maladie qu'on appelle peste; & verrons non seulement par l'autorité de tous les Medecins, & la viue force des raisons, mais encores par l'experience presque palpable, que la peste a necessairement tousiours sa cause commune, & qu'il ne la peut auoir particuliere, comme on croit publiquement.

R. Je confesse veritablement que toutes les maladies communes qui ne sont point cōtagieuses, & qui particulierement ne sont point pestilentes doiuent necessairement auoir leur cause commune, & en cecy ie m'accorde avec monsieur Facio; mais que la peste qui est vne maladie si cōtagieuse, ne puisse auoir quelquesfois vne cause particuliere, telle qu'est le fomes, ie n'en suis point encores capable, & desire, monsieur, que vous passés plus auant selon vostre promesse. Mais parce que ie crois que vous aués à visiter encores auourd'huy quelques malades aussi bien que moy, & qu'il semble que la plus grande chaleur est passée, ie crois que nous n'auons point de temps de reste.

F. L'exercice que nous auons en main nous tient si subjects qu'il ne nous laisse point disposer de nous mesmes selon nostre desir, & si vous ne vous souueniés point de vos malades, i'en auois oublié plusieurs qu'il me faut encores voir auourd'huy si i'ay du temps assez: demain ie crois satisfaire à ma promesse, & monstret pareillement que ceste contagion, & ceste furie ne se treuve point en la peste comme porte le bruiet commun, & ie ne veux point d'autres Iuges de tout ce que ie diray que vous mesmes, à qui ie baise les mains

pour auourd'huy.

M. Je ne vous veux point presser dauantage , sou-
uenez vous seulement de retourner comme vous
auez promis , pour ne faire tort à vostre cour-
toisie.

R. Mais plustost à la consolation que nous receuõs
en vostre compagnie.

F. Ne doutez point de nostre retour, Monsieur, par-
ce que nous voulons mettre fin à ce discours, ce-
pendant adieu.

M. Adieu Messieurs.

Fin de la quatriesme Iournée.



CINQVIÈSME IOVRNÉE.

M. **V**ous soyez le bien venu Monsieur Ratto; ie sçay pour le moins qu'on ne vous accusera point de lascheté, venant de si bonne heure à la lice.

R. Bien vous soit Monsieur; cest le contentement que ie ressens en escoutant & discourant des choses qui sont de ma profession, qui me faict venir si tost.

M. Mais specialement des choses si nouvelles & importantes comme celles que i'entends; & sçachez que bien que ie n'aye autre lumiere ny cognoissance de telles choses, que celle que la nature m'a donnée, ie me suis toutesfois senti esbranler, & ployer à l'opinion de Monsieur Facio pour le discours qu'il fit hier des mutatiōs & alteratiōs de l'air, lequel iene croyois point auparavant auoir tant de force & de facilité à se changer.

R. Le discours de l'air, & ce qu'il proposa des trois epidemies escrites par Hippocrate fut si proprement & necessairement accommodé au traité de la peste que ie cōmence à croire que la nostre soit venuë de l'air. Mais qu'il soit impossible que la peste s'engendre par vn fomes pestilent, cela me semble si difficile à comprendre, que ne voyant point de plus forts fondements, ie ne vois point aussi le moyen d'y consentir.

M. Et certainement vous avez raison, & d'autant plus si vous considerez qu'il faut que le monde aye vescu dās vne si grande erreur par tant de siècles, auxquels ont paru & paroissent encores d'hōmes tres-excellents en ceste profession. D'vn autre costé, luy qui cognoit tout cecy monstreroit vne grande foiblesse d'esprit s'il n'auoit de tres-puissantes raisons pour arracher vne opinion qui est si auant enracinée.

R. Ie le crois ainsi, mais il pourroit estre qu'il les estimast plus puissantes qu'elles ne sont, & peut-estre aussi sont-elles cōme il les estime: que si elles le sont, ie vous promets que ie n'auray point de honte de quitter mon erreur.

M. Veritablement cela sied fort bien aux hommes vertueux: mais il me semble que ie l'entens, ouy c'est luy, ça des sieges, assiéés-vous plus pres Monsieur Facio.

F. Ie vous remercie Messieurs de la faueur que vous me faictes; & pardonnés moy si ie vous ay faict attendre si long temps.

R. Vous soyez le tres-bien venu Monsieur. On ne peut sentir aucune incommodité pendant qu'on espere d'oüir des choses si belles comme vous auez promises.

F. Si les opinions tout à faict nouvelles sont belles, la mienne ne manquera point de beauté, encores que ie ne la croiray iamais telle, si elle n'est approuuée & fauorisée de vous autres Messieurs.

M. N'attendez point cecy, sinon par la force de la raison.

F. Ie le crois: mais pour ne vous point amuser, ie dis que qui veut scauoir la nature de la peste, il faut

fault qu'il contemple soigneusement ses causes, lesquelles il fault que celuy-là cherche nécessairement qui ne sçait point si la semence de la peste peut estre suffisante de la porter en quelque lieu.

M. Voilà le poinct, mais ie crois bien qu'il fault auoir d'autres raisons que pompeuses & subtiles.

F. Pompeuses? tant s'en fault, que c'est vne pure vanité de croire qu'on les puisse trouuer par autre voye que celle de l'expérience seule.

M. Vous dictes fort bien: mais quelle expérience pouuez-vous auoir, vous autres Messieurs, si par aduventure vous n'en auez point veu d'autre que celle-cy, en la cause de laquelle vous estes si differens? à qui croira-t'on pour finir ceste querelle?

F. A ceux qui en ont veu & consideré plusieurs, & qui sont Medecins de plus grand renom, & ensemble aux raisons qui sont de plus grand poids.

R. Monsieur Facio parle excellemment bien.

M. Ie crois qu'on ne peut dire autrement, & partant il faut pour commencer d'un costé voir, qui sont ces grands champions en la Medecine, & qu'est-ce qu'ils tesmoignent.

F. Ils sont ceux que nous dismes hier, & qui ont enseigné à tous les Medecins la vertu de guerir les maladies, à sçauoir Hippocrate, Galien, Paulus, Aëtius, Celsus, Oribasius, Auicenne, tous les anciens & quasi tous les modernes Grecs, Arabes, & Latins; ie ne sçay si ces tesmoignages suffisent.

M. Ie crois, comme vous dictes que ceux-cy sont les maistres des autres, mais il les faut bien entendre.

F. Il n'est pas beaucoup difficile de les entendre, parce qu'ils parlent clairement, & disent que la peste est vne maladie commune, & qu'il est necessaire qu'elle aye sa cause commune & non particuliere: & nous n'en voyons aucun de tous ceux qui en racontant ces causes pensent seulement à ceste semence.

M. Croyez-vous qu'ils en ayent veu plusieurs?

F. Cinq cens pour le moins, parce qu'ils n'ont pas tous vescu en mesme temps, & ne sont pas tous enfans d'un mesme pais, mais de diuerses nations, & qui ont succedé les vns aux autres par l'espace de cent cinquante ou deux cens années: c'est pourquoy il fault croire que les pestes qu'ils ont veuës ont esté differentes & diuerses, auenuës en pays fort diuers, & que leurs esprits ont esté tres-differens, & avec tout cecy s'ils ont esté differens en autre chose, ils ont esté d'accord en ce qu'ils n'ont point dit que la peste aye vne cause particuliere, & sur tout ceste semence, & n'y ont pas mesme songé.

M. Il me semble neantmoins d'auoir oüy dire à quelques Medecins, que Galien entre les autres n'estoit pas beaucoup versé aux matieres de la peste.

F. Il paroist bien qu'ils n'ont pas pris garde à tant de lieux, où il en discourt, outre qu'Hippocrate & Galien estoient Grecs, & à toute heure estoient en Asie, où la peste a tousiours esté familiere, & encores auourd'huy plus que iamais.

M. Ce fondement me semble fort grand pour vostre opinion, mais arrestez-vous, car par aduenture les Historiens nous pourroient donner quelque

lumiere pour descourir ceste semence.

F. Les Historiens nous aydēt veritablement à ſçavoir le temps & le lieu de la peste, le nombre paradvanture des morts, les accidens manifestes arrivēz deuant & apres, les opinions des peuples, les remedes, le ſoin qu'on y a apporté, & telles choses qui ſont claires: Mais ils nous aydent bien peu à cognoistre les causes, qui ſont ſouvent cachées; parce que n'estant point de ceste profession, ils eſcriuent, & ſont obligez d'eſcrire les opinions que les peuples ont touchant les causes; lesquels estant trop credules & groſſiers, ont le plus ſouvent des opinions mal-fondées: c'eſt pourquoy, tout ainſi qu'il ne me ſeroit point ſeant de vouloir ſçavoir d'un Muſicien les ſecrets & miſteres de l'Aſtologie, mais bien de l'Aſtologue, ainſi aux choses haultes & difficiles de la Medecine, le teſmoignage de l'Historien ne me ſuffit point, mais ie veuſ celuy des Medecins, & de ceux qui ſont les maiſtres des autres: & avec tout cecy Tite-Live Prince des Historiens ne diēt pas vne ſeule parole de ceste semence en vingt pestes, ou peu davantage qui advindrent preſque toutes à Rome en l'eſpace de quatre cens cinquante-vne année, commençant à celle qui regna ſur la fin de l'Empire de Tullus, iuſques à celle qui naſquit au temps d'Apus Claudius, Pulcher, & M. Sempronius, Tuditanus Conſuls.

M. Ce teſmoignage ne me ſemble pas de peu de conſideration, non tant pour l'eſtime de l'Historien, que pour la longueur du temps, & la multitude de tant de pestes, & pour la longue durée de l'Empire de ceste ville, car il eſt impoſſible que

plusieurs pestes ne soient auenuës en vn si long temps semblables à la nostre.

F. Et avec tout cecy il ne sortit iamais de sa bouche ny de sa plume que ceste semence portée çà & là eust iamais produict aucune peste ny à Rome, ny en aucun lieu d'Italie, ny en autre pays de l'estenduë de l'Empire Romain.

M. Parauenture que Tite-Liue, qui est tres-graue Historien, & qui semble vendre ses paroles fort cherement, a estimé que c'estoit allés de descrire en peu de mots ces pestes, sans descrire leurs causes.

F. Mais plustost avec toute sa briefueté il a presque descrit la cause de toutes.

M. Vous estes obligé de reciter ces causes si vous vous voulez aquiter de vostre promesse, afin d'êtrêdre comme vous dictes la nature de ceste peste.

F. Nous les chercherons dans les Histoires de Tite-Liue & des autres escriuains, mais principalement dans les liures des Medecins plus renommez, en telle sorte que parauenture il n'en restera aucune derriere qui n'ait esté recognuë.

M. Mais prenez garde à ma curiosité, qui ne se contentera pas seulement d'entendre les causes esloignees, mais elle desirera encores que d'elles vous montiés s'il est possible, aux causes plus prochaines & immediates.

F. Ceste curiosité est certainement louable, sans laquelle il est impossible de sçauoir aucune chose de celles qu'on cherche, & qui ne se treuve presque en pas vn de ceux qui ont escrit de la peste, lesquels pour ne la point sçauoir sont tombez à mon auis en des grandes fautes, d'où en sont de-

riuees tant d'autres que ie puis dire n'auoir point treuue encores aucun qui m'aye sceu apprendre la nature de la peste, comme si on pouuoit arriuer à vne cognoissance plus desirée, suiuant la doctrine d'Hippocrate, de Galien, & d'Aristote. Donques selon Galien, (duquel tous les autres ont puisé tout ce qu'ils ont escrit de bon) les causes tres-communes de la peste, auxquelles finalement toutes les autres se rapportent, sont deux, l'air & les aliments vicieux & gastés, & parauenture celuy-là ne failliroit point qui y adiousteroit les figures cœlestes.

R. Vous touchez vne difficulté de laquelle ie ne sçay comment vous pourrés sortir, parce que laissant à part que ce monde inferieur est gouverné necessairement du Ciel, & que plusieurs maladies s'engendrent de ses mouuemens, & des diuers aspects des Estoilles, car en cecy à cause de l'experience qu'on en a tout le monde en est d'accord; la difficulté consiste à cognoistre par quel moyen.

F. Par le moyen de l'air, cecy est asseuré, & personne n'en est en different.

R. Je ne le nie pas aussi, parce que ie sçay que l'air sert necessairement de chariot à toutes les vertus qui descendent du Ciel.

F. L'instrument du Ciel, & des Estoilles avec lequel elles agissent çà bas, est la chaleur qui vient de leur mouuement & la lumiere, comme tous le croient: & la chaleur se diuersifiant selon la variété des roulemens & des rayons cœlestes (qui sont separez, & quelquesfois vnis en ceste partie du Ciel, ou en celle-la) elle faict naistre la variété des effects que nous voyons çà bas.

R. C'est l'opinion d'Aristote, d'Auerroës, & de tous les Philosophes.

F. Les Astrologiens la tiennent aussi. R. Il est vray, mais ils y adioustent d'autres vertus particulieres: comme par exemple, ils veulent que la conionction de Mars, de Iupiter & Saturne en figures humaines, outre la qualité manifesté, enuoye encores vne qualité occulte, d'où viennent les pestes, comme plusieurs fois on a pris garde que de tres-grandes maladies se sont allumées non seulement pour ces conionctions, mais aussi pour plusieurs Eclipses du Soleil, & de la Lune.

M. J'ay ouy dire que les Cometes presagent tousiours quelque malencontre.

R. Non seulement les Comettes, mais encores plusieurs signes, comme vne si grande multitude d'Estoilles; lesquelles courent presque tout le Ciel, & qui tombent quelquesfois, & volent: plusieurs tremblemens de terre, tonnerres, esclairs, vents, flammes, cheures, poutres, lampes, lumieres, montagnes de feu, fosses ou gouffres, hommes à cheual, bruiet d'armes, de trompettes & de tambours, le Soleil couronné, plusieurs Soleils, & autres estranges apparitions.

M. Par quelle cause estimez-vous que telles conionctions, Eclipses, & autres apparitions produisent les maladies?

R. Si vous parlez de la conionction des Planettes & des Eclipses, ie ne vous scaurois satisfaire, parce que la qualité des influences nous est trop inconnüe.

F. Fracastor dict que ces Planettes conioinctes ensemble esleuent de la terre vne plus grande quan-

tité de vapeurs, c'est pourquoy elles sont si nuisibles.

R. Donques les Eclipses, par ceste raison ne deuroient point nuire, parce qu'il faut qu'elles attirerent moins de vapeurs à cause de leur peu de lumiere: & pour parler clairement, ie crois que nous n'en sçauons que ce que les Astronomes en disent. On a bien obserué que les pestes de ceste façon ne sont iamais auenües que la constitution de l'air ne fut chaude & humide: comme par exemple, celle qui affligea toute l'Europe au temps du Pape Pelagius II. & celle qui vint sur la fin du Pontificat de Boniface IV. & celle qui tourmenta toute l'Italie durant le Pontificat d'Agaton, outre celle qui fut vniuerselle en la vie de Benoist souuerain Pontife, les Eclipses du Soleil & de la Lune precedant tousiours & les Cometes & vents Austrins. Ie crois qu'il n'est pas necessaire de raconter la peste vniuerselle del'an 1347. & 48. deuant laquelle parust la conionction de Mars, Iupiter & Saturne au 19. degré d'Aquarius, celebree en 1345. au mois de Mars, ny ceste autre laquelle nous a frappé la derniere fois en l'année 1524. auquel temps plusieurs conionctions furent faictes, desquelles moyennant l'Esté Austrin, nasquit vne tres-fascheuse peste par toute l'Italie les années suivantes. Or que la pourriture, & puis les semences pestilentes soyent causes moyennes, par lesquelles l'air chaud & humide produit la peste, il semble (comme nous auons discouru) que nostre esprit n'en soit point capable.

E. Toute la difficulté donc consiste à sçauoir les moyens par lesquels ces conionctions & aspects

produisent en l'air la chaleur & l'humidité. Ce que i'estime estre impossible : il est bien vray si nous parlons de la Comete & des autres signes susdicts, qu'on peut dire avec quelque apparence que l'air est nuageux, impur, & mauuais; & suffit de dire maintenant que les conionctions & Ecclipses sont communement marques, & paraenture causes des futures maladies & autres disgraces; ce qu'on tire seulement de la pure obseruation des Astronomes.

M. On voit neantmoins souuentesfois des Ecclipses & Cometes sans que la peste s'en ensuiue.

R. Si faict-on biē des conionctions mal-heureuses, & pour tout cela on ne peut pas tirer vne conclusion certaine d'vne future peste, parce qu'à ces conionctions pestilentes, Ecclipses & Comettes s'opposent paraenture d'autres aspects ou autres conionctions salutaires, lesquelles affoiblissent ou esteignent la force de leurs contraires : comme par exemple, en l'année presente 1580. le 16. de Mars vers la minuiēt suiuate, car il s'est faict vne conionction de Mars avec Saturne au 15. degré d'Aquarius, sans que la peste se soit renouvellee, & paraenture ne s'allumera-elle point en aucun endroit d'Italie par la puissance peut estre de Jupiter qui est Seigneur de l'année puissamment fauorisé du Soleil & de Venus, lesquelles Planetes paraenture resistent à cest aspect mal-heureux & à l'Eclypse lunaire qui auint le dernier iour de l'auier, bien qu'il ne soit point hors de propos de croire qu'vne telle Eclypse avec la conionction susdicte aye esté la cause du mal epidemique que nous appellons Galantin qui tourmente aujour-

d'huy toute l'Europe. Et pour abreger mon discours, ie ne pense pas qu'il soit impertinent de croire avec les Philosophes & Medecins que ces influences cœlestes se reduisent finalement aux qualitez manifestes, encores que difficilement comme Fernel tasche à le prouuer avec tant de raisons & d'exemples.

F. Je crois de plus, qu'il est grandement difficile de preuoir les maladies communes comme dict Auerroës par les mutations des saisons en leurs qualitez manifestes.

R. Ceste difficulté ne peut venir d'ailleurs que de ce que nous ignorons le degré de la qualité manifeste, & quand encores nous le cognoistrions, si faudroit il admirer avec Fernel les estrâges varietez des pestes qui ont esté au monde; & i'estime que hors des analogies de Fracastor, nous n'en scaurions dire autre chose, quoy que par le tesmoinage de nos anciens, & parce que nous mesmes auons veu, nous cognoissons assez clairemēt la plus grande partie des pestes estre auenuës avec vne alteratiō manifeste de l'air, laquelle plusieurs fois on a preditē par l'vniō de quelques Estoiles qu'on appelle mal-heureuses qui a esté faicte en des signes lesquels par longue obseruation on estime pareillement mal-heureux.

F. Il me semble que vous aués dict en peu de mots tout ce qu'on peut dire à ce propos, & partant laissant à part les roulemens, & les figures cœlestes, qui sont les causes principales, mais esloignes, i'estime qu'il est necessaire pour cognoistre la nature de la peste de rechercher les deux causes plus proches que nous auons dictes,

à ſçauoir l'air, & les alimens vicieux; & pour commencer par l'air, duquel depend la plus grãde partie des peſtes, il eſt certain, comme nous monſtraſmes hier, que quand il ſort du temperament de la ſaiſon, que les maladies naiſſent. Si donques les mutations des ſaiſons, comme eſcrit Hippocrate, rendēt les hommes malades, il ſ'enſuit que la peſte, qui ſur toutes maladies eſt mortelle, ſera produite non par des mutations legeres, mais puiſſantes & fortes. Et encores que toute mutation, pourueu qu'elle ſoit grande, ſoit ſuffiſante d'engendrer la peſte, comme vne longue & extreme ſechereſſe, & chaleur, qui produiſit la peſte parmi les Romains; vne longue & extreme froidure qui glaça le Tybre, & donna la peſte à Rome; & la troiſieſme conſtitution d'Hippocrate & elle euſt duré encores quelque temps avec les Aquilons; toutesſois du commun conſentement de tous les Medecins & Philoſophes, il n'y a point de conſtitution en l'air plus propre & diſpoſee à la generation de la peſte que celle qui ſe faiçt par voye de pourriture, laquelle ne ſe pouuant former d'vn trop grand froid de l'air, comme enſeigne Ariſtote, mais ſ'engendrant du froid du dedans, & du chaud du dehors, qui n'eſt autre choſe que la chaleur naturelle diminuee, & ne pouuant non-plus ladite pourriture ſe former d'vne ſechereſſe exceſſiue, il reſte qu'elle ſoit produicte des puiſſantes mutations de l'air en la chaleur & l'humidité.

M. Comment eſt-ce que l'air deuiet chaud & humide ?

F. Si nous parlons vniuerſellement de l'air de l'Eu-

rope, les vents de Midy ordinairement en sont la cause commune, encores que l'air puisse deuenir tel par quelque autre cause particuliere; & nous parlâmes hier suffisamment comme ces vents portent la chaleur & l'humidité en l'air.

M. Je crois d'auoir veu les vents en peinture, & celui de Midy avec la teste d'un mort, comme si son soufflé faisoit mourir. D'un autre costé, s'il n'apporte que la chaleur & l'humidité, où consiste la vie selon vos Medecins, comment faict-il mourir?

F. Ces qualités sensibles, comme chaud, froid, sec & humide, qui sont les premières, & les autres comme inégal, poli, dur, mol & semblables ont plusieurs degrez, parce que les choses qui sont chaudes ou actuellement ou en puissance ne le sont pas toutes également, comme l'eau peut estre chaude & plus & moins, & tres-chaude, & nous voyons que l'aluïne est plus chaude que la camomille, le poiure que l'aluïne, l'Euforbe que le poiure, & s'il le faut dire, l'argent vif sublimé que l'Euforbe. Or le plus chaud & le moins chaud sont tellement differents, que le moins chaud ayde & entretient la vie humaine, & le plus chaud l'esteint: & toutes les autres qualités ont les mesmes degrez, & la vie humaine consiste veritablement en la chaleur & l'humidité, mais chaleur tellement temperee, qu'elle a plus tost du cœleste que de l'elementaire; & l'humidité luy est si iustement proportionnée que l'une ou l'autre ne sortent pas si tost de leur mesure, qu'elles troublent, & confondent toute la vie.

M. Voilà qui va bien; mais il me semble que ces

vents de la Mer ne sont point si ardens, qu'ils puissent faire sortir la chaleur naturelle hors de sa mesure & proportion.

F. Ils le font par accident, veu que l'air estant tel, produit facilement la pourriture, en excitant la chaleur estrangere, & pourrissant par apres non seulement toutes les choses pourrissables qui sont aux enuiron de la terre, mais encores les humeurs qui sont enfermées dans les corps, & plus facilement celles qui sont en qualité & quantité plus vicieuses, qui bouchent dauantage, & par consequent sont plus aisées à pourrir: la raison naturelle le monstre ainsi, & l'experience le prouue; ainsi le tesmoignent tous les Medecins & les Philosophes, & Aristote, & Galien en mille lieux.

M. Si est-ce que nous auons veu regner ces vents de nostre temps, aucunes fois les iours, les semaines, & les mois, avec vn air continuellemēt chaud & humide, sans que la peste s'en ensuiuist.

F. Pour la generation d'vne maladie commune, quoy qu'elle ne soit point pestilente, toute mutation d'air ne suffit point, mais il est necessaire qu'elle soit vehemente, & qu'elle dure long tēps, comme dict Galien: doncques pour produire la peste, qui est vne maladie plus grande, tout chaud & humide n'est pas suffisant.

M. D'où vient ceste diuersité?

F. Veritablement si la chaleur & l'humidité estoient des substāces, il ne faudroit qu'vne partie de l'air, chaud & humide, qui fust pestilent, pour faire que toutes les autres fussent de mesme, mais parce qu'elles sont des accidēs, & partāt sujetes à croistre & diminuer, de là vient que tout air chaud & hu-

ride n'est point pestilent, mais seulement celuy qui est en hault degré, & qui dure longuement; & tout ainsi que toute chaleur ne brusle point, mais seulement celle qui est grande, ainsi pour disposer les corps à vn si grand malefice, comme disent tous les Medecins, il faut vne chaleur & humidité fort grande, & qui dure longuement comme quatre, six, huiet mois, vn an, plus ou moins selon les lieux, & la disposition des corps humains; lesquels, s'ils estoient nourris de bons alimens, il faudroit vne plus grande alteration; mais si ces alimens sont vicieux, & desia disposez à la pourriture, la moindre alteration est suffisante de les infecter; & encores selon la disposition des lieux, comme escrit Galien de Tassus, & Cranon, cestuy-cy estant situé en vn lieu bas, exposé aux vents de la Mer, & où les Aquilons ne seruent de rien, oüy bien à Tassus, qui est ioignant la Thrace, & partât la condition de l'air, qui estoit pour lors Austrine en Tassus eust esté tres-pestilente, si la qualité du lieu, comme dict Galien, n'y eust résisté, qui me fait croire que la peste qu'Hippocrate raconte le fut aussi, puis que la constitution fut si longue, & que pour engendrer ces charbons en Cranon, selon Hippocrate, vn seul Esté austrin estoit suffisant.

M. Si Hippocrate eust escrit la qualité de l'air, au temps de ceste peste, ie l'entendrois volontiers.

F. Il l'escriuit tres-bieu en ceste façon, ce fut vne année austrine, sãs vêts, parce qu'apres vne grãde secheresse, enuicō l'Arcturus suruindrēt de grandes pluyes, l'Automne fut sombre, nuageux, & abondāt en pluyes, l'Hyuer suivit en apres austrin,

humide & doux ; & depuis le Solstice & mesmes vers l'equinoxe, l'Hyuer fut fort aspre, & depuis l'Equinoxe, la Tramôtane fut uint avec les neiges, bien que ce temps ne dura point, lequel au Printemps se tourna en Austrins sans vêts, & en pluyes qui durerent iusques à la canicule. L'Esté en apres fut serain, avec quelques vents Etesies ; & puis les pluyes avec l'Aquilon suruindrèt sous l'Arcturus, & partant apres vne année presque toute australe, humide, & tranquille, les charbons commencerèt au Printemps, avec les autres maux, & la mortalité qu'il raconte.

M. Je n'entend point que veut dire sans vents, si les austrins regnoient.

F. Il dict sans vents, pour s'accommoder au sens, parce que l'air paroist quelquefois immobile, mais comme dict Galien, il se meut tousiours comme la Mer, le perpetuel mouuement duquel se descouure aux lieux estroits, comme à Messine, en sa plus grande tranquillité.

M. Il est vray, mais ces vents marins agitent ordinairement l'air & la Mer, avec grande violence.

F. Oüy, lors qu'ils s'auancent ; mais en la peste d'Hippocrate, ils regnoient seulement autant qu'il falloit pour remplir l'air d'une chaude humidité: de façon, que ne passant point plus auant, l'air de Tasus estoit tranquille & sans vents, chaud & humide, & toute vne année pestilent ; lequel eust esté tres-pestilent en Cranon, en Maremme, à Pise, & en tout autre lieu bas & meridional.

M. Dictes-moy ie vous prie, d'où vient que lors que les constitutions durent si long temps, l'air vient à se corrompre ?

- F. Il peut bien deuenir pestilent, mais qu'il se corrompe, ie ne crois pas qu'on le puisse dire avec raison.
- M. Il me semble de l'auoir ouï dire de ceste façon à plusieurs Medecins, qui ont quelque reputation.
- F. Cela peut estre, mais si ie ne me trompe ils n'ont ny bien dict, ny bien escrit, dequoy Auicenne en a esté la cause principale, homme bien qu'Arabe, fort notable, pour estre Prince, & en la cognoissance de la Medecine de grande reputation: c'est pourquoy plusieurs autres qui ont escrit apres, poussez plustost de l'autorité que de la raison, sont tombez en cest erreur.
- M. Ie crois que voicy vn des passages où il fault necessairement s'arrester, parce que si c'est vn' erreur, ie m' imagine qu'elle est bien commune.
- F. Ie m'y arreste de bon cœur, pour entendre l'opinion de Monsieur R.
- R. Ie ne suis point de cest auis, encores qu'il soit en la bouche, & dás les escrits des Medecins, & peut-estre que les paroles peuuet estre interpretées en meilleur sens.
- F. Il n'est pas possible, car ils parlent trop clairement, & mesme Auicenne tasche à nous le faire entendre avec l'exemple de l'eau; laquelle, comme il est impossible qu'elle se pourrisse en sa pureté & simplicité, si elle n'est meslée avec les autres elemens, ainsi dict-il l'air pur ne se peult pourrir s'il n'est meslé avec les vapeurs & exhalaisons: & les modernes s'efforcent de le prouuer avec l'autorité d'Aristote, qui a laissé par escrit que tous les elements, excepté le feu, sont subiects à

pourriture. Sur quoy mesme, Montan, Gentil, Altomare, Oddo & plusieurs autres, fondent leur opinion, la confirmant apres avec l'authorité d'Hippocrate, Galien, & Auetroës, lequel semble dire que l'air pestilent est pourry & corrompu. Mais avec le respect de ces habiles hommes, ie ne crois point qu'une telle opiniõ se puisse defendre, veu que si la pourriture est proprement opposée à la generation qui est definie par Aristote, qui est vne termination des qualitez passives, faites par les actives, c'est à dire de l'humidité & secheresse, & la pourriture opposée est vne dissolution de l'humide d'avec le sec, par l'extinction de la chaleur propre & naturelle; il s'en suit necessairemēt que la pourriture est vne passion des corps mixtes parfaits seulement, lesquels ne se peuvent point corrompre naturellement, sinon par voye de pourriture; & partant la corruption naturelle des mixtes s'appelle pourriture, comme leur generation n'a point de nom particulier, mais elle se sert du general.

F. Il semble toutesfois qu'Aristote parle assez clairement; & mesme les aduersaires pourroient dire qu'il entend que la pourriture appartient proprement aux corps qui se corrompent en partie, qui sont les elemens.

F. Ce mot qu'escriit Aristote ne se peut point entendre comme il sonne; parce qu'il se cõtrediroit à soy-mesme; car si la definition qu'il escriit au texte sixiesme ne cõvient qu'aux mixtes parfaits, comment peut-il dire qu'elle conuient proprement aux corps simples?

R. Il est ainsi, & partant on voit clairement qu'Aristote

ristote veut que les elemēs ne se pourrisēt point, mais qu'ils se corrompent en partie, d'une façon de pourriture qui leur est propre, qui est plustost vne alteration que pourriture.

- F. Veritablement tout ce chapitre d'Aristote, touchant la pourriture est fort obscur, & les interpretes selon mon opiniō ne satisfont gueres bien les curieux, excepté Mercenarius, qui me semble l'auoir fort iudicieusement examine.
- R. Et partant Auicenne qui a veu ce lieu, & que selon l'opinion d'Aristote (confirmée de la verité qu'on peut apprendre de nous, la pourriture ne pouuoit estre corruption que des mixtes parfaicts) a dict que l'air ny aucun autre element ne se pouuoit pourrir en sa pureté, mais que les elemens estans meslez ensemble, ne se pouuoiet plus dire corps simples, mais mixtes, & par consequent subiects à la pourriture; à laquelle le feu n'estoit point subiect, parce qu'il ne reçoit point le meslange des autres.
- F. Mais soit qu'Aristote vueille en ce lieu que tous les Elements se puissent pourrir excepté le feu, toutesfois on voit que le mesme a escrit que l'air & le feu comme Elements chauds ne se peuuent point pourrir, tant pour ne trouuer aucune chose qui les surpasse en chaleur, comme parce qu'ils ne se peuuent point refroidir, qui sont deux conditions necessaires à la pourriture.
- R. Ils respondent à cecy qu'Aristote en ses problemes entend l'air qui est le plus pres du feu.
- F. On peut receuoir ceste responce pour le moins pour sauuer Aristote de contradiction, encores qu'on le pourroit glosier en ses Metiores,

en disant que tous Elemens se peuuēt pourrir excepté le feu, c'est à dire les Elemens chauds : & bien que ceste interpretation semble estre tirée par les cheueux, elle est neantmoins fauorisee du mesme Aristote lors qu'il escrit que les choses grasses ne se pourrissent point à cause de l'air qui y predomine.

- R. On pourroit dire qu'Aristote entend plustost difficulté qu'impossibilité : parce que les choses grasses se pourrissent à la fin.
- F. Encores que ceste responce puisse satisfaire à l'argument, toutesfois quant à l'intention d'Aristote on voit clairement par ces deux auctorités, que l'air ne se pourrit que difficilement : & qui considerera bien le mesme Aristote verra, que lors qu'il nomme la pourriture des Elemens avec ces paroles (se retirer de leur nature) on peut dire suiuant son opinion que la pourriture des Elemens est plustost alteration que pourriture. Et venant à la raison, nous sçauons que l'air & la terre qui se meslent facilement sont plus ployables à la pourriture ; & que l'air encores qu'il se remplisse de vapeurs & d'exhalaisons ne se peut pourrant dire estre meslé avec la terre & l'eau, parce que les vapeurs & exhalaisons se diront tousiours feu, eau & terre en puissance, mais non pas actuellement. D'auantage nous sçauons d'Aristote & de l'experience que l'eau de la mer ne se pourrit qu'en petite quantité & separément, cōme il arriue semblablement à toute autre chose. On cognoit donques par toutes ces authorités & raisons, que l'air ne se pourrit point entēps de peste ; neantmoins elles ne me pousseroient point à im-

pugner & combattre ceste opiniõ, si d'autres encores plus fortes ne me forçoient à la blasmer; veu que si l'air pestilent est pourri, comme veulent ces Docteurs, & changé non seulement en ses qualités manifestes, mais, aussi en toute sa substance, la corruption donques de sa forme substantielle qui le faisoit air, s'en ensuit necessairement, & partant il faut confesser qu'en toute vne ville pestilente il n'y a point d'air, dequoy la seule pensée est ridicule, & si la corruption d'une substance se termine en la generation d'une autre, il faut sçauoir quel corps s'est engendré en l'année 1347. & 1348. que la peste fut par tout le monde. Outre que si le monde fut demeuré sans air, le vuide eust succédé en sa place.

- R. Ils diront parauenture, qu'il s'engendra yn corps, lequel bien que veritablement ne fut plus air, il luy estoit neantmoins semblable: comme pour exemple, l'eau pourrie n'est plus eau, mais elle est semblable à l'eau.
- F. Ceste responce de soy mesme les porte par terre. parce que si la pourriture est comme Aristote l'a descrite, & plus clairement Galien qui la dit estre vne mutation de la substance de tout le corps qui se pourrit par la chaleur estrangere, la fin de laquelle est corruption, il faut dire que l'eau pourrie, comme corps mixte, se doit résoudre briefuement en ces principes, la chaleur naturelle s'euaporant avec l'humide, ne demeurant que terre & poudre, comme il arriue necessairement en toute pourriture, & selon Aristote, & selon l'experience journaliere, que nous

voyons aux eaux des estangs, & en toutes les autres qui le pourrissent.

R. Ils diront parauenture, qu'on voit clairement (selon l'opiniõ d'Aristote) que l'air se peut pourrir, mais qu'ils ne sont point obligés de rendre raison de toutes choses pour la foiblesse de l'esprit humain.

F. C'est vne maigre defence, parce qu'ils sont obligés à garentir leur opinion des inconueniens tres-euidens qui s'en ensuiuent, autrement il leur seroit loisible de croire que les asnes volent, & telles opinions extrauagantes. Au reste, s'ils ne peuvent respondre à toutes les questions, bien de par Dieu. Mais ie n'ignore point que l'air, ainsi que les autres Elemēs, s'engendre & se corrompt continuellement: & ie veux encores supposer qu'il se pourrisse en sa simplicité, mais ils doiuent considerer que ceste corruption ou pourriture arriue seulement aux petites parties des Elemēs: & comme ce seroit vne folie de dire que l'eau de la Mer Mediterranee fut pourrie, ainsi seroit-il mal à propos de dire que l'air de l'Europe aux grandes & vniuerselles pestes soit ny pourri ny corrompu: l'air de ceste salee, par exemple se peut corrompre, & de là s'engendrer vn autre Elemēt, mais non pas l'air de toute vne Prouince.

R. Vne petite partie d'eau Marine se pourriroit biē estāt separee de la Mer, cōme l'eau d'vn Arsenal enfermé, ou d'vn fossé, mais non pas la Mer Rouge, encores qu'elle fut enfermee, ny la Mer Tirrenne, ny la Caspienne, bien qu'elle le soit.

F. Quoy, la Mer Rouge? Les lacs d'eau douce ne se pourrissent point, comme le lac de garde, &

autres plus petits qui sont plus sujets à se pourrir, non tant pour estre d'eau douce, qui est plus humide que la salee, comme pour estre d'eau qui est sans agitation, laquelle comme tesmoignent Aristote & Galien est plus propre à la pourriture.

M. Le me suis estonné quelquesfois de quelques petits lacs d'Italie, lesquels ne se pourrissent point, d'où vient cela?

F. Aristote respond que c'est pour la grande quantité, qui a plus de force pour resister à la chaleur de l'air qui l'environne, parce que si c'estoit vne petite quantité d'eau comme celle des estāgs elle se pourriroit facilement: voyez donc ie vous prie si l'air (qui sans contradiction, resiste beaucoup mieux à la pourriture que l'eau) en l'an 1528 pour exemple fut pourri par toute l'Italie, où la peste regnoit.

M. Je treuve estrange que tant d'habiles hommes soient tombés en vne erreur si grande & si manifeste.

F. Tous les hommes, quoy que tres-excellents, faillent quelquesfois: & pendant que l'erreur d'un grand personnage est cachee, non seulement on ne la croit point pour erreur, mais on la reçoit pour vne maxime & opinion tres-véritable, iusques à tant que quelqu'un vient, quoy que de moindre suffisance, lequel ne se contentant point de l'autorité de celuy là, l'aveut examiner: & l'erreur n'est pas si tost descouverte que tout le monde s'estonne, qu'un homme au reste de grande reputation, soit tumbé en vne si lourde faute.

R. Ils se couurent de l'autorité d'Hippocrate & de Galien, qui semblent de n'avoir jamais erré.

F. Ceux cy véritablement ont esté la fleur des hommes de ceste profession, & crois neantmoins qu'ils ont failli en quelque chose, bien que ie ne cognoisse aucune erreur en eux touchant cecy, dont nous parlons, veu mesmement que le lieu où Galien traicte de la mutation de l'air en sa substance, s'entend de la mutation aux qualitez secondes cômune rareté, espelleur. Et c'est vne façon de parler, comme aux Medecins de dire substance rare, espelle, tenuë, grosse, spongieuse.

R. Il se fonderont peut-estre sur l'autorité d'Auerroës, & de Galien, où ils parlent de l'air corrompu & pourri.

F. Ils seront mal fondés, parce qu'on sçait que le Medecin, lequel parle conuenablement au sens, estend souuentefois la signification d'un mot: comme pour exemple, il dira que le Soleil est chaud non pource qu'il est tel, mais parce qu'il eschauffe: ainsi l'air pestilent se dict air corrompu, parce qu'il corrompt les animaux, ou parce qu'il est plain de vapeurs pourries & corrompues, qu'Hippocrate & Galien appellent corruptions, ou pourries euaporations; encores que quelques Medecins, sans beaucoup de consideration, alleguent ces lieux d'Hippocrate & Galien & semblables, pour preuener la pourriture de l'air en la peste.

M. Que croyés-vous que soit l'air pestilents.

F. Si pour l'inspiration de l'air qu'on appelle pestilent, plusieurs deuiennent malades & meurent, il faut dire qu'un tel air est fort ennemy de la nature humaine, non pas par soy-mesme, ny par ses qualités manifestes, encores qu'il soit

chaud & humide, puis que bien souuent nous l'inspirons tel hors du temps de la peste, sans aucun dommage; mais parce qu'il contient quelque autre chose en soy, que pour l'inimitié qu'elle a avec nous, on ne peut appeller d'un nom, qui nous montre mieux sa nature, que de celui de venin; Ainsi Galien mesme le tesmoigne.

- R. Ce nom est d'autant plus conuenable, que nous voyons qu'il faict les mesmes effects enuers les hommes, que le venin.
- F. Nous pouons donc dire maintenant, que l'air pestilent comme tel, est vn venin, puis qu'il n'est point pestilent s'il n'a dans soy, mesme des corps ou semences venimeuses.
- M. I'ay assez gouste ce discours; & me semble qu'il faudroit maintenant chercher d'où sortent ces semences ou corps venimeux, qui rendent l'air pestilent.
- F. Elles peuuent venir de plusieurs endroicts, & de diuerses causes. Quelquesfois elles sortent de quelque cauerne; comme par exemple, de celle de Naples aupres de Pouzzol, d'où sort vn souffle pestilent, lequel venant à croistre quelquesfois plusieurs fiebures pestilentes s'en engendrent. Le mesme & encores pire vient du mont Aetna; Mais les accidents qui viennent des tremblemens de terre sont plus grands & plus importants, comme si la terre s'entr'ouuroit en quelque lieu, ou vne cauerne se trouuast au-dessous, de laquelle sortit vn air plain parauenture de vapeurs metalliques & venimeuses, comme d'orpiment, d'argent vif, de la chaux, du cinabre, du plastre, souffre, vitriol, & autres semblables ve-

nins, ennemis de la nature humaine; comme viperes, Serpens, Salamendres, Crapaux, Dragõs, Lezards, & autres qui se treuuent dans les entrailles de la terre, ou bien des vapeurs venimeuses qui s'esleuent, non des metaux ny des animaux suldits mais des corps pourris, comme eaux, animaux & choses semblables, & ces trois sortes de vapeurs peuuent sortir meslees ensemble, & mesmes on peut croire qu'elles le font le plus souuent.

M. Croyés-vous parauenture que la peste puisse venir d'vne telle cause?

F. Ouy Monsieur, parce que l'air se remplit soudainement de ces vapeurs, qui portent le venin tout à coup: outre que l'air estant long temps enfermé, il est necessaire qu'il aye du venin, car il n'est pas possible qu'il y aye cauerne si nette qu'elle n'enferme quelque fumee, bois, eau, vermisseau, & semblables choses pourries, ou qui se pourrissent, desquelles les vapeurs r'enfermées, agitees & meslees longuement ensemble deuiennent pestilentes, & cest air aussi par consequent: mais si ceste cauerne est grande & abondante en metaux, ou animaux venimeux, ou en pourriture, il est presque necessaire que ce souffile infernal produise vne tres-grande & tres-dangereuse peste.

M. Je crois bien qu'vn tel air est veritablement venimeux; mais je crois aussi que la peste vient rarement d'vne telle cause.

F. Rarement ouy: Parce qu'elle ne vient qu'aux grands tremblemens de terre, comme elle vint à Rome durant le Consulat de M. Cornelius Ma-

luginensis, & Lapidus Crassus.

M. Vous me faictes ressouvenir d'une autre qui s'aluma en Italie, non sans l'ayde de la famine, comme dict Platine en l'annee (comme ie crois) 983. durant le Pontificat de Iean 16. d'où Capoué, & Beneuant furent esbranlees, & ie sçay d'en auoir leu vn' autre en Tracagnote qui auint en l'an 1447. & dura trois ans en Italie, les tremblemens de terre ayant precedé.

R. Les Histoires en sont remplies, & entre les autres, ie me ressouviens d'une qui n'est pas peu notable, qui naquit en Italie, en Alemagne, & en France en l'an 801. par ce grand tremblement de terre qui suruint la nuict suiuant le dernier iour d'April; lequel causa des ruines memorables par toutes ces Prouinces.

M. Et toutesfois nous n'auons veu aucune peste pour le tremblement de terre de Ferrare.

F. La peste ne suit pas necessairement les tremblemens de terre; premierement parce qu'il n'est pas necessaire que dans toutes les cauernes il y ayt quantité de pourriture, ou de metaux, ou d'animaux venimeux; dauantage, il faut que les cauernes s'ouurent, & qu'elles donnent yssue à l'air venimeux: or les cauernes ne s'ouurent point en tout tremblement de terre, comme aussi les villes entieres n'en sont point englouties: outre qu'il est necessaire que la cauerne soit grande, & le venin qui en sort, abondant, puis qu'il se doibt esprendre en l'air de tout vn pays, & partant tout sospiral qui s'entr'ouure, encores qu'il soit venimeux ne produit point la peste. I'ay bien oüy dire, & cela peut facilement arriuer, que douze, ou vingt

hommes moururēt pour s'estre trouuez par malheur aupres d'vn fouspirail causé par vn tremblement de terre, mais que la mortalité ne passa pas plus auant; & pourtant vous dites fort bien, que la peste vient rarement d'vne telle cause, parce qu'elle arriue aussi rarement.

M. Heureux donc le monde, esli l'air ne s'infectoit point que par les grands tremblemens de terre, parce qu'il seroit affranchy de tant de pestes, lesquelles semblent quelquesfois de vouloir entierement perdre toute la nature.

F. Mais la question est, que l'air s'enuenime par d'autres causes, comme apres vne grande mortalité d'hommes, ou d'autres animaux qui restent sans sepulture, pour la pourriture desquels l'air acquiert vne grande malignité; & d'autant que les corps sont nobles & precieux, d'autant la pourriture est plus grande, & la peste qui s'en ensuit plus cruelle, comme celle qui vint au terroir de Rome apres la bataille des Romains & des Fidenates, & celle qu'naquit en l'armée de Mithridates, premierement à cause de la famine, & puis à cause des cadauers; & vne semblable qui s'aluma en Damiette en l'année 1218. & ie me souuiens d'en auoir leu vn'autre, laquelle apres vne grand' mortalité affligea la Hongrie, & l'Alemagne: & S. Augustin & Sabellicus font mention d'vne tres-cruelle, laquelle durant le Consulat de P. Plautius Hispencil. & M. Fluius Flaccus ruina presque toute la Barbarie, & la Numedie par vne incroyable quantité de fauterelles, lesquelles apres auoir mesme deuoré les escorces des arbres, moururēt, & pourries infecterēt l'air: Apian escrit que la multitude des

grenouilles mortes n'accreust pas de peu la peste d'Esclauonie : & qui chercheroit dans l'histoire, ie crois qu'il en trouueroit plusieurs autres exemples: l'air semblablement, comme dit Galien, se gaste souuent en Esté par les eaux des marests, qui se pourrissent, & se remplit après de semences malignes & venimeuses, cōme il aduint en Ethio-
pie, l'an du monde 3559. & en l'armée des Florentins au mois d'Aoust de l'année 1499. estant campez deuant Pise, entre la Mer & la ville, & encores en Cypre aupres de Famagouste, & en plusieurs autres lieux, dont le recit seroit ennuyeux. Et à ce propos, ie ne veux point oublier vne autre cause de la peste, que Galien a touchée en parlant de celle d'Athenes, descrite par Thucidide, encores que par maniere de doute, où il dit que les vents portent quelquesfois les semences pestilentes d'vne Prouincé à vne autre, comme d'Ethiopie en Grece, & Galié qui a veu tāt de pestes, & qui a esté sçauāt en cete professiō, & en a dit de si belles choses, merite d'estre soigneusement consideré en ce lieu, veu que en contemplant la cause de ceste peste, il cōsidere la grāde chaleur de l'air, les pourritures qui s'engendrent dans les cabanes ou logettes estroictes, chaudes & humides, & les vices ou corruptions des alimens; & finalement la peste d'Ethiopie, qui preceda celle d'Athenes, luy venant en memoire, il considere les semences pestilentes, non comme portées par des meubies, mais par des vents, lesquels par voye de continuation de l'air pestilent peuuent auoir porté la peste en Grece: l'air en fin se gaste, parlant maintenant de celuy de l'Europe, & particulièrement

de celuy qui n'est pas loing de la Mer, par les vêts qui viennent de ceste coste, laquelle commēçant au delà du Nil, s'estend iusques à la Mer Oceane, par delà les Colonnes d'Hercule, region qui est voisine, & sous la voye du Soleil la plus chaude, qui soit en tout le monde: & bien que comme nous disions hier selon Aristote & Hyppocrate, la nature des vents en sa naissance à cause des vapeurs qui l'accompagnent, soit materiellement froide & humide, & apres qu'elle deuienne froide & seiche en la moyēne region de l'air; elle chāge neātmoins ses qualitez en sa voye, plus ou moins, non pas tant pour celles qu'elle y rencontre, comme pour la longueur ou briefueté d'icelle: car si elle passe par vne longue estenduē de terre seiche & esloignée du Soleil, il faut que le vent deuienne grandement froid & sec, comme sont ordinairement ceux qui soufflēt du costé de la terre; si par vn pays chaud, comme l'Afrique, elle acquiert de nouveau sa premiere qualité, d'où vient que les Africains ressentent souuent les vents chauds & secs, lesquels passans apres par la Mer, & receuans quātité de vapeurs deuiennēt chauds & humides: comme nous experimentons avec tous ceux de l'Europe, les vents d'Afrique, que les Latins appellent *Austros*, & nous vents marins; entre lesquels Galien excepte l'Argēstis, c'est à dire le Corns, lequel il dict estre quelquesfois froid & sec, & sās pluyes, encores que i'estime que ce lieu de Galien n'est point correct; d'autant que le Corus selon Aristote & ses sectateurs, n'est point le Libanotus comme dict Galien, car Libanotus souffle entre Notus & Libieus, & s'appellē vulgai-

remēt Lebech; & Corus ou Caurus est l'Argestis, qui souffle entre Fauonius & Trascias, & nous l'appellons Maestral; & ce vent, comme di& Galien est froid & sec, & s& sans pluye, mais il n'est point austrin comme il est escrit. Tous les autres vents austrins sont chauds & humides; & d'autant plus qu'ils arriuent sans violence, & avec peu de mouvement; bien que quelquefois ils soi& pluicieux, autresfois v&apoureux, & ceux-cy plus dangereux que les autres.

M. D'où leur vient, s'il vous plaist, ceste grande malice?

F. Elle vient de ce qu'ils sont les causes du venin qui se treuve en la peste, parce qu'avec la chaleur de l'air, ils ouur&ent les pores de tous les corps pourrissables, l'humidité desquels est augment&e par l'humidité de l'air: outre qu'avec ceste chaleur & humidité les corps humains se disposent à la pourriture.

M. Et qu'en arriue-il?

F. La victoire de l'humide par-dessus la chaleur naturelle, & l'euaporati&on de ceste chaleur, qui est la voye necessaire à la pourriture.

R. Il semble que la commune opinion ne s'accorde point avec ceste doctrine, car on entend commun&ement qu'en la pourriture la chaleur naturelle s'augmente en telle façon par l'abord de l'estragere, qu'elle fait euaporer son humide propre dont elle s'estaint: & ceste opinion est confirm&e par l'experience de la pourriture, qui est vne humeur plus chaude qu'elle n'estoit auant qu'elle se pourrit: on voit pareillement que le fumier est plus chaud quand il se pourrit qu'auparauant.

Nous ſçauons auſſi que toute humeur ſ'échauffe pendant qu'elle ſe pourrit, comme le teſmoigne Hipp. doncques la voye à la pourriture eſt le ſurcroiſt de la chaleur naturelle, laquelle ſ'augmente toujours à l'abord de l'eſtrangere, comme nous voyons que la chaleur naturelle des animaux eſt accreuë par le Soleil, & par le feu: & me ſemble qu'on doit entendre Ariſtote en ceſte façon, lors qu'il eſcrit que la pourriture n'eſt autre choſe qu'une extraction de la chaleur naturelle faicte par l'eſtrãgere, bien que ceſte matiere ne me ſemble pas ſans difficulté.

F. Veritablement ceſte opinion de la chaleur a eſté commune iuſques à maintenant à tous les Philoſophes & Medecins, & moy-mefme alleché de leur authorité; i'ay marché avec les autres, ſans l'entendre aucunement: mais vn petit traicté de Mercenarius m'a faict plus ſoigneuſement conſiderer les paroles d'Ariſtote, lequel ſur la fin du texte 6. monſtre & enſeigne le moyen avec lequel la chaleur eſtrangere eſteint la naturelle, où il dit que c'eſt par extraction, & non par accroiſſement. On adiouſte que la pourriture eſt oppoſée à la generation; ſi doncques la generation ſe faict par la victoire que la chaleur remporte ſur l'humide, la pourriture doncques ſe fera par la victoire de l'humide ſur la chaleur: & Ariſtote dict clairement, que la pourriture ſe faict par le default de la chaleur, & par l'accroiſſement du froid naturel; & partant ſi la chaleur naturelle eſtoit augmentée par l'eſtrangere, ceſte doctrine d'Ariſtote ſeroit faulſe, parce que tant s'en fault que le froid naturel ſ'augmentaſt, que pluſtoſt il ſ'eſteindroit pa-

L'accroissement de la chaleur: d'auantage si la chaleur naturelle s'augmentoit à cause de l'air chaud & humide, il ne suruiendroit aucune disproportion entre luy & son humide, parce que l'humide croistroit pareillement: outre que la pourriture ne seroit plus la victoire des qualitez passives, si le froid croissant, la chaleur venoit semblablement à croistre, ce que non seulement repugne à Aristote, mais encore à la mesme experience des choses qui se pourrissent, lesquelles sont premierement humides, & puis seiches, terre & poudre: finalement ceste opinion est fortifiée de ceste consideration, que si l'accroissement de la chaleur naturelle pardessus l'humide estoit cause de la pourriture, il s'ensuiuroit necessairement, que moins les corps seroient humides, d'autant plus facilement ils se pourriroient, parce que la chaleur naturelle auroit moins de contraste à surmonter son humide: mais l'autorité de tout le monde confirmée par l'experience, nous enseigne que plus les corps sont humides, plus ils se pourrissent facilement: & moins sont-ils humides, i'entends d'une humidité qui mouille, plus ils se conseruent, pource qu'en ceux-cy difficilement la chaleur naturelle est surmontée par l'humidité.

M. Comment humidité qui mouille? quoy toute humidité ne mouille-telle point?

F. Non, parce qu'estre terminable par les termes d'autrui, & interminable de ses propres termes, qui est la definition de l'humide, conuient non seulement à l'humide de l'eauë qui mouille, mais aussi à l'humide de l'air qui ne mouille point, mais qui desseiche, dit Auerroës, ains elle conuient

plustost à l'humide de l'air, que de l'eau, dict Aristote: d'où plusieurs Philolophes ont pēsé qu'aux elemens vne seule qualité dominaſt ſur l'autre, que la terre fuſt plus ſeiche que froide, le feu plus chaud que ſec, l'eau plus froide qu'humide, & l'air plus humide que chaud, mais non pas d'une humidité qui mouille, puis qu'elle deſſeiche, & partant elle reſiſte à la pourriture: c'eſt pourquoy Aristote eſcrit que les graiſſes ne s'affranchiſſent point de la pourriture, que pour autant qu'elles contiennent beaucoup d'air: de façon que pour toutes ces raiſons l'opinion commune de l'accroissement de la chaleur paroist fort foible, quoy que ſouſtenuë par des hommes tres-renommez.

R. Contre laquelle, outre le dire d'Aristote on pourroit produire l'experience de la chaleur d'Esté, laquelle n'accroist point la chaleur naturelle, ains l'affoiblist, l'eſpand, & la tire hors du corps.

F. Ceste raiſon, priſe de l'experience, a veritablement du ſenſible & preuue, que non ſeulement la chaleur naturelle ne croist point par l'eſtrangere, mais que meſme elle croist par le froid eſtranger: ce qu'a fort bien veu le Prince de la Medecine, quand il eſcrit que les corps en Hyuer ſont tres-chauds. *Que penſez-vous, Monsieur?*

R. J'allois penſant à la cauſe qui a peu mouuoit tant de ſçauants hommes à deſſendre ceſte opinion, & ie n'en puis trouuer d'autre, que celle des ſiebures pourries, parce que celle qui dict que la chaleur augmente la chaleur me ſemble frivole, par l'experience de l'Esté deſia ditte. Mais aux ſiebures pourries, il ſemble que l'accroissement de la
chaleur

chaleur naturelle forme la fiebure, encores que l'effect des fiebures pourries me semble different de celui de la pourriture.

- F. Si ie ne me trompe, vous auez prudemment desnoüé ceste difficulté, parce que l'alteration du sang, qui naist le plus souuent à cause de l'empeschement de la transpiration, n'est pas proprement pourriture, & le sang de la veine caue ne se peut dire pourry aux fiebures pestilentes, non pas tant pour ce qu'il seroit impossible que l'animal vesquist, comme parce que le mesme sang que les Medecins appellent pourry, en plusieurs fiebures malignes retourne à son premier estat, ce qui ne peut estre en la pourriture descrite par Aristote: outre que nous voyons aux apostemes que le sang desia pourry, ou qui commence à se pourrir, ne peut estre regi par la nature: & toutesfois ie ne crois pas qu'on puisse nier qu'aux fiebures pestilentes, quelque partie du sang ne commence à se pourrir, & que finalement estant tout a fait pourry, il est chassé dehors par la nature.
- R. On ne peut doncques pas dire, qu'aux fiebures pestilentes la masse du sang soit pourrie, mais qu'elle est alterée, & s'auance à la pourriture: & aux instances on respond, & premierement à celle de la pourriture, ou bouë, que nous voyons dans les corps humains estre chaude, & presque corrosiue, que si la pourriture n'est autre chose que la dissolution de l'humide par le sec, & l'extinction du chaud, & la domination du froid naturel, il n'est pas possible que la susdite bouë soit vn sang parfaitement pourry, premierement parce qu'elle est chaude, en apres parce qu'on ne voit point en elle

cette dissolution, sans laquelle la pourriture n'est point parfaite.

F. Il me semble d'auoir leu dans Mercenarius, au traitté des vers qui engendrent de la pourriture, que quelques-vns, non sans raison ont glosé la definition de la pourriture d'Aristote, disant, qu'elle est quelque corruption de la chaleur naturelle.

R. Ils ont tort d'alterer les paroles d'Aristote sans nécessité, & ie crois que l'erreur est en ce qu'ils confondent la corruption avec la pourriture, qui different neantmoins comme le genre & l'espece, parce que la pourriture ne conuient qu'aux corps mixtes, & la corruption à tous simples & mixtes: ce qui est pourry est bien corrompu, mais ce qui est corrompu n'est pas pourry: l'homme se corrompt, & deuiét vn cadauer, mais il n'est pas pourrât pourry: l'aliment se corrompt dans l'estomach d'où le chile s'égèdre, mais on ne dira pas pourrât que l'aliment soit pourry: les choses pourrissables se corrompent premierement, & puis se pourrissent, & partât selon Aristote la pourriture a commencement, milieu, & fin; le commencement, lors que les choses qui se pourrissent paroissent humides: la fin, lors qu'elles paroissent seiches, c'est à dire, quand la dissolution est parfaite, demeurant terre & poudre: il est donc raisonnable, que le milieu de la pourriture, soit lors que l'humide de dehors est creu, en façon que la dissolution soit à demy faite, & le mixte corrompu, telle sans doute est la boüe des apostemes, & partant l'extinction du chaud n'estant pas encore parfaite, la chaleur demeure comme qualité, pour dire

ainfi, symbolique, laquelle s'estaint entierement, la dissolution estant accomplie: & ceste bouë qui s'engendre du sang enflammé, & colérique, est beaucoup chaude, & ainsi la difficulté de la chaleur de la pourriture, & de la generation des vers vient à cesser.

F. J'ay pris plaisir en verité à cest aduertissement qui n'a esté oublié de pas vn des interpretes, & quant à la difficulté que fait la chaleur de la bouë, on y peut satisfaire encores d'vne autre façon qui ne contrarie en rien à tout vostre discours, disant que la bouë est vn corps composé de sang desia corrompu, & de ces fumées qui ont esté la cause efficiente de la pourriture, & encores de la chaleur influëte de l'animal qui court, furieuse où la bouë s'engendre, comme en vn lieu offensé. Et au doute du fumier, & du marc des raisins qui sont choses chaudes, on respond qu'elles sont composées de choses chaudes & ignées, lesquelles enfermées dans le fumier ou marc de raisins bien vnies & serrées s'allument & produisent dauantage de chaleur, ce qu'on ne voit pas quand le marc ou fumier sont espars.

M. Dictes-moy de grace, si la pourriture est l'extinction de la propre & naturelle chaleur, ie ne sçay si la mort des vieillards est sans pourriture?

F. Voila vn doute bien gentil, auquel Aristote respond, que la vieillesse aux animaux, & la seiche- resse aux plantes n'est point pourriture, mais voye à la pourriture, & bien que les choses animées soient mixtes parfaits, auxquels seulemēt la pour- riture conuient, toutesfois elle ne leur conuient pas comme à choses animées, mais comme mix-

tes, mesme depuis qu'elles manquent d'estre animées: & partant la mort naturelle des animaux & des plantes, n'est point pourriture, parce qu'elle ne se fait point par la chaleur du dehors, mais elle est voye, comme dict Aristote, à la pourriture.

- R. Ce qui d'abondant rend claire ceste responce, c'est de considerer que la pourriture qu'Aristote explique aux Meteores, est seulement contraire à la generation qu'il definit au mesme lieu, laquelle ne conuiet qu'aux mixtes comme mixtes.
- F. Doctement, parce que la generation qui conuiet à tout ce qui est generable & corruptible, est definie par luy-mesme au liure qu'il a fait de la generation & corruption: celle qui conuiet aux choses animées, entant qu'animées est definie aussi de luy au petit liure qu'il a fait de la vie & de la mort: finalement celle qui conuiet aux mixtes parfaits entât que mixtes, est definie encore au quatrième des Meteores: la corruption est opposée à la premiere, à la seconde la mort, à la troisieme la pourriture, à laquelle retournât ie dis, qu'elle multiplie & croist merueilleusement, selon l'opiniõ de tout le monde, à cause de l'air chaud qui est tel par les vents du Midy, & partant les choses pourrissables cõmencent pour les raisons susdites à se pourrir, & d'elles s'esleuent des vapeurs ennemies de la nature humaine, puis apres l'air chaud & humide venant à perseuerer, la pourriture croist, & arriuat au degré de la corruption, vne multitude de vapeurs & pires que les premieres, s'esleue en l'air, que nous attirõs par la respiration, qui sont telles qu'elles peuuent produire en nos corps des effets semblables à leur cause, comme sont les fiebures

pourries, malignes & pestilentes.

M. On peut doncques asseurer que ces vents pestilents font vn plus grand fracas, où les choses sont plus pourriffables.

F. Ceste cōclusion qui semble faite à l'auenture, sort d'elle-mesme de la nature des choses, parce que si l'air pestilent, entant que tel n'est autre que celuy qui cōtient en soy les semēces ou petits corps venimeux, cōme nous auons desia monstré, si pareillement ces semēces venimeuses sont engendrées de la pourriture, si la pourriture s'engendre de la chaleur & humidité de l'air qui nous enuironne, il s'ensuit necessairemēt que l'air est plus pestilēt, où il y a plus de semences, & petits corps venimeux, & qu'il y a plus de semēces où il y a plus de pourriture, & que plus de pourritures s'engendent où les choses sōt en quantité & qualité plus pourriffables, cōme eaux, herbages, immondices, excemens de toutes sortes, spẽcialement des hommes, ordures, humidité, & choses semblables.

M. On sçait que telles ordures se treuuent en la multitude des peuples dans les nauires, mais plus dans les galeres subiectes à plus grande multitude: mais vous n'avez point parlé iusques ici d'aucune autre cause de la peste, horsmis de celle qui viēt de l'air.

F. L'ordre encommencé demande que ie donne des exẽples des pestes qui viennent du souffle des vêts meridionaux; mais puis que personne de nous n'ignore que des 10. les 7. viennent d'vne telle cause, ie tairay celle de l'an 1347. & 48. celle de 24. & 28. & plusieurs autres semblables, que tous sçauent auoir esté produites des vents chauds & humides, outre que toutes ont esté recueillies, & veritable-

mēt avec vn loüable soin de Gratiola de Salo: iufques icy nous auōs fuffifammēt discouru de l'air, & recité combien de caufes le rendent venimeux & pestilent: maintenant,

M. Arreftez-vous, ie vous prie: il eft conuenable que ces vents chauds & humides foient plus pernicioeux où il y a plus d'ordure: mais croyez-vous, que pour quelque autre occafion ils foient plus dommageables en vn lieu qu'en vn autre.

F. Oüy, Mōfieur, pour plusieus: & me femble que i'ay dit vn peu auparauant à caufe de la difpofition des corps humains, entre lesquels ceux qui font nourris plus fobremēt, avec des alimēs plus loüables, refiftent mieux que les autres à la malice de tels vents: pour les immondices & humiditez des lieux, comme Ceriane, mouillée perpetuellement des eaux, & fale, pour tant de pourcéaux qu'on y voit, pour la fiteuation, parce que les lieux bas fōt ordinairement plus humides que les eminent, & ceux qui font moins expofez à la Tramōtane, que ceux qui le font dauantage, aufquelles qualitez Galiē a pris garde en Tafus & Cranon. La ville de Nerue eft beaucoup fubiecte aux vêts de Midy, & au couuert de la Tramontane, c'eft pourquoy elle abonde en fleurs Printannieres.

M. Et penfez-vous que fi elle auoit cefte mōtagne pour fe couvrir du Midy, cōme elle fe couvre de la Tramontane, qu'elle fe fust garentie de la peste?

F. Qui en doute, ne voyōs-nous pas que le quartier de S. Tho. quoy qu'il fust bien peuplé a eſté moins offencé à caufe de ces peu de répars du quay & du port, que celuy du coſté de S. André qui reçoit les vêts meridionaux fans aucun empeschemēt, parce

que le vent pestilent qui porte l'humidité en laisse vne partie aux répars: dauantage, ne voyons-nous pas que Pôte-decimo pour estre vn lieu creux, où il semble que le vent qui vient de la Mer, & coule tout le long de la vallée s'arreste, a receu plus d'humidité australe, & partât la cause d'vne plus grâde pourriture?

M. Je crois que bien peu de personnes ont pris garde à tout cela durant ceste peste.

F. Je le crois aussi, toutesfois les maistres de ceste profession, Hipp. & Galien l'ont fait en plusieurs lieux, où ils discourent de semblable matiere: Cōcluons donc que l'air pestilent n'est autre chose qu'vn air rempli de petits corps venimeux esleuez avec les vapeurs de la terre. Reste maintenant à parler de l'alimēt vicieux, qui est l'autre cause principale de la peste, qui se rapporte seulement au boire & manger, car lors que pour exēple, vn peuple, ou vne armée se nourrist d'alimens vicieux, ce qui arriue le plus souuēt aux grâdes chertez, il tombe facilement en vne maladie pestilente.

M. Je crois qu'vne telle peste naist souuent dans les armées, lesquelles pour plusieurs causes sont reduites à vne necessité de viures. (Plutarque escrit celle qui affligea si cruellemēt l'armée d'Alexādre dās les deserts à faute de viures, & dans les villes assiegées, comme à Marseille, à cause que les Habitans furent contraints de manger du vieux millet, & de l'orge gasté: A Rome, en l'an 538. assiegée par les Gots, & en l'armée de dehors pour la mesme cause que Procouius raconte, en Paue, pressée par Charlemaigne, l'année 776. en Damiette assiegée par les Chrestiens, mil deux cens

dixhuit, & en plusieurs autres villes & armées, où à cause de la famine plusieurs tres-cruelles pestes s'ont suruenues. Il me semble d'auoir leu le mesme des eues bourbeuses, ou qui comencēt à se pourrir, ou des eues empoisonnées du lin, chanvre & choses semblables, pour lesquelles toute vne armée apres en auoir beu deuint malade, avec la mort de plusieurs: il faut donc dire que les humeurs se pourrissent à cause du manger & boire commun & gasté, mais ie m'estonne que ces maladies soient pestilentes.

F. Tres-pestilentes, parce que par telles viandes & breuuages, qui commencent à se pourrir, le sang se tourne à la pourriture, plusieurs deuiennent malades & meurent, qui sont conditions essentielles, & necessaires de la peste.

M. Il faudroit scauoir si l'on pourroit tirer des Princes de la Medecine, quelques causes, outre celles qu'on a desia recitées.

F. On n'en tire point d'autres: & l'on cognoist clairement par le suffisant denombrement de toutes celles que la plus grande partie des Historiens plus renommez, & de tous les Medecins plus excellēs, & versez en la peste a remarquées, le tesmoignage desquels deuroit seruir de croyāce entiere à nous qui sommes nouueaux, & sans experience en ces choses, que la peste estāt vne maladie cōmune, ne peut auoir qu'vne cause cōmune, à scauoir l'air, & les alimēs cōmuns: & par consequent il repūgne à la nature de la peste, de dire, que d'vn fomes pestilent, qui est vne cause particuliere, elle qui est vne maladie commune & vniuerselle en puisse deriuer.

R. Ou bien il fault dire, que ces pestes anciennes estoient d'autre nature, ou que ces Medecins bien que tres-excellents & maistres des autres n'ont point pris garde à la furie de ceste contagion. Car on voit par experience que plusieurs pestes, comme celles que ie recitay l'autre iour, & particulièrement la nostre d'aujourd'huy, n'ont eu que la seule contagion pour leur cause. Et comme vous sçaués, Monsieur, parmi les Medecins l'experience a plus de force qu'aucune raison & authorité, encores que les raisons fussent fortes, & l'authorité tres-grande.

F. Cecy est vray non seulement selon les Medecins, mais encores selon les autres de quelque profession qu'ils soiēt; & sçachés, Monsieur, que les puissantes & fortes raisons, & l'authorité des hommes si grands ne m'ont pas tant destourné de la croyance de la commune opinion, comme l'experience que i'en ay faiēt en ceste peste, & celle que plusieurs autres en ont faiēt aux autres pestes.

M. Chose estrange que vous-vous fondez tous deux sur vne experience, & toutesfois vos opinions sont contraires, il faudroit sçauoir en quoy consistent vos experiences, & les balancer.

R. Ie me remets à celles que ie racontay la seconde iournée, adioustant pour plus grande lumiere que de dire que la peste se peut alumer d'un fomes pestilent; ce n'est point contredire à la maxime alleguée, que la peste qui est vne maladie cōmune doit auoir sa cause cōmune, parce que les fomes en sa propagation, ressemblant au feu, est vne cause qui peut produire vn effect vniuersel.

F. Veritablement Monsieur Ratto dit ce iour là tout ce qu'on ſçauoit dire en faueur, & pour la defence de la commune-opinion, laquelle quoy que ſi repugnante à l'authorité, à la raiſon, & à l'experience, eſt neantmoins ſuiuie, à mon auis, pour deux cauſes. La premiere, parce que ceſte opinion eſt fort enracinée, (difficilement ſe peut infecter, qui ne touche aux choſes infectées:) l'autre depend de la premiere, parce que ceſte opinion ainſi conſtante & enracinée faiſt qu'apres on prend vne cauſe pour vne autre; i'en donneray vn exemple aſſez vulgaire, vne femme mange les années entieres des viandes groſſieres & ailées à ſe pourrir; en yurognant, il arriue qu'vn iour elle ſe met en cholere avec ſa ſervante, & de là à deux iours elle tombe malade, eſtât interrogée de la cauſe de ſon mal, elle l'attribue à la ſervante, ſans conſiderer le deſreiglement de ſon viure pour eſtre vne cauſe eſloignée, en laquelle elle a acquis vne habitude cōforme à ſon gouſt: or on voit que ceſte femme prend vne cauſe pour vne autre, & meſme qu'elle prend celle qui parauenture ne peut eſtre la cauſe de ſon mal, ſans penſer à celle qui l'eſt veritablement. Vn qui eſt remply de très-mauuaiſes humeurs & d'opilations prend la peſte, bien qu'il ſe ſoit contrégardé du fomes plus que les autres, & auſſi toſt il va cherchant la cauſe, examinât toutes ſes actions, que ſi par hazard il ſe ſouient d'auoir touché quelque monnoye, d'auoir parlé à quelqu'vn qui a eu la peſte, c'eſt à cela qu'il attribue la cauſe, qui ne le peut eſtre, & nous auons veu en ceſte peſte vne infinité de ſembla-

bles exemples.

- M. Quelle experience vous meut elle à croire que ceste peste est venuë de l'air?
- F. Qui prouue que le fomes pestilent n'en peut estre la cause, il preuue suffisamment que ceste peste est prouenuë de l'air, puis que nous sommes d'accord qu'il n'y a point d'autre cause; & puis c'est vne chose superflüë de preuuer ce qui paroist plus clair que le Soleil, par les choses que nous auons desia dictes, paroe qu'il ne faut que considerer la constitution desia recitée, l'opiniõ d'Hippocrate approuuée par tous les autres Medecins, specialement la peste descrite par luy mesme, & apres se représenter la qualité des saisons passées, pour iuger que veritablement ceste peste est venuë de l'air pestilent: parce que si la constitution de l'air austral durant six mois & moins encores, peut engendrer vne peste, cõme tesmoigne Galien & tous les autres Medecins: si pour allumer la peste en Cranon vn seul Esté austral fut suffisant, pourquoy est-ce qu'vne année semblable ne fera le mesme à Genes? Or que durant vn an entier ces vents aient precedé, il est clair, ayant commencé par l'inondation qui rõpit plusieurs chemins au cõmencement de l'Hiuer de l'année 1578. & qui tira apres soy tât de la terre des Arcs, laquelle cloist le chemin du saint Esprit: & qui ne se souuient cõbien tout cest Hiuer fust humide, & combien peu les Aquilons regnerent? & puis vn Printemps chaud, egal, & gracieux ne succeda point à vn tel Hiuer, qui engendra dans les corps plusieurs superfluités, mais vn Printemps inegal, perseuerant tousiours les

vents Austrins: & si vn Esté chaud & sec, comme il est ordinairement, eust suiuy deux telles saisons, il eust corrigé leur malice en desseichant les humiditez qui estoient desia dans les corps. Mais voicy vn Esté grandement intemperé, froid, eu esgard à sa nature, & tres-humide par le continuel soufflement de Siroc & Lebech, lesquels rendirent la Mer sans intermission orageuse. D'auantage, il fut tres-humide, non pas d'une humidité pluuiieuse, qui purge l'air quand elle est forte, en descendant, mais au contraire d'une humidité nuageuse & tenebreuse, beaucoup pire que la premiere, parce qu'elle penetre dans les corps, & les remplit d'humidité, les disposant apres à la pourriture: en signe dequoy on vist tout l'Esté le Soleil qui paroissoit couronné. Que si l'Hyuer & le Printemps furent mauuais, & l'Esté pire, l'Automne le fust bien d'auantage, parce qu'il ne fust pas froid & sec comme il doit estre, mais chaud & humide, d'une double humidité pluuiieuse & vaporeuse, & la pluuiieuse descendant fort menue, elle entroit dans les corps facilement avec la nuageuse accompagnée de la chaleur cause de la pourriture; de sorte qu'on sentoit manifestement en l'air, non seulement ceste humidité chaude & veritablement pestilente, mais encore la puanteur de la pourriture vniuerselle, qui pour la longueur du temps estoit presque reduite à sa perfection, les vents pestilents ayant perseueré tout l'Automne iusques au mois de Decembre. Or pour sçauoir si ce temps fust comme ie l'ay descrit, il y faut seulement auoir pris garde, outre que chacun s'en doit souuenir. Et pour plus

grande preuve, i'ameine le tesmoignage de Hierosme Fausto, lequel ayant demeuré toute l'année à Carignam, eut le loisir de faire ceste observation.

- M. Et en confirmation de cecy on pourroit dire que le Ciel nous menaça de ceste peste : car encores que les Astrologues ne la predissent point clairement, toutesfois ie me souuiens que calculant l'année 1579. vers le meridiē de Genes, ils predirent pour la demeure de Saturne en Aquarius tous ces vents Austrins, toutes ces humidités, & plusieurs maladies.
- F. Tres-subtilement, & ie laisse à part l'Eclypse du Soleil, parce qu'elle fut trop Occidentale : mais on scait bien que les Astronomes predirent l'an 1578. des maladies pestilentes, outre l'Eclypse de la Lune le 25. de Septembre, & outre la Comete qui preceda au mois de Nouembre 1577. & à tous ces signes mal-heureux se ioignist la coniecton de Mars auēc Saturne faicte en Capricorne, signe maling & maison de Saturne le 24. de Mars 1578. Fracastor escrit que l'an 1528. fust precedé d'un Hyuer austral & pluuieux, en facon que plusieurs riuieres inonderent, & les nuages & obscurcissēmēs de l'air furēt frequēs, d'oū Montan dict que plusieurs Medecins predirent la peste. Si doncques la nostre ne fust pas seulement precedée d'un Hyuer austral & si fort pluuieux que les eaux remplirent tout, mais aussi d'un Printemps & d'un Esté austral & sombre, qui sans cesse poussoit la Mer cōtre nos escueils, & finalement d'un Automne tres-meridional, chaud & humide, voire mesmes tres-pestilent,

& si encores on vit les charbons vaguer parmi le peuple, signe selon Galien de l'air pestilent, que sert-il de douter si elle vient de l'influence de l'air? Et n'est pas hors de propos, si nous considerons que la peste commença en Automne la pire des saisons, & en laquelle celle qui vient de la malice de l'air deuiet plus furieuse, parce que bien que la peste se puisse allumer en toute saison, l'Automne neantmoins est plus propre à vne telle mortalité, parce qu'il treuve les corps plus disposés à la receuoir, ainsi le dicte la raison, ainsi le tesmoigne Auicenne & Rasis, avec plusieurs autres Medecins, ainsi le confirme l'experience de plusieurs pestes qui se lisent dans les Histoires. Et ie ne m'estendray point à vous faire souuenir des fruicts qui furent tres-abondans en Esté, ny de la multitude des poissons lesquels estants portés en tous les quartiers de la ville on ne pouuoit vendre, ny des souris sans nombre, & d'autres petits animaux que les femmes appellent chattes qu'on vit sur les arbres, marques certaines de la pourriture. Et ne doit-on passer sous silence ceste consideration que la malice de l'air fust beaucoup aidée de la mauuaise nourriture, parce qu'à faute de meilleurs grains, les Boulangers faisoient du pain d'vn froment qui commençoit à sentir le pourry, le pain duquel estoit fort propre à fauoriser l'air, disposant à la peste les corps de ces miserables qui sont morts, qui s'en nourrirent l'espace de deux mois. Il me semble que ie me travaille apres la preuue d'vne chose tres-claire: ne sçait-on pas que la constitution australe s'en allant vn peu auant la feste de

Noël, & venant la Tramontane, qui dura 70. iours continuels, la mortalité se modera tellement que la ville fust presque restablie à la désirée sânté, & mesmes vn iour se passa sans aucú mort ne malade: qui ne sçait qu'au mitan de Mars les accidens multiploient, la Tramontane ayant cedé aux vents de Midy l'espace de 10. iours, comme si la santé & l'aquilon establissoient ensemble leur Empire? d'où vient que les Corbeaux, & fossoyeurs mouroient avec beaucoup de peuple, & durant la Tramontane, tant s'en faut que les autres mourussent, que ces Corbeaux & fossoyeurs mesmes ne mouroient point, bien qu'ils entraissent dans les maisons des-infectés, qu'ils les purgeassent & nettoyassent, maniant, portant, & mettant sur leur dos les habits des malades & des morts, d'où il arriva que l'hospital se conserva de la mesme sorte que la ville; dans lequel on enfermoit tant de malades, tant de morts, tant de vestemens de personnes infectez, tant de lin, tant de laine, qu'il en falloit pour 25. mille personnes, & toutesfois on sçait que qui les manioit en temps sec n'estoit point atteint, & en temps humide deuenoit malade.

M. On en a veu neantmoins mourir plusieurs durant la Tramontane.

F. Il est vray, mais peu de temps apres que les vêts austrins eurent cessé.

M. D'où vient cela?

F. Cela vient de ce que l'alteration qui precede la generation des semences pestilentes se faict en temps, & comme les vents meridionaux ne les

auoient peu engendrer, sinon en temps, ainsi ne se pouuoient elles soudainement corrompre à l'abord de la Tramontane, mais on voyoit clairement, que le temps venant à continuer, le mal diminuoit; & à mesure qu'il s'auançoit, la ville & l'Hospital se guerissoient: d'où l'on cognoist clairement qu'on ne s'infectoit point pour toucher les vestemens des infectés.

R. On pourroit respondre que la Tramontane desseichoit les semences pestilentes dans les habits, lesquelles en temps humide s'effarouchoiēt.

F. Ceste response, outre qu'elle n'a point de lieu, (à cause de l'experience manifeste des malades, & des morts qui multiplioient durant le regne des vents meridionaux, non seulement parmy les Corbeaux, mais parmy ceux qui ne manioient pas, ains fuyoiēt comme la mort tels vestemēts, signes euidents qu'ils n'en estoient pas la cause) est impertinente encore, parce qu'on a pris garde, qu'au lieu des Corbeaux qui estoient morts durant la saison humide, les neuf autres qui furent establis apres auoir manié les vestemens des infectez en temps sec sans aucun dommage, sont morts apres ne maniant que les mesmes vestemens qui estoient desia presque nettoyez: elle est encore impertinente, parce que tant s'en faut que les semences pestilentes, qui sont venins s'effarouchent en temps humide, qu'au contraire elles s'affoiblissent, veu qu'elles sont des mixtes parfaicts, puis qu'elles sōt de petits corps qui ont tenacité, viscosité, & vne forte mixtion, comme vous aués mōstré: si donc les mixtes parfaits sont suiets à dissolution à cause de l'air chaud & hu-
mide

miſe qui les enuironne, pourquoy eſt-ce que les ſemences qui ſont corps de meſme nature, ne ſeront ſuiettes à perdre leur tenacité, leur mixtion, & à ſe diſſoudre par le meſme air?

R. Le ſemblable ſe conſerue & croiſt par ſon ſemblable: ſi ces ſemences donc ſont pourritures ou vapeurs pourries, elles ſe doiuent conſeruer, & accroiſtre en temps humide; & non pas ſe diſſoudre: dauantage, ſi là où l'air eſt chaud & humide la peſte deuiet plus cruelle, comment voulez-vous que les ſemences peſtilentes, qui ſont ſes instruments, le deuiennent auſſi: ſi d'un autre coſté elles ſ'affoibliſſent & viennent à ſe reſoudre & à ſe perdre?

F. Toute choſe ſe conſerue par ſon ſemblable; il eſt vray, mais les ſemences peſtilentes ne ſont ny pourriture ny ſemblables à la pourriture, ſinon par generation; & ont leur forme, qui fait qu'elles ſont venin, fort différente de la forme de la pourriture, comme l'ont auſſi les ſouris, & les vermiſſeaux. Dauantage il eſt vray qu'en temps chaud & humide la peſte deuiet plus cruelle, mais non point les ſemences, parce que le redoublement de la peſte ſe faiçt par la multiplication de la pourriture, & par conſequent des ſemences peſtilentes qui ſ'engendrent d'elle de nouveau: Mais celles qui ont eſté auparauant engendrées eſtant corps mixtes & ſuiects à l'alteration de l'air, ie ne ſçay pourquoy elles ne ſont ſuiettes à la pourriture, corruption & diſſolution comme les autres mixtes: & partant ſi les Corbeaux mouroient en temps humide & ſe garantiſſoient en temps ſec, cela ne venoit point des ſemences

pestilentes qui estoient dans les vestemens, lesquels en temps sec se desseichassent, & en temps humide vinssent à se dissoudre, mais la vraye cause estoit l'air pestilent qui estoit tel plus en temps humide qu'en temps sec.

M. Vous ne croyez donc pas que ce mal soit contagieux ? que les vestemens des infectez conseruent la contagion ? & que plusieurs sont morts par la seule conuersation ?

F. Je crois & tiens pour certain avec Aristote & Galien que ceste maladie est contagieuse de la mesme sorte que le mal des yeux, la gale & les fiebres malignes, lesquelles suruiennent aux hommes hors du temps de peste. Et comme les qualités materielles chaud, froid & semblables ont vne grãde estẽduë, & sont plus ou moins telles, ainsi doit-on croire que la contagion a son estendue, estant plus ou moins contagieuse. Mais ie crois bien que la peste ou pour mieux dire que les infectés sont moins contagieux, qu'on ne croit communement: & crois dauantage, qu'excepté les robes qui ont esté à l'entour des malades, toutes les autres bien que touchées & maniées par des personnes suspectes, & mesme par les infectées ne conseruent point la contagion. Et tiens pour tres-assuré que de 100. malades ou morts de peste le 80. pour ne dire 90. l'ont esté pour la constitution de l'air pestilent, & que bien peu sont morts pour auoir manié ces habits.

M. Vous avez tort, Monsieur, par-ce que nous-nous souuenons d'une infinité, qui furent attaquez, & moururent pour auoir touché ces vestemens.

F. Pardonnés-moy, Monsieur, c'est là où consiste l'erreur de prendre vne cause pour vne autre. L'opinion que les hommes ont conceuë de la contagion des habits est si forte qu'elle ne permet point de voir le contraire en l'experience de tant de personnes qui nettoioient les maisons infectées, de tant qui ont porté & manié les habits des infectez, & en fin de tant qui ont esté deputées en Breuei pour efforer grande quantité de soye ou de draps de soye, qu'on tiroit tous comme des entrailles des infectés : outre ceux qui estoient occupés au mesme exercice à l'hospital Cloaque de toute ceste peste.

M. Parauenture auoient-ils quelques preseruatifs.

F Il est vray, mais leur preseruatif estoit de manger & boire assés & souuent, mais combien en voyons-nous auourd'huy qui viuent, lesquels ont manié par plusieurs iours les mesmes infectés & leurs habits sans aucun dommage ? marque tres-euidente que la mortalité ne vient point des habits, mais de l'influence. Et veritablement ceste experience des habits touchez & maniez, avec celles des morts qui ne multiplioient point sinon en temps humide, est si claire, que ie ne vois point comme on s'y puisse opposer sans opiniastrété. Je laisse à part comme la peste venant de Ponte - Decimo elle deuoit plus-tost infecter Sestre & les lieux voisins sans murailles, & presque sans garde, qu'une ville enfermée de murailles avec tant de garde & tant de soing. Mais pour aller plus auant, si vous desirés de sçauoir si ceste peste vient de l'air ou d'un fo-

mes pestilent, dictes-moy par courtoisie, Monsieur, quelle preuue en feriez-vous pour en sçauoir la verité?

M. On la feroit facilement, en mettât dans vne ville les habits des personnes infectez, & les faisant manier par 100. pour exemple condamnez à la mort par la Iustice, de mesme façon qu'on espreuue la force d'un venin, & la vertu d'un contrepoison, en dōnant le venin à plusieurs des condamnez : que s'ils mouroient tous ou la plus grande partie sans qu'ils peussent mourir par autre voye, (pour ne commettre l'erreur que vous aués dit de prendre vne cause pour vne autre) il semble que le venin seroit fort puissant; & n'en faisant mourir aucun, qu'il seroit sans force, faisant la preuue aussi du contrepoison en ceux qui seroient prests à mourir.

F. Vous ne pouuiez mieux respondre Monsieur, mais on desire sçauoir si les habits des infectés sont si venimeux comme on bruit communement? car on en a fait la preuue de la mesme façon, en faisant manier ces habits à ceux qui nettoioient les maisons, lesquels s'ils fussent tous deuenus malades ou morts, ou la plus grande partie, sans dommage de ceux qui ne les manioient point, on deuroit adiouster foy à la commune opinion: mais si le nombre des malades ou des morts parmy ceux-là n'estoit pas plus grand que parmy ceux-cy, & mesme de tous ceux qui nettoioient les maisons, vn seulement n'est point tumbé malade à Breuci; & de ceux qui ne touchoient rien, il en est mort vn si grand nombre, qu'en dirés-vous? Mais pourquoy tra-

uaille - ie à produire tant de tesmoignages, si l'on en a faict l'espreuve de nouveau en la maison de Monsieur Pol Spinola, auquel non point à Ponte-Decimo, mais dans la ville & en sa propre maison deux ou trois personnes sont mortes de la peste maniées par d'autres qui ont apres conuersé par tout sans la faire renaitre. Et pour confirmer cecy d'auantage, i'apporteray vne plus grãde preuue qui en a esté faite du depuis dans nostre grand hospital, la seconde feste de Noel ou dans trois iours vne femme mourust avec vne enfleure en laine, & la petite verolle, avec des vomissements continuels, à qui non seulement ie touchay le pouls, mais elle fust maniée avec ses habits & s^{on} lict, sans qu'õ les eut efforés, par plusieurs seruantes & femmes malades, desquelles le lieu est tousiours remply : & neantmoins la peste ne s'est point renouvellee, ny aucun accident pestilent, ains mesme ie crois que celuy-là a esté le dernier de toute nostre peste.

- M. Il faudroit faire la mesme preuue, s'il estoit possible, des vents meridionaux, à sçauoir s'ils sont suffisants pour produire la peste.
- F. On le peut faire en prenant garde à la durée de leur violence, & à la mortalité qui en prouient pendant qu'ils regnent, à sçauoir si elle est grande, & si bien peu de personnes meurent en temps sec. Et ces experiences sont veritables que les Princes de nostre profession ont obseruées & qui ne trompent point, en faisant prendre l'vn pour l'autre. Je me souuiens

encore d'auoir souuent demandé au mois de Ian-
 uier à ceux qui portoient sur les espaules les ha-
 bits des infectés qui n'estoient encores ny net-
 toyés ny essorés, si durant le temps sec, quel-
 qu'un de leur bande estoit mort ou tombé ma-
 lade, ils respondoient que non, bien qu'auant
 Noel pendant que les vents fort humides re-
 gnoient plusieurs d'entre-eux mourussent, com-
 me aussi vne infinité d'autres, lesquels ne faisant
 point ce mestier avec leur opinion enracinée de
 la contagion des habits taschoient seulement de
 fuir la mort en fuyant ces habits, dans lesquels
 ils la croioient voir avec leur propres yeux. Le
 commun & les Medecins mesmes creurent que
 la peste qui fust à Palerme & autres endroits de
 la Sicile l'an 1575. escrite par l'Ingrassia, fust
 causée d'un fomes apporté dans vne galeote de
 Barbarie, sans considerer que tout l'Hyuer pre-
 cedant & la plus grande partie du Printemps
 auoient esté meridionaux avec si grande quanti-
 té d'eaux, que l'Ingrassia escrit, que iamais on ne
 veist de semblables inondations; outre que les
 vents Siroc & Lebech, & les vents meridionaux
 continuerent avec des frequentes mutations de
 temps, suiues d'une influences de petite verolle
 qui fit mourir plusieurs petits enfans: mais que
 suruenant en l'uin vn Siroc tres-cruel non moins
 pour sa violence, que pour sa longue durée, la
 peste commença d'attaquer les pauures, com-
 me c'est la coustume des pestes. Et ie ne man-
 queray point à dire qu'une telle constitution
 de temps se rapporte fort à la nostre, veu

que vous vous souvenés, Messieurs, de la quantité de rougeolle, que nous appellons, laquelle durant l'Esté qui preceda le cruel Automne, affligea cruellement presque toutes les femmes & les petits enfans de nostre ville, bien que ny ceux de Palerme, ny ceux de Genés n'ayēt pris garde aux influences de l'air, & que ceux-là ayent accusé de leur malheur la fregate venuë de Barbarie; & ceux-cy vne vallise apportée de Ponte-Decimo.

M. Veritablement ces raisons sont pressantes: mais cependant on voit que les Bourgeois plus aisés & plus riches se sont garentis, pour n'auoir practiqué ny touché les infectés, ny leurs vestemens.

F. Ils se sont garentis, il est vray; mais non pas par ces moyens; ains plusieurs d'entr'eux ont veillé, mangé, & conuersé ensemble dans les villages, pendant que chacun estoit retiré dans la ville, à cause de la quarantaine.

M. Ils conuersoient ensemble, ie n'en doute point, mais aussi ie crois que ceste conuersation n'estoit que parmy des personnes qui estoient entierement saines, & hors de tout soupçon.

F. Comment des personnes saines & non suspectes? Mais plustost plusieurs d'entr'eux ont esté touchés des infectez: par-ce que plusieurs riches ont eü des accidens de peste dans leur maison, en la personne de leurs seruiteurs, desquels eux & leurs habits ont esté maniés deux & trois iours entiers, pendant qu'ils cachoient leurs

si en fleurs & charbons, de peur d'estre chassés de-
hors.

M. Je pourrois reciter plus de vingt accidens sem-
blables: il est neantmoins bien estrange que ceste
peste ayt esté ainsi partielle.

F. Ceste partialité vient pour d'autres occasions,
que nous dirons tantost. On voit donc que ceste
peste est venuë de la pestilence de l'air; mais ce
seroit peu de chose, si ie ne monstrois plus am-
plemēt que la peste ne peut venir d'aucune cause
particuliere en acte, & sur tout qu'elle ne peult
estre produicte de ceste cause qu'on appelle fo-
mes pestilent: & bien que ie puisse dire que ceste
conclusion est desia preuuee, neantmoins pour
arracher vne si constante opinion, ie vois qu'il
faut monter à de plus nouvelles, plus fortes, &
presque palpables experiences.

M. Pourquoi est-ce que vostre Hippoc. & vostre
Galien, & les autres qui ont veu tant de pestes, &
ont esté si sçauants, n'ont point examiné ceste
difficulté, & estouffé vne telle opinion?

F. Ils eussent failly grandement, s'ils eussent voulu
oster vne opinion, qui ne fut iamais de leur tēps,
& d'autant plus qu'il n'y eust personne qui en-
treprist de prouuer ce principe, que la peste estāt
vne maladie commune, deust auoir sa cause com-
mune en acte; & non particuliere, estimant qu'il
est sensible & indemostrable, sinon par voye d'in-
duction, & en verité ils ne meritent point d'estre
blasmez, s'ils n'ont point creu qu'apres vn mil-
lion d'années vne opinion si estrange deust en-
trer dans la ceruelle des hommes, que de la con-
uersation d'vn sac de vestemens infectez se peul-

sent alumer des accidents, & comme vn feu s'estendre, en façon que la peste qui est vn effect vniuersel s'engendraist en toute vne Prouince. Maintenant, afin que sous ces noms (Contagieux, Propagation) ceste opinion commune ne s'eschappe point, ie confesse que la peste, ou pour parler plus propremēt, que les accidens pestilens sont maux contagieux, & qu'ils s'estendent: mais auant que passer plus outre, ie voudrois bien sçauoir, comme nous-nous accordons en ce mot de propagation, parce que ie tiens assurement que ceste contagion en la peste n'est point telle, qu'elle s'estende si facilement, & avec tāt de furie qu'elle puisse produire la peste, comme on le croit communément.

R. La signification de ce mot *Propagare*, est claire, qui veut dire amplifier & croistre, comme fait la vigne, les autres plantes, & le feu, lequel ainsi cōme d'vne estincelle il peut deuenir tres-grand; ainsi d'vn fomes pestilent les hommes s'infectēt, les vestemens deiques conseruent ce fomes, qui rend les autres malades, & ceux-cy d'autres, & ainsi de main en main s'estend en telle sorte que pour vn fomes particulier le mal deuiet vniuersel: c'est pourquoy nostre opinion seroit sans apparence de raison, si ce fomes n'auoit la force de croistre & s'amplifier.

F. Il y a bien difference, entre s'estendre comme la vigne, & s'estendre comme le feu, parce que cestui-cy se peut estendre à l'infini, si la matiere qui l'entretiēt & nourrit estoit infinie: mais celle-là s'estend iusques à vne certaine & determinée mesure, outre laquelle elle nes'auance point en-

core qu'elle eust de la nourriture infiniment : ie ne sçay comment vous voulez qu'elle s'estende?

R. I'ay nommé la vigne, afin d'expliquer plus à propos le mot de *Propagare*, mais ie vois bien que le fomes pestilent s'estend comme le feu.

F. Dictes-moy de grace, ceste propagation qui se fait du fomes pestilent, & celle qui se fait par le fomes des autres maladies contagieuses, comme pour exemple de la galle, sont-elles semblables?

R. Elles sont semblables & différentes, semblables parce que toutes deux s'estendēt: différentes, parce que la pestilente est plus active, & plus facile à s'estendre.

F. Ie demande si vous croyez que si l'on portoit vn liēt avec les vestemens d'vn galeux de Genes à Rome, & qu'estant là maniez & touchez la gale s'estendit par tout?

R. Ie crois que non.

F. Comment non? on a veu neantmoins que la gale a passé de l'vn à l'autre pour porter seulemēt vne mesme pelice, ou pour dormir dans mesmes draps, ou pour s'essuyer les mains ensemble.

R. Il est vray, mais parce que ces semences sont moins actives, il les faut toucher & manier davantage que les semences pestilentes: & passant la gale ne se communiquera point populairement à Rome, parce que bien peu ou pas vn ne viendra pour coucher dās ces draps ny en ce liēt: mais quand il arrieroit qu'on maniaist ces choses, de sorte que la gale se communiquast à quelques-uns, avec lesquels d'autres couchassent, & chacun taschast en se vestāt les chemises des galeux, & en entrāt dās leur liēt à s'infecter, ie crois,

contre nostre maxime, que de ce fomes particulier vne gale vniuerselle se pourroit engendrer.

A. La maxime est d'Hippocrate & de Galien, & de ceux qui les suiuent, les plus renommez, contre laquelle l'exemple mesme de la gale ne fait rien: & premierement, ie ne crois pas que cela se soit veu en effect, & qui le pourroit experimenter, ie voudrois qu'il en iugeast par l'yssue, car sans doute l'air s'y opposeroit, & puis si vn tel mal se pouuoit produire par la volonte des hommes, pourquoy est-ce qu'on ne dira pas que la race humaine viendroit à s'esteindre si chacun se vouloit abstenir de l'acte de la generatiō? dauantage, on ne scautoit tirer aucune conclusion d'vn exemple qu'on n'a iamais veu, & qui est impossible: & si si on le doit faire, il ne faudra pas craindre que la peste s'alume iamais en aucun endroit par voye de contagion, car ie m'assure que iamais les hommes ne procureroient de prendre la peste en vestant les habits, & couchant dans les lits des infectez.

R. Voila qui va bien, mais si ces semences pestilentes sont si actiues qu'elles viennent à s'estendre facilement?

M. Si les preuues des habits des infectez que Monsieur Facio a desia racontées sont veritables, comme nous scauons qu'elles le sont, il me semble qu'on prendra plus facilement la gale que la peste: parce que si tant de personnes qui ont manié les vestemens des empestez sans dommage, auoient manié ceux des galeux, ie suis presque assuré qu'ils seroient pleins de gale: parce que nous voyons tous les iours, si vne seruante ga-

leuse vient pour nous seruir dans nos maisons, que tous prennent facilement la gale, qu'en dites-vous Monsieur Facio ?

F. Je suis de mesme opinion, & outre les experiences desia dites, & celles qu'on dira, la raison est toute preste parce qu'encores que la pourriture soit plus grande aux empestez, plus sale, & plus mortelle, la galle toutesfois s'estend plus facilement, parce que les galeux, comme dit Aristote, ont la pourriture dehors, & sur la peau, & les empestez l'ont enfermée au dedans, d'où vient qu'avec leur pourpre, avec leurs bubons, & encores plus avec les charbons ils infectoient plus facilement les autres, que ceux qui estans infectez (mais qui estoient sains en la peau) mouroient plus promptement : & bien que la gale s'attache plus aisément que la peste, nous voyons toutesfois que cent galeux, qui par aduanture s'escorchent maintenant avec les ongles dans Genes ne communiquent point vniuersellement leur gale.

R. Bien que ceste raison ayt beaucoup d'apparèce, toutesfois celuy qui soustient la furie de la contagion pestilente, dira tousiours, que la peste s'attache plus facilement que la gale, & que presque tous ceux qui sont morts, ou qui ont esté malades en ceste peste, l'ont esté à cause de la contagion, & principalement pour la presence des vestemens empestez, comme par la presence de semblables vestemens apportez de Lombardie, la Peste commença de s'alumer à Pontedecimo : & que c'est vne folie de croire que la gale ou quelque autre maladie contagieuse se puisse parangonner à la furie de la peste, & particuliere-

ment en ce qui est de s'estendre ou communi-
quer.

- F. Parauanture celuy-là auroit tort qui contre tāt de raisons, tant d'authoritez, & d'experiences, semettroit opiniastrément sur la deffence d'vne opinion desia abbatuë, & presque estouffée: mais pour l'atterrer entierement, & l'estouffer tout a fait, en me tournant contre ceste furie de la cōtagion pestilente, & contre ceste facilité de s'estendre, qu'on soustient estre en ce fomes pestilent, ie dis premierement, que nous sçauons qu'vne multitude de cadauers, priuez de sepulture, a engendré quelquesfois la peste, i'en demande donc la raison; si l'on respond, à cause des semences pestilentes, qui en sortoient, ie dis, la peste se peut engendrer à Genes à cause de dix mil cadauers estendus, par exemple, dans la vallée de Bisagno, pourquoy est-ce donc que la mesme ne s'y peut engendrer à cause de trente seulement?
- R. Parce que tant de semences pestilentes ne se peuvent esleuer de trente cadauers pour infecter vn si grand air, comme il est necessaire pour produire vne maladie vniuerselle, telle que la peste, & ce peu qui est desia esleué est facilement esteint par la bonté de l'air.
- F. On ne peut mieux respondre: supposons donc que ces trente soient enfermez dans vn Sepulchre, de sorte que ces semences pestilentes ne puissent estre esteintes par la douceur, & bonté de l'air, il faudra par necessité que l'air soit pestilent en cest endroict, là où si deux ou trois vi-
uans y sont quelque temps enfermez, qui doute qu'on les en tire, ou morts ou malades, &

ne seront morts ny malades, pour autre occasion que pour auoir respiré l'air remply de tant de semences pestilentes? & si ces semences s'estendent avec tant de furie, pourquoy tout vn peuple ne s'infecte-il point à cause de ces morts ou malades, ou de leurs vestemens, & par voye de propagation la peste ne s'alume-elle? & toutesfois on peut voir & experimenter, que cela n'est point, comme quelques-vns ont fait, & moy par malheur en l'estude de Padouë, lors qu'estant escholier i'eus la charge de l'anatomie publique. Dauantage si l'attouchement des habits de ceux qui ont la peste, la peut par la propagation engendrer dās vne ville, il s'ensuit necessairement que d'autant que le nombre des Habitans est plus grand, plus la mortalité & la peste serōt grādes: & pour fortifier l'argument, si vn sac remply de tels habits qu'on trouue dix mille loing de la ville, nonobstant vne diligence extraordinaire, diuine & humaine, multiplie tellemēt qu'il rompt tout rempart, & entre dedās, & là il oste la vie à vingt-cinq ou trēte mille personnes, quel dégast ne verroit-on pas si l'on trouuoit, non vn, mais dix mille sacs de tels habits, non loing, mais dans la ville mesme? que si ceste consequence est veritable, cōme elle doit estre, si la commune opinion a lieu, il s'ensuit necessairement qu'environ la feste de Noël la peste eust esté plus ardente en ceste Prouince qu' auparauant, parce que tant de peuple estant desia mort, on ne parloit plus d'vn sac, ou d'vne vallise d'habits pour seruir de fomes, mais d'vn tel nombre qu'il eust esté suffisant de remplir les nauires. Si le fomes pestilēt en la pro;

pagation est semblable au feu, pourquoy ne suit-il la condition du feu, que plus il est grand, plus il s'estend facilement, & produit vn plus grand embrasement, & s'esteint avec plus grãde difficulté? toutesfois l'experience nous a monstré le contraire, parce que la contagion commença à diminuer, lors que le fomes estoit plus grand, veu que chacun sçait que la violence de ceste peste dura depuis la fin du mois d'Octobre iusques à la my-December, & alors elle commença à diminuer. Il fault donc cōfesser que ces habits des infectez, non seulement n'ont point ceste grande furie à s'estendre, mais que difficilement ils s'estendent & s'accroissent.

M. On pourroit respondre, que comme le feu se diminué, & finalement s'esteint lors que la matiere dont il se nourrit vient à faillir, ainsi que ce n'est pas de merueille si la peste sembla diminuer enuiron Noël, la multitude venant à luy faillir.

F. Pardonnez-moy, Monsieur, cela n'a point de lieu, de dire que les personnes manquassent dans la ville, parce qu'on sçait qu'il n'estoit pas mort plus de seize mille personnes au mitan de December, & qu'il en restoit plus de cent mille.

M. On pourroit parauanture dire qu'on se gardoit plus soigneusement.

F. C'est vne chose estrange, qu'on se gardast plus soigneusement en temps sec qu'en temps humide, outre que c'est l'ordinaire de toutes pestes, que depuis vne grande mortalité elles viennent à diminuer, encore que le fomes soit si espars, & ait tant multiplié: & en fin il semble incroyable &

presque ridicule de dire que tant de personnes se soient garanties de tant & tant d'habits infectés, qui ont esté espars & desrobés dans la ville, & qu'elles n'aient peu se garantir d'une valise, & de cent vallises avec tant de sentinelles mises dans Ponte-Decimo & loing de la ville : en quoy on voit combien de difficultés s'opposent à ceste commune opinion.

M. Je confesse que ie ne sçay que répondre.

F. On ne peut rien répondre qui satisface, parce que tout est fondé sur l'expérience : mais passons outre. Si la peste se pouuoit engendrer par vn fomes, il seroit impossible qu'une ville ou Prouince vne fois empestée s'en deliurast iamais. Et ceste raison à mon auis est tres-forte : car qui est le Prince si seuer & si soigneux qui se puisse promettre qu'en vne sienne ville ou Prouince bien peuplée, on ne desrobe ou cache de tels habits ou vestemens en telle abondance, que si vne valise de semblables choses a esté suffisante en multipliant d'apporter la peste en vne sienne ville, ne croye que par la mesme multiplication de tant elle s'y doie conseruer eternellement : & pour ne retourner en arriere pour chercher des exemples des autres pestes, parlons de la nostre, laquelle demeure tousiours deuant nos yeux, & qu'on voye, si de tant de paires de draps & autres meubles qu'on a porté dans l'hospital on en a retiré la moitié pour estre purifiée, & qu'on considere combien on en a desrobé ou caché sans les purifier, qui suffiroiēt à conseruer la peste 100. ans en ceste Seigneurie. Je ne parle point de ceux qu'on a desrobés en la vallée de Pozzeuere, & de

Bisagno, parce que chacun sçait qu'ils sont sans nombre: mais entrons dans la ville; croiez-vous, Messieurs, que plusieurs, voire vne infinité de personnes, pour la crainte de perdre leurs meubles dans l'Hospital, ou pour ne se voir saccager dans leurs maisons par les Corbeaux, n'ayent caché ceux qui estoient infectez, de telle façon qu'ils n'ont point esté subiets à la disposition des Commissaires?

M. I'en suis assuré, veu que plusieurs ont esté pendus par leur gorge pour ceste occasion, mais ie crois bien que comme aux autres meschancetez on ne chastie pas tous ceux qui ont failly, ainsi & moins en ceste-cy qui ne semble point vne meschanceté, puis qu'on a soing de conseruer ses meubles propres: dauantage, combien y en a-il qui ont eu la peste, & en sont gueris, sans que les Commissaires l'ayent sceu?

F. Et combien sont-ils morts de peste, lesquels ou par ignorance, ou pour fauoriser les parens des morts on a iugé sans soupçon, les meubles desquels pourtant n'ont point esté efforez? & à ce propos ie prendray la hardiesse de reciter pour le moins cent accidens de peste, qui sont aduenus dans la ville en des lieux remplis de personnes & de meubles, & bien que les accidens fussent tres-euidens, & eussent esté dénoncez, mais fauorisez, & que le maniment des meubles y fust grand, on n'a pourtant vsé d'aucune diligence pour les nettoyer, mais pour ne nuire à personne ie tairay le reste, suffit que chacun sçait que ie dis la verité. Grand Dieu, si vne petite quantité de tels meubles qu'il faut pour remplir vne valise a peu pro-

duire vne si grande mortalité en ceste Seigneurie, & si tant d'argent despendu, tant de sentinelles, & tant de soing n'ont de rien seruy contre si peu de meubles qui estoient loing de la ville, comment peut-on iamais esperer de pouuoir nettoier vne infinité de meubles infectez en vne ville si peuplée, où tant de personnes sont mortes ou deuenues malades de la peste?

M. Ceste raison veritablement est bien vne de celles qui sont fondées sur la simple & pure experience.

R. Je confesse encore que la raison est forte: bien qu'on pourroit respondre que la peste a continué autant que l'infection des vestemens a duré, & qu'avec le temps l'air les a nettoyez en despit de ceux qui ne l'ot voulu faire. Je ne crois pas qu'on puisse respondre autre chose.

F. Je suis assureé que vous voyez bien, Monsieur, que telle responce ne satisfait nullement, parce que si vne petite quantité de meubles portée à Pontedecimo deux ans auant la peste de Milan, laquelle vint à finir avec l'année 1577. a peu tellement multiplier que dans Genes elle ayt fait mourir 200.300. 400. personnes le iour, outre vn pareil nombre dans l'Hospital, à quelle occasion vne si grande quantité qui s'est infectée de nouveau dans la ville, & par les vilages n'a produit la mesme, voire vne plus grande ruyne? veritablement ie ne vois point à cecy aucune responce, d'autant que de dire que l'air l'aye nettoyée dans huict iours en despit des hommes, & qu'elle ne l'aye voulu faire en la petite quantité de la valise par l'espace presque de deux années, Vous me

pardonnerez Monsieur , mais cela semble ridicule.

M. Je crois que venant vne autre peste , si on n'apportoit aucun soing à purifier les vestemens & les meubles , & à se conseruer , on cognoistroit soudainement si lesdits meubles & vestemens peuuent estre cause de la peste, parce que où l'on les trouueroit estant si contagieux , & sans estre purifiez , il est certain qu'elle s'y conserueroit eternellement , & mesme qu'elle croistroit tousiours necessairemēt, puis que la cause s'augmenteroit: que si l'on voyoit d'vn autre costé que sans les purifier aucunement, ains la ville se trouuant remplie de tels meubles la peste cessast soudainement , ie crois que l'opinion de Monsieur Facio, accompagnée de tant de raisons , & confirmée par vne telle experience , seroit veritable: mais nous ne sçauions faire ces experiences, car à peine nous souuenons-nous de celle de l'an mil cinq cens vingt-huict , & parauanture n'en verrons-nous point d'autre que celles-cy, Dieu nous en face la grace.

F. Vous me faiçtes souuenir, Monsieur, avec vos paroles , qui veritablement touchent la force de cest affaire , de quelques nouvelles raisons, auxquelles ie m'assure que Monsieur Ratto se rendra incontinent, & partant en confirmation de ce que vous dictes , nous ne demeurerions point sur ceste doubte, si dans quinze ou vingt ans nous esprouuions trois ou quatre fois la peste (dont Dieu nous vueille autant preseruer que nous la meritons,) parce que nous cognoissons par les experiences toutes claires, com-

bien est foible ceste braue opinion des vestemens, laquelle s'en iroit aussi tost hors de l'esprit des hommes, avec tres-grande merueille de la vanité de tant de conseils & aduis qu'on a donnez par cy-deuant touchant ces vestemens, & pout empescher le commerce.

M. Je le crois aussi, mais l'impossibilité de l'experience nous fait demeurer en ceste difficulté.

F. Laquelle puis que les experiences faictes par Hippocrate, Galien, Paulus, Aëtius & les autres Princes de la Medecine, n'ont peu desnoüer, ny les raisons qu'on a tiré de leur doctrine, ny celles qu'on a nouvellement produites, ny tant d'experiences que nous auons obseruées en ceste peste; assurement les experiences qui sont frequentes parmy plusieurs peuples de delà les monts la desnoüeront. Je crois que tout le monde sçait qu'en plusieurs lieux d'Allemagne on voit presque continuellement des accidens de peste.

M. Comment, accidens de peste?

F. Oüy accidens de peste, c'est à dire des personnes qui meurent presque soudainement, avec bubons, charbons, & pourpre.

M. Doncques la peste y regne continuellement?

F. La peste n'y regne point, parce que comme nous auons desia arresté, la peste est vne maladie vniuerselle; que si en vne ville, ou en tout vn pays vn ou deux viennent à mourir en là façon que nous auons dicte, on ne doit pas pourtant dire que la peste y soit.

M. Pourquoi donc ne s'estend-elle par la conta-

gion? & d'accidens de peste ne se fait peste? encores que parauenture ils fuyent en sorte que la contagion ne se peut estendre.

F. Ils s'enfuyent voirement, car ils dorment ensemble, & les viuants se vestent des habits des morts, & avec tout cecy il n'y a point de communication, parce que la cause commune manque: nous voyons doncques par ceste experience la foiblesse de la contagion, laquelle sans doubtte est plus grande en paroles qu'en effect.

M. D'où viennent ces accidens en Allemagne?

F. Je n'y feus iamais, & ne prendray pas la hardiesse d'en parler librement: ie crois bien que les estuues qui sont frequentes en ce pays-là, engendrent beaucoup de pourriture, à laquelle sont grandement subiects ceux qui ont accoustumé d'habiter en ces petites maisonnettes chaudes & humides: & me souuiens d'auoir appris icy à Genes de quelques Allemans, que ces accidens ne se voient point par toute l'Allemagne, mais seulement en quelques pays où il y a des eaux qui croupissent, toutesfois ie confesse ne sçauoir pas beaucoup touchant ce pays-là: suffit que tout le monde sçait ces accidens de peste qui s'y voyent continuellement.

M. Je croirois qu'un tel exemple pourroit suffisamment prouuer que les habits de ceux qui ont la peste ne sont point contagieux, en sorte qu'ils puissent, en multipliant, porter la peste.

F. Ainsi le crois-je encore, mais passons plus auant, la peste qui tous les trois ans afflige l'Egypte, est cogneuë à tout le monde, laquelle sans

consideration aucune des vestemens, cesse lors que le Soleil entre au Lyon.

M. Vous me faictes souuenir de l'auoir leuë en Jean Leon, & i'ay mesme oüy dire à plusieurs qu'elle afflige semblablement Constantinople, mais peut-estre ce sont pestes d'vne autre façon.

F. Outre les susdicts, ceux qui ont esté en ces pays-là, & qui demeurent maintenant à Genes, tesmoignent le mesme, lesquels disent qu'au grand Caire, tres-peuplé entre toutes les villes d'Egypte, deux mille personnes sont mortes en vn iour de la peste, laquelle a esté quelques-fois tres-cruelle en Constantinople, & toutesfois excepté quelque riche, lequel à cause que le mal est contagieux se conserue comme nous nous conseruons de fiebures malignes, de la gale, & semblables maladies contagieuses: tous les autres qui sont en nombre infiny, sans se conseruer, & sans aucun soin, se hantent, & apres la mort de trente ou quarante mille personnes, sans qu'on purifie en aucune façon les habits qui ont esté à l'entour de ceux qui sont morts, ou qui ont esté malades, la peste cesse, les accidens de laquelle sont bubons, charbons, & pourpre, bien que les charbons abondent davantage aux regions chaudes, comme les bubons aux froides: & la nature des charbons, comme sçait Monsieur Ratto, est beaucoup plus venimeuse & pestilente que celle des bubons: ie dis maintenant, si dans vne ville comme le grand Caire & Constantinople, sans parler de Paris & autres villes où sont enfermés tant d'habits des

infectez qu'on en rempliroit cent milles valises, la peste s'esteint d'elle-mesme; comment est-il possible qu'il entre en la pensée des hommes, qu'un sac de tels vestemens puisse porter la peste en quelque ville? & en fin s'il est raisonnable qu'en ceste maladie nous recourions pour nous en informer à ceux qui en ont la pratique, allons au nom de Dieu, où la peste est familiere: & si nous voyons là que les vestemens des infectez n'y sont point suffisans à conseruer la peste où elle regne, qui deuroit estre bien aisé, comme sera-il possible de croire qu'ils soient suffisans de la porter où elle n'est pas, qui est bien plus mal aisé: parce que il est bien plus facile de faire bouillir vne eauë qui est desia beaucoup chaude, que celle qui est glacée.

M. Dites-moy ie vous prie, les autres pays qui sont proches du grand Caire, de Constantinople, & de Paris endurent-ils les mesmes misereres?

F. Qui les endure, qui non, sinon que les vents meridionaux, par exemple, peuuent disposer vn lieu plus qu'un autre.

M. Ie croiois que les pays qui ne s'infectent point, feissent plus grande garde sur les passages.

F. Voire, ils n'en font aucune, ains tous les autres pays traffiquent avec celuy qui est empesté: & dernièrement toutes les Prouinces de France ont traffiqué avec Paris, cruellement affligé de la peste, & avec tout cela pas vne n'en a esté infectée, si elle n'a eu la mesme cause que Paris: encore que la France pour estre voisine d'Italie, semble vouloir deuenir Italiéne, en ce qu'elle va imitant quelqu'vnes de nos diligences, pour se

garentir de la peste.

M. A la verité ces experiences sont telles, que ce-
luy est bien obstiné qui n'y adiouste foy. Mais
d'où vient vne si grande crainte en Italie, qu'on
porte la peste à la maison, qu'il faut fermer estroi-
tement les passages, & ne donner pas seulement
l'entrée aux lettres qu'on apporte? car il ne me
semble pas raisonnable de croire qu'une si grande
ignorance y regne.

F. C'est vne des choses qui m'a causé vne grande
merueille, & qui m'a rendu quelque temps es-
tonné, considerant les beaux esprits des Italiens,
& en fin ie me suis porté à ceste opinion, que l'a-
mour demesuré que nous auons pour nos vies est
la seule cause de ceste crainte desreiglée, ce que
pour accourcir mon discours, ie ne preuueray
point dauantage: suffit que les susdites experien-
ces n'endurent aucune replique; mais pour oster
entierement l'occasion d'ergoter, & de cauller,
faisons-en l'experience en nostre ville, sans cou-
rir dauantage ny au Leuant, ny au Ponant. Tous
nos vieillards qui se souuiennent encores de la
peste qui affligea ceste republique l'année mil
cinq cens vingt-huict, recitent que pendant qu'il
y auoit vne infinité de vestemens infectez dans
ceste ville, qui estoit deserte à cause de ceux qui
s'en estoient fuys, & des morts, tous les villageois
pauures & riches, sains & malades, & mesmes
avec leurs enfleures & bosses fraischemēt ouuer-
tes, entrerent dedās, tant pour receuoir la desirée
liberté qu'André Doria leur apporta, auquel cette
republique est obligée de la vie, que pour la
crainte de saint Pol, & là sans faire quarantaine,

ny purifier aucunemēt les vestemēts, ils se mesle-
rent tous ensemble, permettant le trafic à tou-
tes sortes de pays & de personnes, & avec tout
cela la peste ne s'alluma point comme plusieurs
croyoient, ains elle s'esteignit en telle sorte, que
cette Seigneurie n'a ressenti aucun accident de
peste tant petit soit-il depuis 51. an: & qui nie ces
experiences, nie aussi que le feu soit chaud.

R. Je confesse de ne sçauoir que respondre, & que
vos raisons sont plus fortes que les miennes, &
n'ay point de honte de m'estre abusé avec vne si
bonne compagnie, mais les raisons que nous al-
legasmes la seconde iournée ne me laissent point
gouster ceste nouvelle opinion.

M. Ceux-cy sont hommes proprement, puis qu'ils
se laissent commander à la raison, qui seule nous
faict differer des autres animaux, & certes la mo-
destie qui reluit en Monsieur Ratto m'est tant
aggreable, que ie m'estime obligé à toutes les
occasions qui s'offriront d'en parler honorable-
ment, & de la louer, & ie pense qu'en cecy parti-
culierement on cognoist les habiles hommes
d'avec les ignorans, lesquels esbloüis par la fu-
mée de leur arrogance, s'enuieillissent si fort en
leurs simpleesses, que nulle raison, bien que forte,
ne suffit pour les en retirer.

R. Vous m'obligés trop, Monsieur, de rapporter
à la modestie, ce que parauenture est deu à mon
ignorance: ie confesse neantmoins de ne sçauoir
que respondre, & peut-estre que quelque autre
donneroit à Monsieur Facio la satisfaction que
ie puis luy donner moy-mesme.

F. Ces parolles confirment la modestie & la loüa-

ble doctrine que le Seigneur Estiène a dite. Mais le Soleil qui se cache me deffend de respondre auiourd'huy aux raisons qui battent au contraire, & pense bien que leur force me doit esguillōner à dire demain quelque chose qui peut-estre ne vous sera point desagreceable: mais pour ne me retirer de nuict, ie vous baise les mains, allons Monsieur.

R. Et moy aussi.

M. Vous aués raison, allés à la bonne heure, ie sçay que nous auons passé la iournée entiere.

Fin de la cinquiesme Iournée.



SIXIESME IOVRNEE.

M. **I**L me semble Monsieur, que vous venés au-
iourd'huy, & bien à l'aise & tout pensif.

R. Ne vous semble-il pas, Monsieur, que i'aye rai-
son de l'estre? car plus ie considere ceste nouvel-
le opinion qui a esté si bien preuuee, & combien
la vieille est commune & enracinée, tant plus ie
delibere de ne m'affectionner à aucune tant soit
elle commune, & en apparence fondée sur le
bronze.

M. Il me semble, quoy que ie ne voye gueres
auant, que vous aués raison, puis que nous som-
mes si aisés à nous tromper aux choses claires, &
qui sont tous les iours deuant nos yeux: mais c'est
bien vne merueille, que le monde ait vescu par
tant de siecles en vne si grande erreur, bien que
parauenture il reste encore à Monsieur Facio
quelque lieuës de chemin malaisées à cause des
raisons que vous luy proposastes la seconde iour-
née.

R. Ie ne crois point que ce soit vne merueille que
le monde viue quelquesfois en erreur, s'il est
vray que le faillir soit propre au monde: & ne
crois point, qu'il luy soit beaucoup difficile de
satisfaire aux raisons contraires, par les fonde-
mens qu'il a posés, bien que ie desire d'entendre
comment il croit desnoier quelques difficultés

quiluy demeurent encores: & si ie ne me trompe, il me semble que ie le vois entrer dans la porte de la ville.

M. Il est vray c'est luy: & veritablement celuy-là seroit bien meschant qui ne loüeroit le traual qu'il a soustenu en ceste matiere.

R. Il le seroit, sans doute; & de fait ie cognois maintenant qu'il faut traualler son esprit, si l'on veut deuenir maistre en la cognoissance des choses; & que de s'arrester sur les autoritez, oste souuentefois à l'homme le moyen de voir comme il se trompe. Ie ne dis pas cecy afin qu'il ne faille estimer grandement l'autorité des grands personnaiges, ains le doit-on faire, car il n'est pas raisonnable de croire que des hommes si excellents ayent parlé sans grande raison; mais ie dis bien, qu'on en doit faire cas lors qu'un homme studieux, esueillé par l'autorité, examine par apres la matiere, comme si l'autorité n'estoit point.

M. Aués-vous eu bien chaud en venant, Monsieur?

F. Point, que celuy que m'a fait sentir la crainte de vous faire trop attendre.

R. Vous pouués venir sans inquietude, parce que ie ne viens aussi que d'arriuer.

M. Si vous nous donnés autant de satisfaction comme vous nous en donastes hier, nous demurerons entierement consolés.

F. Dieu m'en face la grace: & afin que cela soit, ie collige premierement de ce que nous auôs desia dit la nature de la peste, & de l'air pestilent, fondement de tout nostre discours: car nous auons

arresté que la peste est vne maladie commune, mortelle, bornée d'un petit espace de temps, le plus souuent contagieuse, & tousiours produite d'une cause commune en acte: & auons dict que l'air pestilent est celuy qui est remply de petits corps venimeux, qu'il reçoit des choses qui sont dedans ou à l'entour de la terre, lequel estât attiré par la respiration, a la force de rendre les hommes malades, & de les faire mourir.

M. Doncques si ces petits corps venimeux, que vous dictes, ne s'esleuoient de la terre, il ne seroit pas possible que l'air deuint pestilent?

F. Cela est si clair qu'il n'a pas besoing de preuue: & de cecy, comme i'estime, ont puisé leur erreur ceux qui traictant de l'air empesté, s'ils eussent bien pris garde à la cause qui le produit, ils ne feussent point courus à la preuue de la pourriture d'iceluy en la peste, ny à tant d'autres erreurs: & peut-estre que Fracastor n'eust pas creu que l'air pestilent afflige d'auantage les riches que les pauures: comme nous monstrerons en respondant aux doctes & apparentes raisons de Monsieur Ratto: à la premiere desquels ie dis que d'autât que ceste ville est située en vn terroir pierreux, ie me persuaderay facilement qu'elle iouyroit d'un air mediocrement doux, si elle n'estoit si exposée aux vents meridionaux, comme tout le monde voit, lesquels elle reçoit dans son enceinte avec tant d'humidité, qu'il y a bien peu de villes qui soient si humides en semblables faisons. Il est bien vray que si elle estoit basse, & en vn terroir marecageux, comme Pise, Mareme, & comme Cranon, estant d'ailleurs fort au-

strale & peuplée, elle seroit sans doute beaucoup plus affligée de la peste & autres maladies populaires (encore quelle le soit assés souvent de celles-cy,) & la peste d'aujourd'huy eust esté tres-cruelle: mais parce qu'elle est située sur vn escueil, elle s'est aucunement garantie de sa fureur; comme Taso en fut garantie, qui neantmoins ressentit la peste, quoy qu'elle ne fut point battue des vents meridionaux comme Genes, mais elle l'eust plus cruellement ressentie, comme dit Galien, si elle eust esté australe, & en lieu bas, comme Cranon.

- M. Comment se peut-il accorder ce que vous dites, veu que cest air est estimé fort subtil de tout le monde?
- F. L'air de Genes n'est point subtil pour estre plus exposé à la Tramontane que les autres villes, mais pource qu'il est en vn terroir pierreux pour la plus grande partie, lequel ne produit aucunes vapeurs qui puissent moderer la subtilité que la Tramontane produict en l'air: Et partant cest air n'est point subtil, sinon lors que les vents de la terre soufflent. Maintenant pour passer à l'autre difficulté, ie diray en confirmation de tout ce que nous auons dit touchant la peste, que tout ainsi que les causes pestilentes peuuent estre plus ou moins aigues & violentes, les pestes aussi sont plus ou moins cruelles & venimeuses, & differentes ensemble en plusieurs choses, & entre les autres en ceste-cy. que les vnes sont plus furieuses que les autres: cōme par exēple, ceste peste de l'an 1579. a esté biē cruelle; mais celle de l'ā 1528. le fut dauantage, & celle de l'an 1348. encore plus, quoy que toutes soient venuës de la pestilēce de l'air,

laquelle en l'an 79. fust moindre qu'en l'an 28. & en cestuy-cy, qu'en l'an 348.

M. D'où vient ceste difference?

F. Nous auons desia déclaré que c'est que l'air pestilent, & comme la pourriture s'engendre de l'air chaud & humide, lesquelles qualitez, pour estre des accidēs sont subiettes au plus & au moins, & mesme quant à la durée: d'où vient plus grande, moindre, plus ou moins actiue, plus ou moins profonde pourriture, de laquelle sortent les semences ou petits corps plus ou moins venimeux, en plus grand ou plus petit nombre, qui durent plus long temps ou non, & de differentes analogies: & de ces diuersitez des causes, fort necessairement la difference qu'on voit aux pestes, qui sont leurs effectz: or avec ce discours, qui est tres-veritable & reel, on respond à plusieurs doubtes, & premieremēt, on voit que la doctrine d'Aëtius, & des autres n'a point de lieu, qui veulent qu'en toute peste, les animaux sans raison meurent premierement, se persuadant par aduanture que l'air pestilent soit pourry, ce que nous auons monstré estre faux: & quand nous le supposerions, il nous resteroit encore vn nouveau subiect d'admiration, en ce que de tres-habiles hommes ont laissé par escrit, que les oiseaux meurent premieremēt, comme s'il estoit plus raisonnable que la pourriture de l'air commençast aux parties plus haultes, & non pas en celle qui a plus de meslange, qui est la plus proche de la terre & des eaux: & ie ne vois non-plus avec quel fondemēt ils veulent que les animaux terrestres meurent les premiers aux pestes qui procedent des exhalaisons & vapeurs de

la terre: comme par exemple aux tremblemens de terre, parce que c'est vne chose tres-claire que ces animaux, (soient raisonnables ou non) meurent plus-tost, qui sont plus proches des souspiraulx, d'où sort l'exhalaison, ou bien les animaux qui paissent l'herbe venimeuse: au reste, ie suis de leur opiniõ, que les animaux sans raison meurēt quelquefois en la peste: que s'ils meurent pour l'analogie qu'ils ont avec les semences pestilentes, ie confesse que ie n'en puis parler que de la sorte qu'on dict, que l'aymant tire le fer: & partāt quād nous voiõs mourir les brebis seules, ou les bœufs, nous demeurons muets, & pleins d'estonnemēt. Mais aux autres pestes, les animaux sans raison meurent lors qu'elles sont furieuses, qui est quād le venin est plus cruel en qualité, & plus abondāt en quantité. Ce qu'on ne lit point estre arriué qu'aux grādes pestes, comme en celle que décrit Villan & Boccace de l'an 1348. bien qu'aucunes-fois par voye d'analogie, elle commence aux brutes, & avec le surcroist de la pourriture qui s'engendre d'iceux, finist aux hõmes, comme à Rome au temps de Lepidus & Scæuola: que si les oiseaux ne sont point morts en ceste nostre peste, il ne s'en fault point estonner, parce qu'encores que la constitution de l'air ait esté australe presque vn an entier, elle n'a toutesfois duré en sa violence sinon en Octobre & Nouembre, & iusques au mitan de Decembre, laquelle soudainement fust rabatuë par l'Hvner aquilonaire, outre qu'on ne sçait pas s'il en est mort quelques-vns en Nouëb. Or, que les riches meurent plus-tost, & plus facilement que les pauures aux pestes qui viennent

de l'air, excusez-moy, ie ne pense pas qu'on le puisse soustenir; ains au contraire, par les raisons & les experiences que nous dirons apres, les pauvres meurent plus facilement, & plus promptement que les riches: ce qui ne vient point de la contagion, de laquelle les pauvres pour estre bien souuent plus ignorans que les riches se scauent moins garentir, mais bien d'autres causes, & premierement de la nature des corps des pauvres, lesquels ordinairement sont plus disposez à la pourriture que ceux des riches, veu que les riches sont communément plus raisonnables & amateurs de la vie, & partant plus reiglés en toutes leurs actions, mais specialement en celles du boire, & manger: car on scait que leurs alimens sont meilleurs, & moins excrementeux que ceux des pauvres, & dauantage les riches ne mangēt point à toute heure, & pendāt qu'ils trauaillēt ne s'enyurent point, particulierement en Italie, comme font les pauvres; & puis les riches dorment dans des bons lits, & aux heures ordonnées, & veillent aussi conuenablement, & font exercice & se reposent: en vn mot, ils sont plus prudens en tout ce qui appartient à la vie: d'où vient que les corps des pauvres abondent plus en opilations, & excremens que ceux des riches, & par consequent selon Galien & tous les Medecins, ils sont plus disposez à la pourriture: que si cela est aux autres villes, à plus forte raison à Genes, parce que la partie du peuple qui est miserable est presque sans nombre.

R. Si les corps des riches ont plus de sang que ceux des pauvres, & s'ils sont moins secs & moins ac-

coustumez au trauail, pourquoy ne sont-ils plus propres à la pourriture?

F. Par-ce que les pauures ont ordinairement les corps plus secs d'un sang loüable, mais plus humides d'un sang vicieux, & sont tousiours plus remplis d'oppilations, à cause des aliments grossiers dont ils se nourrissent: & bien que les riches ne soient si accoustumez aux mesaises & trauaux, & partant qu'ils semblent plus foibles que les pauures, ceste foiblesse neantmoins consiste plustost aux muscles & aux jointures (lesquels se relaschent par l'oysiueté, & le repos,) qu'aux membres de la vie, lesquels aux riches sôt presque tousiours doiuez de plus grande santé, lors mesme qu'ils ne peuuent quelquefois mouoir ny piéds ny mains: c'est pourquoy les riches resistent plus aisément aux causes pourrissantes que les pauures, & ie diray hardiment que qui pourroit faire preuue des venins pourrissans, comme d'arsenic, en cent riches & cent pauures esgalement, les pauures mourroient les premiers. Outre que pour preuuer qu'en la peste qui naist des vents austrins, les pauures meurent plus facilement, on adiouste la raison tirée de la nature de l'air pestilent, qui n'est point pestilent esgalement par tout, mais plus aux quartiers & maisons où il y a plus de pourriture, laquelle se treuue tousiours en la multitude des pauures, ce qui est si sensible, qu'il n'a besoin d'aucune preuue: c'est pourquoy telles pestes attaquent tousiours premierement les pauures, comme ont experimenté dernièrement les Venitiens & Padoüans, comme l'escriit Mercurial, & les Milanois

& Siciliens : celle qu'escriit Iean Villani, qui comença l'an 1346. & continua 47. & 48. attaquâ premièrement les femmes & petits enfans parmy les pauures : & celle que Mathieu Villani raconte, qui naquit l'an 1360. & comença en Flandre & Brabant, estouffa le menu peuple : & pour ne rechercher d'autres exemples, ne sçait-on pas qu'en l'an 1528. la peste de toute l'Italie atterra premièrement les pauures ? en vn mot on ne lit presque peste, ny ancienne ny moderne qui n'ait premièrement ietté la fougue de sa rage sur les pauures que sur les riches.

M. On sçait toutesfois que l'an 1528. plusieurs riches moururent, & en la peste de Rome alleguée par Monsieur Ratto, les principaux seulement comme aussi plusieurs hommes de qualité en celle que Iean & Matthieu Villani racontent, que Monsieur Ratto a semblablement touchées.

F. Par nos fondemens on y respond facilement, & le mesme Tite-Liue à celle de Rome durant le Cōsulat de Marcellus & Flaccus, en disât, que les principaux moururent par la coniuration que les femmes firent d'empoisonner leurs maris : pour les autres comme i'ay desia dict, elles ne sont pas toutes d'une façon, ains elles differēt en plusieurs choses, specialement en la grandeur : car lors que la constitution est fort longue & vehemente, il s'engendre vne grande & plus profonde pourriture, d'où sortent ces petits corps pestilents en quantité, & qualité plus dangereux & dommageables, & comme la flâme qui attaque, ensemble la paille, le bois sec, & le vert, si elle ne dure pas beaucoup, ne brulle que la paille : si elle dure da

uantage, allume le bois plus sec : mais si elle dure
 longuement, elle dispose aussi le bois vert : ainsi
 ces petits corps ou semences pestilentes infectēt
 toujours auparauant les pauvres, non pas tant
 parce qu'elles regnent plus longuement dans leurs
 maisons, que d'autant que les pauvres sont plus
 enclins à la pourriture. Que si par apres ces se-
 mences continuent en l'air par la mortalité des
 pauvres, & par la vehemence de la constitution,
 il est necessaire qu'elles se multiplient, & s'esten-
 dēt, en sorte qu'elles disposēt les autres corps à la
 mesme pourriture, bien que les riches pour l'a-
 bondance des moyens qui māquent aux pauvres,
 soient toujours priuilegiez parmy les autres, &
 la peste en laquelle cent pauvres & cinq riches
 meurent, est toujours plus memorable pour la
 mort des riches que des pauvres : & pourtant la
 peste que descrit Matthieu Villani, qui commēça
 en Angleterre l'an 1360. & s'estendit en France,
 Prouence, Auignon, Lombardie, & en toute l'I-
 talie, dure dauantage en la memoire des hommes
 par la mort de neuf Cardinaux, & de septāte Pre-
 lats, que de cinquāte mille pauvres qui en mou-
 rurent. Il est bien vray, que quelquesfois la con-
 stitution est si violente, & par consequent la
 pourriture qui est venimeuse en quantité & qua-
 lité, croist de telle façō qu'elle réplist par tout de
 vapeurs tres-pestilentes, lesquelles n'espargnent
 presque personne, comme il arriua en Damas l'an
 1360. & au grandCaire où la peste en tua tant que
 ces Prouinces demeurèrent presque sans habitās :
 le mesme doit-on iuger de celle de Florence en
 l'an 1340. que Iean Villani descrit, qui fust plus

memorable pour la mort de plusieurs des principaux bourgeois que pour la mort d'une infinité de pauvres. Or il est mort paradvanture trente mille personnes en nostre peste, entre lesquelles à peine en nombrerez-vous cent de mediocre fortune, tout le reste n'est que peuple tres-pauvre & miserable: & si parmy vn tel nombre il en fust mort 200. qui feussēt recommandables, ou pour leur noblesse, ou pour leurs richesses, sãs doute la peste seroit plus espouuētable, & plus renōmée à cause de ces deux cens qui ne font aucun nombre parmy trente mille, que pour dix mille pauvres qui seroient morts dauantage. Nous concluons donc que la peste produite par les vents meridionaux, rauage tousiours auparauint le pauvre peuple, parce qu'il est plus enclin à la pourriture, comme il est clair par la raison & l'experience.

R. Et toutesfois Fracastor a esté d'autre opinion.

F. Fracastor veritablement a esté vn tres-bel esprit de nostre temps, comme on peut voir par ses œures pleines de belles inuētions, & d'une certaine grace, à faute de laquelle les œures de plusieurs autres escriuains sont moins estimées; mais entre autres choses, il me semble d'auoir veu dans ses escrits vne opinion vn peu trop hardie, touchant la force de la contagion, où l'on voit combien celle qu'il a eue, lors qu'il dict que les riches sont plus subiects à la peste qui vient de l'air, que les pauvres, est esloignée de la verité par les raisons que j'ay cy-dessus briefuement repliquées, & qu'elle repugne à la raison, parce que les corps des pauvres pour l'ordinaire sōt pl⁹ cacochimés, pour parler selon nostre vsage, & partant plus dis-

posez à la peste, selon l'opinion de Galien : Davantage, l'air en vne mesme ville n'est pas esgalement pestilent aux riches, & aux pauvres : & si les pauvres sont plus forts à porter des fardeaux, à hoüer, & cheminer, ils ne le sont pas tant neantmoins pour resister à la peste, cōme sont nō seulement les riches, mais mesme les podagres, les boiteux, & ceux qui sont malades de quelque infirmité particuliere, comme nous monstrerons par nostre discours : elle repugne encores à l'experience de tāt de pestes, lesquelles ont tousiours affligé le menu peuple : & à ce propos, ie me souuiens d'auoir leu dans ses escrits, que les semences pestilentes sont entierement esteintes en ceux qui meurent de la peste, avec la chaleur naturelle, comme si ceste chaleur estoit necessaire pour la conseruation de ces semences, & encore pour leur generation, & comme si on ne sçauoit pas qu'une infinité de ces semences s'engendrent sans la chaleur naturelle, & selon sa doctrine se conseruent aux vestemens, outre qu'il n'ameine aucune raison ; escriuant vne chose entierement contraire à l'opinion commune ; qui tient que ceux qui sont morts de la peste sont contagieux.

R. Parauanture il la rend, quand il dict, à cause que la chaleur naturelle est esteinte.

F. J'ay desia monstré combien ceste raison est foible, car bien que la chaleur de la vie soit esteinte au cadauer, toutesfois la chaleur naturelle entant que cadauer ne l'est point.

R. Il est vray, parce qu'il ne se pourriroit pas, mais il seroit desia pourry, & tourné en cendres.

M. Tout cela va bien ; mais ie trouue fort estrange

que les riches ayēt esté si heureux en nostre peste, qu'ils n'ayent pas ressentý la moindre alteration de l'air pestilent, encores qu'il soit aucunement commun à tous.

- F. Comment, qu'ils ne l'ont point ressentie? sçachez Monsieur, que l'air pestilent s'est fait sentir à tous en quelque façon: ie laisse à dire comme quelques-vns sont morts, qui se pouuoient dire riches, ou pour le moins à leur aise; au reste la plus grãde partie de ceux qui sōt demeurez apres la peste, tant les riches que les pauvres, a ressentý l'alteration & les accidens d'icelle, parce qu'il y en a bien peu qui n'ayent eu quelque desir de vomir, ou vn vomissement, ou vn froid soudain par tout le corps, ou des vertiges: & quelques-vns passans plus outre, ont eu les langues fort blanches, vne pesante douleur de teste, ou biē vne douleur sous l'oreille, ou sous l'aisselle, & en l'aîne: & plusieurs autres outre la douleur, vn manifeste commencement de bubon (encores que les vns l'ayent eu sans fiebure, & les autres avec fiebure) & sont gueris apres sans autre mal.
- M. Ces accidēs sont arriuez à plusieurs, mais pourtant, ils n'auoient point la peste, & n'estoiet point frappez, comme on dict.
- F. C'est icy qu'il se faut bien entendre, parce que ce passage à mon aduis est beaucoup difficile: & premierement, on sçait que plusieurs de ceux qui ont sentý ces vertiges, appetit de vomir, vomissement ou douleur de teste, ou froid par tout le corps, ou quelque accidēt de fiebure, n'ont point esté descouverts, ny mesme visitez des Medecins; parce qu'ils sont promptement gueris, & possible

sans autre remede : quelques autres ausquels ces accidens ont duré plus long temps, ou ils les ont cachez, ou s'ils estoient plus vehemēs, ils ont esté dénoncez & visitez des empiriques, & des Medecins encores, qui les ont presque tous declarez sans maladie pestilente : & quelques autres estans morts avec quelques vns des accidens susdits, sans toutesfois aucuns charbons, bubons, ou pourpre ont esté pareillemēt iugez sans soupçon.

M. Croyez-vous qu'on les aye iugez sans remords de conscience ?

F. Je crois qu'oüy, puis qu'ils ont iugé selon leur opinion.

M. J'ay oüy plusieurs Medecins de ceste ville iuger de mesme en pareils accidens, & partant ie crois qu'ils ont iugé conformément à leur opinion, & à la verité.

F. Je ne dis pas cela, encore que j'aye oüy moy-mesme des Medecins consultants, & de grande estime, parler de quelques vns qui estoient attaquez de mesmes accidens que dessus, accōpagnez de bubons, & les iuger sans soupçon de mal pestilent, parce qu'ils voioient finir les accidens, encores que le bubon demeurast, lequel n'allant pas plus auant, & venant avec le temps à diminuer, les confirmoit en leur opinion.

M. J'ay tousiours oüy dire que la peste est vn mal qui presse grandement ceux qu'elle attaque : que si cela est, il faut dire que ceux qui ont si peu de mal, & qui guerissent si promptemēt n'ont point la peste.

F. Si pour infectez, ils entēdent pressez de la peste,

avec des accidents espouventables , de grandes inquietudes, impatiences, ou de douleurs de teste fort cruelles, avec charbõs, bubons, ou pourpre & fiebres intolerables , mourant ou reschapant apres auoir enduré de tres-grãds maux, ie suis de leur opinion: mais si pour personnes infectees ils entendent, comme il le faut, tous ceux qui sont en quelque façõ trauaillés de ces semences pestilentes , ie m'elcarte entierement de leur opinion.

M. Commët, croyés-vous que ceux qui ont senty si peu de mal feussent molestés des semences pestilentes ?

F. Je n'en doute aucunement.

M. Il faut donc dire que ces semenees ne sont pas toutes d'une mesme sorte, puis qu'elles ostent la vie aux vns & ne font point de mal aux autres.

F. Vous aués tres-bien iugé, Monsieur , comme aussi les corps humains qui sont les patiens , ne sont pas tous d'un mesme temperament & condition.

D. Il le faut croire ainsi ; mais ces differences qui sont entre les semences & les corps humains me semblent si cachées, que ie ne vois point comme nostre entendement les puisse comprendre.

F. Je crois que bien peu de choses peuuent satisfaire nostre entendement , & qu'il sera encores moins satisfait de ces dernieres differences , attendu qu'il n'en peut attendre aucune ayde de nos sens : mais en ces passages difficiles , il faut auoir recours à la contemplation, & selon la coutume d'Aristote se seruir d'exemples & de similitudes sensibles, qui representent tellement ce

que nous cherchons, que l'esprit en soit aucunement satisfait. A ce propos voicy vne similitude, qui selon mon opinion conuient fort bien. Je crois que chacun cognoist vn fusil, avec lequel si vous frapés vne pierre, vous verrés vne infinité d'estincelles qui descendent sur plusieurs & diuerses amorces qui sont dessous : maintenant il faut considerer en ceste operation deux choses particulierement, à sçauoir les estincelles agissantes & les amorces patientes : & tout ainsi que de la part de l'agent, toutes les estincelles ne sont point d'vne esgalle vertu pour allumer, ainsi du costé du patiēt, toutes les amorces ne sont point d'vne esgalle dispositiō pour estre allumées. C'est pourquoy on voit vne grande varieté d'effets entre les amorces & les estincelles, car quelques fois vne infinité d'estincelles descendra sur les amorces sans en allumer pas vne, & vne autres fois entre tant d'estincelles & d'amorces 5. ou 6. plus ou moins s'allumeront : il arriue encore que de 100. estincelles, les 50. s'attacheront, mais diuersement, parce que 30. par exemple se prendront en telle façon, que chacune estincelle brulera son amorce, & nous en verrons 20. qui s'attacheront, mais apres auoir allumé vn peu d'amorce soudainement elles s'esteindront, & peut estre que l'on verra parmy ces 20. d'autres varietés : Car bien qu'elles s'esteignent toutes sans brulser leur amorce ; l'vne neantmoins s'esteint quelques fois plus tard que les autres : & peut-on voir aussi qu'vne estincelle qui sembloit qu'elle deust brulser toute son amorce, pour auoir commencé son action avec furie s'esteindra plus-tost

qu'une autre qui demeure davantage sur la siéne, faisant apres moins de progrès. Je crois qu'on y voit encores beaucoup d'autres effets, desquels ie ne me souuiens point maintenāt, d'ōt la contēplation à mon auis sert grandemēt à nostre propos. Or si vne si grāde multitude d'estincelles qui ont accoustumē de faire vn feu, n'allume aucune amorce, il ne faut pas rapporter cecy à la foiblesse de l'agent, mais bien des amorces qui ne sont point capables d'estre allumées par des estincelles d'une telle vertu. Et quand les vnes s'allument & les autres non, ceste varieté peut proceder de la diuersité des amorces patientes, & des estincelles agentes, veu que tout ainsi qu'entre tant d'amorces, les vnes peuuent estre disposées à s'allumer & les autres non; ainsi entre tant d'estincelles, les vnes peuuent auoir la force d'allumer, les autres non: & cōme entre les amorces, les vnes sont plus propres à estre allumées & les autres moins, ainsi entre les estincelles les vnes ont plus de force que les autres: & bien que quelque vne qui est desia aux prises avec son amorce, semble de s'auancer fort au cōmencement, neātmoins elle finit assés tost son action, parce qu'elle treuve de la resistance du costé de l'amorce, qui par auanture n'a pas la disposition pour estre allumée par ceste estincelle: & peut-estre que si la mesme estincelle fut tōbée sur vne amorce mieux disposée, elle n'eust point trouué de la resistance qui l'eût empeschée de la brusler entierement.

D. Je ne pense pas qu'on peut iamais treuver aucune similitude qui representast mieux vostre conception, que celle-cy: & vous me faictes souuenir de celles qu'Aristote ameine en ses diuins dis-

cours touchant les songes, lesquels ie lisois il n'y a pas encores huit iours avec grand plaisir; où l'on voit que sans les comparaisons de la chaleur, des effets du Soleil, & des miroirs, il ne nous eust iamais faict cognoistre la nature, ny les differences des songes, qu'on ne peut entendre que difficilement.

- F. Il est vray, aussi n'ay-ie peu treuver vn exemple plus propre pour faire entendre la varieté des effets pestilents: car comme toutes ces estincelles sont semences de feu, quoy qu'elles ne soient pas de pareille force; ainsi les semences qui sont les agens en la peste, bien qu'elles soient toutes pestilentes, ne sont pas d'une esgale vertu, parce que les vnes viennent d'une pourriture plus profonde, plus sale, & plus r'enfermée, les autres au contraire. Neantmoins les vnes & les autres different en elles-mesmes, parce que de celles qui sortent par exemple d'une mesme pourriture, l'une peut estre plus pleine que l'autre, & par consequent auoir plus de vertu, comme deux grains d'Arsenic ont plus de force qu'un seul. Dauantage elles peuuent estre differentes en tenacité & autres façons que i'omets pour abreger. On voit encores plus clairement la mesme diuersité aux corps humains, lesquels à cause du māger & boire, & des autres choses qui appartiēent à la vie; & à cause du sexe, de l'aage, de la complexion, du lieu, des humeurs, du dedans des opilations, & de tant d'autres moyés, sont si differēs entre-eux, que ie ne pēse pas qu'on puisse treuver deux hōmes entre tant de milliōs tellemēt semblables, qu'il n'y ayt aucune differēce.
- M. En cecy la nature est admirable, ayant si fort

la variété, qu'on ne scauroit treuver en tout le monde deux hommes entierement semblables.

F. On voit qu'en tous les ouurages elle s'y est fort estudiée, tellement que ce n'est pas de merueille, si pour la variété des semences pestilentes, & des corps humains, on voit tât de diuers effects qu'ils sont capables de confondre les esprits de tous les hommes. Voyez dōc, Messieurs, comme l'exemple du fusil s'accorde avec ma conception: car tout ainsi que si pas vne des estincelles ne se peut prendre à ces amorces, il est assure que la nature de ces amorces ne peut estre allumée par ces estincelles, qui toutesfois se prēdront aux amorces d'vnē autre nature: de mesme trouue-on quelquesfois certains petits corps ou semences pestilentes, lesquelles se prennent aux brutes, & non point aux hōmes, d'où l'on voit la peste en ceux-là, & non en ceux-cy, comme celle des bœufs que Fracastor escrit, laquelle commença l'an 1514. en Friol, & s'estendit en Lombardie: & comme tesmoigne Fernel, & le mesme Fracastor, avec les autheurs de l'agriculture, plusieurs pestes sont suruenues aux brutes, comme poules, porcs, & oyseaux. Tout le monde scait celle des brebis descrite par Virgile: & Tite-Liue recite celle qui attaqua premieremēt les bœufs, & puis les hommes. Dauantage comme toute estincelle ne s'attache point à ceste amorce, de mesme toute semence pestilente ne se prend point à cest homme. Pierre par exēple respirera cent semēces pestilentes en ce lieu-cy, & en ce lieu-là, & ne sera point infecté: il en respirera apres vne qui l'infectera, parce qu'elle sera plus maligne & pl^o forte, ou parauature, il sera pl^o disposé alors qu'au para-

uât. Et tout ainsi que si mille estincelles tōboient sur cent amorces, & que parmy ces cent il n'y en eust que quarante qui s'alumassent, cōme y estât plus disposées, de mesme mille semēces pestilentes entreront dans les corps de cēt hommes, desquels quarante seulement seront infectés: & cōme on voit pareillement quelques estincelles qui semblent au commencement de vouloir brusler toute leur amorce, ainsi plusieurs semences pestilentes entrent dās quelques corps, où apres auoir causé quelque alteration de fiebure, douleur de teste, vertige, foiblesse, brisement de membres, inquietude, desir de vomir, froid, & frissonnemēt par tout le corps, (qui en temps de peste sōt tous accidens pestilents,) elles treuent apres de la resistance, ou repoussées de la nature s'esteignent, ou finissent en vomissemens, en sueurs, abondantes vrines, quoy qu'elles soient aqueuses, & quelquesfois en apparence de bubon, & pourtāt plusieurs ont eu des douleurs, les autres des enfleures manifestes aux lieux accoustumez: & tout ainsi qu'entre les estincelles, qui sans brusler entierement leur amorce viennent à s'esteindre, les vnes s'esteignent plus-tost, les autres plus tard, & quelques-vnes encores apres auoir esté plus furieuses que les autres; ainsi entre les infectés, les vns guerisēt plus-tost, les autres plus tard, les vns avec des plus grands accidens, & les autres avec des moindres. Et cōme ce seroit vne folie de dire, quē le feu ne se seroit point pris à ces amorces, qui ont esté quelque peu bruslées, de mesme ce seroit vne pure vanité de penser, que les semēces pestilentes ne sont point entrées dans ces corps

qui ont senty les susdits accidents, & que ces accidens, comme plusieurs Medecins ont dict, n'ont point esté pestilens, ny vrais effects de la peste: comme, si pour les appeller pestilens, il estoit necessaire que tous en mourussent, ou que les charbons, les bubõs, & le pourpre, avec vne violente fiebure les feissent mourir, ces Medecins ne se souuenans point de ce qu'ils ont si souuent en bouche, que le plus & le moins ne changét point l'espece, & de ce qu'escrit Fernel, disant que quelques fiebures pestilentes laissent les marques des bubons, des charbons, & du pourpre, & quelques autres n'en laissent point du tout. Deux, par exẽple sont empestez, l'vn meurt, l'autre eschappe, la diuerse fin ne fait pas que tous deux n'ayēt esté malades d'vne maladie pestilẽte, bien qu'elle ait esté plus forte au mort, qu'en celuy qui est eschappé, ou que la complexion vniuerselle, ou des parties nobles du mort ayt esté moins propre à resister aux semences pestilentes, que la complexion de celuy qui est eschapé. On scait que le feu allumé en vne liure d'estoupes n'est pas si chaud comme celuy qui est allumé en vne demie liure de fer, ains le feu des estoupes paroist tiede, en comparaison de celuy du fer: dira-on pourtant que celuy-là n'est pas feu comme cestuy-cy? non veritablement: ie dis donc que s'il semble raisonnable à chacun, qu'entre dix mille estincelles, celles qui sont plus ardẽtes, & qui tombent sur des amorces qui sont plus faciles à s'allumer, façent vn plus grand feu, que celles qui sont moins ardentes, & qui tombēt sur des amorces plus difficiles, pourquoy ne sera-il vray, qu'entre tant de semences

pestilentes, le plus grand nombre, & les plus venimeuses qui ont saisi le menu populaire comme plus disposé à la pourriture, ainsi que nous auons dict, ayent causé vne grande perte? & le plus petit nombre, & les moins venimeuses ayent causé biē peu de mal parmy les riches, cōme y estās moins disposez? car bien que les semences pestilentes se trouuent principalement là où est la plus grande pourriture, comme dans les maisons & quartiers des pauures, toutesfois les maisōs des riches n'en sont pas entierement affranchies; outre que l'air estāt si mobile, & à cause du vēt qui souffle quelquefois, il n'est pas possible que quelque semēce pestilente plus legere ne s'y coule: mais parce qu'ils sōt moins disposez à la pourriture, & qu'ils sont infectez par des semences moins venimeuses, ils se sont garētis de la mort, bien que presque tous ayent espreuē les effects de l'air pestilent, parce qu'ils ont ressenty quelqu'un ou plusieurs des susdits accidens, quoy qu'on n'aye pas creu qu'ils eussent la peste, à cause qu'ils n'auoiēt point des charbons, bubons, pourpre, ou vne grande fiebure.

M. On pourroit dire, s'ils auoient la peste, que par leur hantise ils auoiēt causé la contagion, puis qu'ils auoient ces semences pestilētes qui en sont la cause.

F. Il est certain que la contagion se peut engēdrer où il y a des semences pestilentes, mais non pas si facilement, comme nous auons desia monstré; or en ceux-là qui commencent d'estre attaquez, outre que les semences sont enfermées dans le corps, & ne sortēt point à la peau avec charbons, bubons,

bubons, & pourpre, d'où se forme la contagion, que les empestez communiquent, la nature encore les suffoque apres le contraste qui produict ces accidens: parce que si cela n'estoit elles passeroient necessairement plus auant, en tuant ou enuoiant dehors ces marques susdites, puis que le venin & la nature humaine sont choses cōtraires: & i'ay obseruë, que ceux qui estoient morts sans bubon, charbon, ou pourpre, ou soudainemēt ne portoient aucune contagion, ny leurs vestemens aussi, ce qui ne vient que pour la susdite raison, parce que la nature de ceux-cy estant beaucoup inferieure à la force des semences, elle s'est renduë aussi sans beaucoup de resistance, n'ayant peu chasser au dehors ce venin.

R. De là vient qu'on a dict que ces morts ou malades estoient sans soupçon de maladies pestilētes.

F. Il est vray, parce que ces signes ne paroissent point au dehors, mais ie crois neantmoins qu'il paroist desia combien ils se sont trompez.

R. Il ne sera donc pas en vain si nous considerons que cōme selō la varieté de 3. sujets, à sçauoir des esprits, des humeurs, & des parties solides, la fiēure produit varieté d'effects, & s'acquiert varieté de noms, ainsi la mesmē semence pestilente produit diuers effects, de la varieté des subiets où elle se loge, parce que si elle attaque les esprits, la maladie finit promptement, comme la maladie populaire d'Angleterre qui finist soudainemēt sans contagion en suant ou mourant: car si le malade suë & guerist, il fault dire que ceste semēce a esté rabbatuë & esteinte par la nature: que si le malade nē suë point & meurt, la semence ne se pouuant

estendre iusques à la peau n'apporte point de cōtagion : mais si la semence se prend aux humeurs elle ne finist pas si tost, & croissant avec la pourriture, elle enuoye dehors les susdites marques, desquelles la cōtagion peut venir: c'est pourquoy tant s'en fault qu'il faille dire que ceux qui sont morts dans si peu de tēps sans marques en la peau ne soient pas morts de la peste, qu'au contraire ils ont esté plus cruellemēt attaqués que les autres.

F. Nous concluons donc, que ceste peste (comme les autres) a esté commune tāt aux riches qu'aux pauvres, & que les riches seroient morts si la cōstitution australe eust duré dauantage, & n'eust esté corrigée par la venuë de l'Aquilon, par l'espace de septante iours continuels, outre que la situation de la ville, & le terroir pierreux y ont beaucoup aydé, de maniere que ie puis dire, ce que dict Galien de Tassus, & Cranon; la constitution a esté pestilente à Genes, mais elle eust esté tres-pestilente en vn lieu bas, & en vn terroir humide, comme Pise, Mareme, & semblables: & la peste que Iean Villani raconte fust telle, qu'apres auoir estouffé vne grande multitude de pauvres, (la constitution pestilente continuant) elle attaquas les riches, cōme eust faict la nostre si la cause d'vn si grād mal eust autant duré: mais reuenant à la contagion, ie confesse que les maladies pestilentés sont cōtagieuses en toutes les trois sortes, à sçauoir, en maniāt les malades, leurs habits & de loing: mais il fault que ceste contagion aye des degrez, puis que vous la croyez aussi facile aux accidēs de la peste, cōme il est facile à vn petit feu dont l'amorce est disposée, de causer vn embras-

sement vniuersel: & au contraire, ie la crois si difficile; particulièrement par la voye du fomes, qu'elle ne peut nullement causer la peste, & ie ne puis quitter l'opinion de ceux-là qui tiennēt que les maladies pestilentes sont moins contagieuses que la gale, & quand on supposeroit qu'elles le seroient esgallement, nous voyons par experiēce que la gale ne s'estend point, & ne deuiet point commune: que si vous vouliez sostenir que les maladies pestilentes sont plus contagieuses que la gale, vous auriez à combattre avec les experiences plus claires que le Soleil, avec lesquelles nous monstrasmes hier que les vestemēs des empētez ne peuuent causer la peste, encores qu'ils soient contagieux: & on peut respondre à l'argument de la possibilité en plusieurs façōs, entre les autres ce que nous respondismes hier en parlant de la gale, laquelle quoy que contagieuse, & que par aduantage il y ayt continuellement cent galeux dans vne ville, on ne voit iamais pourtant qu'elle deuienne cōmune, pour la seule difficulté de la propagation, laquelle difficulté est semblable ou plus grāde aux maladies pestilentes: outre qu'il me sera loisible de former le mesme argument contre vous, en demandant si par le moyen des habits d'vn galeux quelqu'vn se peut infecter, ie crois que chacun dira qu'oüy: Je demāde apres si vn autre qui touche ou manie le galeux ou ses habits, peut prendre la galle ou non, si on dict que non, on nie la contagion en la gale, qui se preuue par le sens; si on dict qu'oüy, i'ay le fondement de mon opinion, parce qu'apres cestuy-cy vn autre se peut infecter, puis quatre, puis cent

mille, d'où vient qu'une maladie vulgaire s'en formera contre l'expérience. On peut encore répondre, que ceste possibilité suppose nécessairement deux choses, à sçavoir, les semences fort propres, & le patient tellemēt disposé, qu'en maniant les vestemēs du malade il s'infecte, dequoy ie dōneray vn exemple. Je prens vne petite corde, pour la rompre à deux mains, on demande s'il est possible que ie la rompe, si ie respons qu'oüy, ie dis qu'il est possible & impossible; possible, si j'ay la force si grande que la corde n'y puisse resister; impossible, si la force de la corde ne cede point à la vigueur de mes bras, ainsi en est-il d'un qui manie les vestemens d'un qui a la peste.

R. On suppose toujours la force de l'agent, & la disposition du patient.

F. Si la supposition est vraie, ie suis de ceste opinion: mais elle ne l'est pas, comme on voit par les susdites expériences, où l'agent māque, parce que parmy tant de personnes qui manient les vestemens des empestez, il n'est pas croyable qu'il ne s'en trouue quelqu'un qui soit disposé à prendre la peste. Si doncques les vestemens des empestez que tāt de personnes manient, & portent sur le dos, au grand Caire, à Constantinople, à Paris & ailleurs n'offencent personne, il faut nécessairement confesser, ou que ces semences n'y sont point, ou qu'elles n'ont point la force qu'on croit communément.

M. On peut doncques hanter avec les empestez, comme avec les galeux.

F. On le doit beaucoup moins, non pas tāt pour la facilité de la contagion, comme pour le danger:

j'ameneray vn exemple de deux qui sautent sur
 deux murailles, toutes deux de la largeur de deux
 coudées, mais l'une est esleuée de cent coudées,
 & l'autre d'une coudée seulement: or qui ne sçait
 que chacun sera plus hardy de sauter, & de courir
 sur la basse que sur la haute, non pas que la com-
 modité soit plus grãde en celle-là, qu'en celle-cy,
 puis qu'elles sont d'une esgalle largeur, mais pour
 la difference du peril, parce que celuy qui tombe-
 roit de la basse, il ne receuroit que peu ou point
 de mal: mais celuy qui tomberoit de la haute se-
 roit manifestement en danger de mourir. Ainsi la
 conuersation d'un galeux ne peut causer que la
 gale, mais celle d'un qui a la peste, bien que la
 contagion en soit plus difficile, peut plus facile-
 ment donner la mort, comme la conuersation
 d'un qui a une fiebure maligne, avec pourpre sans
 peste, est encore dangereuse: car nous auons veu
 par experience que quelqu'un en maniant la per-
 sonne, les excremens, & les habits d'un tel malade
 a pris la mesme fieure, bien qu'entre dix, les huit
 qui ont fait la mesme chose n'ayent receu aucun
 dommage: & quoy qu'on voye que pour les vi-
 siter, leur toucher la main, le pouls, & les habits,
 les personnes ne s'infectent point, neantmoins
 i'estimerois que ce seroit vn acte de folie, si quel-
 qu'un les hantoit volontairement: & tiendray
 pour regle generale qu'on doit cōuerter prudem-
 ment avec ceux qui ont une maladie contagieuse,
 & mesme qui soit pestilente, encores que l'effect
 de la contagion n'en arriue que difficilement:
 mais de croire qu'on a la peste pour auoir touché
 la main, ou le manteau de l'empesté, ie l'estime

plus dangereux pour l'alteration de l'esprit, que pour maladie qu'on aye prise. On voit doncques que ceste raison fondée sur la contagion, qui est l'Achille de la cōmune croyance, tombe de soy-mesme pour les raisons & les experiēces susdites. Maintenāt en ce qui touche l'armée de Ferdinād, & des Venitiens, encores qu'on puisse dire que ces exēples ne repugnent point à nostre opinion, qui tient que la peste ne se peut point engendrer d'une cause particuliere, cōme d'une, ou de deux charges d'habits de personnes infectez, comme on sçait pareillement, que pour vingt sacs de grain pourry que le peuple de Cōstantinople, par maniere de dire auroit māgé, la peste ne s'engendreroit pas pour cela dans la ville, ny aucune autre maladie populaire, oüy bien s'il en mangeoit deux mois continuellement, dans lequel temps on n'en pourroit si peu manger qui ne peut servir de cause commune à vne maladie commune : de mesme vne si grande multitude de pestiferez, & vne si grande abondance d'habits, comme celle que peut charrier vne armée, ne peut estre appelée cause particuliere, comme deux charges seulement, bien qu'on puisse semblablement respondre, que c'est autre chose de parler des infectez, & autre chose de leurs habits, parce que les infectez corrompent l'air de leur demeure, mais les habits, quoy qu'ils soient pleins de semences pestilentes ne l'alterent point, outre que celuy qui manie les malades ou morts de la peste, ou leurs excremens, s'infecte plus facilement que celuy qui manie seulement leurs habits : & les habits qu'on vient d'oster d'alentour des malades sont

plus contagieux que ceux dans lesquels ils ont esté auparauant : & partant quand on diroit que toute vne armée entrant dans vne ville, avec vne multitude de malades, & de leurs habits, pourroit comme vne cause commune engendrer la peste, on ne diroit rien qui fust contraire à nostre opinion : toutesfois ie ne crois point que l'armée portast ceste grande peste en Espagne : ie crois bien Torella, quand il dist que le Roy enuoya sa fille en Flādre avec ses nauires, & que depuis leur retour la peste affligea l'Espagne, mais pourtant il ne s'ensuit pas que les nauires la portassent, dās lesquelles plusieurs deuiendrent malades & moururent à cause des eauës pourries, & si ceste peste s'espandit par tout, c'est vne folie en cherchant la cause d'auoir recours à ceste armée.

M. Il semble neantmoins qu'il le faillē croire, puis qu'ils n'en recogneurent point d'autre.

F. C'est là où consiste toute ceste difficulté, parce qu'il arrina à Torella, & aux autres Medecins de ce temps-là ; (ne considerans pas la constitution precedente de l'air, vraye cause de ceste peste,) ce qui aduint à plusieurs autres, comme en l'an 1348. aux Medecins d'Italie, qui creurent que ces quatre galeres Geneuoises auoient apporté la peste du Leuant en Italie, & maintenant à tous nous autres, qui auons estimé qu'on l'auoit apportée de Lombardie dans vne vallise, & auparauant aux Venitiens & Padoüians, qui ont pēsé qu'un homme de Trente la leur auoit apportée : or comme i'ay dict cy-dessus, on prend facilement vne cause pour vne autre, & mesme la faulse au lieu de la vraye, commes'accordant mieux avec nos sens :

& ie me souuiens de plusieurs en ceste peste, lesquels apres auoir mangé & beu vne quantité de laict & de vin, & fait plusieurs autres desbauches, en furent atteints & moururent, & à cause de ceste forte opinion rendirent coupable de leur mal vne corde qu'ils auoient touchée avec leurs habits, ou vn baiser de leur commere qui auoit eu le mal, & ie pourrois raconter vne infinité de tels exemples, par lesquels on voit clairement la vanité de ces opinions: On peut dire de la peste de Venise, ce qu'on a dit de celle d'Espagne, biē que ie croye qu'une grande armée, (comme celle qui alla cōtre Emanuel, ayāt pour Capitaine le mesme Doge, & qui fust si fort trauaillée de la peste,) en deschargeant tant de malades avec leurs habits dans Venise, aye peu infecter parmy vne si grāde multitude huiet peut-estre de cent qui manierent les personnes, les excrements, ou les habits des malades, & toutesfois elle ne s'estēdit point, ains finist assez tost sans sortir de la ville: & ceste maladie ne merite point le nom de peste, ie dis celle de la ville, car celle de l'armée fut tres-grande, & fort commune, & produite d'une cause cōmune, c'est à dire des eauës corrompuës, comme dit Sabellicus; mais celle de la ville furent plusieurs accidēs de peste qui vindrent de la grāde cōuersatiō, nō pas des ces vestemens, mais des malades mesmes: où i'estime qu'il est fort vtile de considerer ce qu'on peut facilement cōprendre de la nature de la peste, à sçauoir qu'il y a bien de la difference entre la peste, & les accidens pestilens; parce que s'il ne mouroit tous les iours en ceste ville qu'une personne avec tous les accidens pestilēts,

on ne peut pas dire avec raison que la peste y soit qui est vne maladie commune, qui en frappe & tue plusieurs en peu de temps : que si quelqu'un dit que celle-là fut vne vraye peste, à cause de la mort parauanture de 25. ou 30. mille personnes, ie responds que l'effort de la mortalité fut en l'armée, & non pas dans la ville. Je ne diray rien de la peste de Tripoly que Falope recite, puis qu'elle confirme nostre opinion: parce que si elle nasquit, non d'un fomes, mais de l'air remply de vapeurs pestilentes qui s'engendrent dans ceste boutique, qui estoit pleine de marchandises, & auoit esté fermée l'espace de trois ans, on peut dire qu'elle fut semblable à celles qui s'engendrent des cauernes. Je responds à la peste d'Allemagne que quelques scelerats semerent çà & là en demandant si ce fut vne vraye peste, ou quelque accident de peste: que si ce fut peste, c'est vne folie de croire, que ces meschans la peussent semer, si quelques accidens pestilens nous sommes d'accord: Et Brace merite d'estre excusé n'estant point medecin, car il falloit qu'il escriuit le bruit de ce temps là, qui estoit qu'un soldat l'auoit apportée de Pise, & l'auoit secretement consignée dans le giron d'une femme. Mais Oddo, Altomarus, l'Ingrassia & les autres escriuains modernes meritent la mesme excuse que les Medecins de Milan, de Venise, & de Genes, en croyant que les pestes recentes ont esté apportées en leur pais dans vne valize. Et Guichardin escriuant que la peste nasquit à Milan, à cause des vestemens qu'on y auoit apportés de Biagrasse, où la peste auoit desia commencé, escrit le

brui&t commun, & l'opinion des Medecins de ce temps là, lesquels meritent plus grand blasme que les nostres, parce qu'on sçait que l'année 1524. la peste fut fort commune à Genes, & en Lombardie, & nous ne manquons point de vieillards qui se souviennent de la constitution australe qui estoit alors, qui ne fut point recogneuë de ces Medecins, & partant ils creurent qu'il mourut cinquãte mille personnes dans Milan, selon le tesmoignage de Guichardin, à cause de quatre lambeaux qu'on y apporta de Biagrasse. Mais nos Medecins ne sont pas si reprochables, parce que la constitution de l'air n'a pas esté semblable à Milan, Venise & Genes comme elle fust en l'année 1524. ains plusieurs constitutions sont auenuës en diuerses saisons, ce qui a peu facilement entretenir l'opinion touchant la contagion. J'ay consideré le lieu de Fracastor, que le moindre escholier iugera n'estre point correct pour plusieurs causes, mais particulièrement pource qu'il n'est pas croyable que Fracastor ne sçeut que la peste que Thucidide a escritte, venoit de l'air pestilent, comme on voit clairement par Galien, & le mesme Thucidide: & ne sçauroit-on tirer de ses escrits qu'il s'accordast avec la commune opinion, à quoy les studieux doiuent prendre garde, car ce seroit vn cas bien estrange, qu'un homme si estimé en traittant de la contagion qui saisist le cœur des hommes, n'eust pas seulement escrit deux mots de ceste si facile propagation & de ce qu'on croit que la peste se peut porter çà & là dans les habits, s'il eut esté de ceste opinion.

M. Pourquoi ne l'a-il doncques refutée?

F. Parce que parauanture il ne s'est pas souuenu des moyens, car il y a des hommes auxquels bien que quelques opinions vulgaires ne plaisent point, ils ne les veulent pas neantmoins estoufer, où peut-estre qu'ils ne se souuiennent point des arguments qui le pourroient faire.

M. Mais ie treuue bien estrange comme dit M. R. que les Princes soient si rigoureux sans raison, car on voit combien ils craignent d'attirer la peste chez eux. Ce qui paroist estre iuste, tant à cause du meur conseil qu'ils y apportent, que du grand fruiçt qu'ils en retirent, en garantissant leurs estats.

F. Les Princes le plus souuent ne sont point Medecins, & aux choses qui regardent la medecine ils suiuent le conseil des Medecins : auxquels m'adressant ie leur dis ou vous fermés les passages & defendés le trafic pour garentir vos Prouinces de la peste, ou de quelques accidens pestilens: si c'est pour ces accidens vous aués raison, car ie ne nie point qu'il ne puisse arriuer qu'une pellice ou chose semblable, qui aura esté à l'entour d'un pestiferé, & portée en vostre pais dans vne balle ou vallise bien fermée ne puisse faire mourir ou deuenir malade quelqu'un d'une maladie pestilente, encore peut-estre que qui en voudroit faire la preuue industrieusement il se trouueroit bien trompé : mais si vous vous traueillés ainsi pour fuir la peste, vostre travail est inutile, tant parce qu'elle ne s'engendie point d'une cause particuliere, & qu'il est impossible que ces accidens pestilens qui naistrent d'une

pellice, multiplient tellement qu'ils produisent
 la peste, comme nous auons desia monstré, com-
 me aussi parce que avec toute vostre doctrine,
 vous n'empescherés iamais que la peste ne naisse
 par la vehemence des vents du Midy en vostre
 pais: vous pourrés bien avec ce soin diminuer la
 mortalité, comme par exemple si 40. mille per-
 sonnes deuoient mourir, faire qu'il en meure dix
 ou quinze milles moins, mais si vous croyés en
 demeurant seulement aux passages d'euiter la
 peste, & que vous-vous trompés grandement, &
 combien d'autres se sont trompés avec vous,
 lesquels en se contentans de bien garder leurs
 limites ont oublié les prouisions qui eussent esté
 grandement profitables à leur patrie; & tout ainsi
 que ceux qui deffendent les villes assiegées, & qui
 sans experience, en abandonnant la muraille plus
 foible & où les ennemis sont les plus forts, tour-
 nent toutes leurs armes du costé qui est inexpu-
 gnable, & où les ennemis sont tres. foibles, vous
 vous armés bien pour la defence de vostre pais,
 en repoussant au loing toutes sortes d'habits &
 de lettres qui viennent des lieux, qui sont à grand
 peine suspects, & ne prenez pas garde à la con-
 stitution del'air pestilent, qui se moque de la
 vanité de vos pensées. Or il nous en est arriué
 de mesme, car avec tout nostre soing extraor-
 dinaire contre ceste valise, en disant la chanson
 que qui ne touche n'est point compere, nous n'a-
 uons point pris garde à la constitution de l'air
 pestilent, laquelle a esté quasi palpable en ce
 lieu, si elle fust iamais sensible ailleurs. Et le mes-
 me est arriué aux Venitiens & Padouans, lesquels

s'estants tournés avec toute leur force à esteindre la contagion de Trente, n'ont point descouvert la constitution australe qui a duré plusieurs mois, comme dict Mercurial, ny mesme que la peste affligeoit presque toute l'Europe, L'Autriche, la Transsilvanie, & autres nations d'Allemagne, la Friole, Venise, Padoüe, Milan, la Calabre, la Sicile, & l'Esclauonie.

M. Il n'y a doncques aucune diligence qui puisse garantir vne Prouince de la peste ?

F. Je crois qu'il est impossible d'euitèr par aucun moyen humain celle qui vient du soufle des vèts meridionaux.

M. Donc toute la diligence qu'on y apportera fera inutile ?

F. La diligèce qui est faicte avec raison n'est point inutile, ains tres-profitable : non pas pour éuitèr la peste, mais pour rabattre sa violence, laquelle consiste en la mort de plusieurs : or les prouisiõs que les Princes font bien à propos, seruent à diminuer la mortalité en conseruant plusieurs en vie, lesquels pour le peu de soin qu'on a de ce qui est necessaire, mourroient miserablement.

M. Mais pour redire les raisons de M. Ratto, ce mal de Naples qui est venu comme on sçait des Indes, & qui est vne maladie si vniuerselle en toute l'Europe, & presque en toute l'Asie, & qui a causé de tres-grands dommages en Affrique, semble bien affoiblir vostre opinion.

F. Plusieurs choses m'ont faict souuent estimer que Fracastor estoit vn bel esprit, mais le discours qu'il a faict sur les causes du mal de Naples (duquel il traicte sous le nom de Sissilide) me

l'a confirmé dauantage. Et si ce qu'il escrit comme tres-alleuré est veritable, qu'on a veu ce mal presque en mesme temps en Italie, en Allemagne, en Espagne, en France, en Scythie, & que plusieurs l'ont ressenty sans aucune contagion, & qu'il a esté predict par les Astronomes, & comme dit Iean Leon qu'il aye faict de tels rauages en Barbarie, que la dixième partie n'en soit point reschappée, & qu'en Atlante & la Numidie on ne l'aye pas seulement ressenty, ains que mesme les Napolifés de Barbarie, en se faisant porter en Numidie ont esté gueris sans autres remedes, il faut accorder avec Fracastor, qu'une telle maladie n'est point venuë dans les Nauires des Indes, mais de la malice de l'air, prouenuë de l'estat du Ciel & des Estoilles, & particulietement de la conionction de Saturne, Iupiter & Mars: qui arriuant rarement & durant long temps à cause du mouuement tardif de Saturne, est vne cõionction tres-puissante, d'où les Astronomes predisent tousiours de nouvelles & grandes maladies. Et c'est comme vne chose fatale, dit Fracastor, que de temps en temps naissent & renaissent quelques maladies communes qui semblent entierement nouuelles, comme en l'an 1482. vne sorte de mal de costé, qui enuahist toute l'Italie, le mal des yeux courant apres par tout, & quelques ans apres vne espece de fiebures qu'on appelloit lentilles, & puis la peste des bœufs, & peut-estre que nos nepueux verront d'autres maladies comme les anciens ont veu le mentagra au temps de Tibere, laquelle s'esteignist comme on voit que le mal de Naples va s'esteignant,

& peut estre que la course de cent années estant terminée, qui sera en l'an 1595. on ne le verra plus en nostre hemisphere, & Fracastor dict qu'il est croyable que ce mal a esté autresfois dans le monde, & qu'avec le temps il y doive retourner: & partant qui veut trauailler son esprit, & chercher diligemment la cause des choses, comme il a fait en tenant mieux la bride à sa croyance, il cognoistra combien souuent les opinions vulgaires sont mal fondées: & pour n'allonger davantage ce discours, i'obmets volontairement plusieurs choses, que ie pourrois adiouster à ceste matiere: qu'en dites-vous, Monsieur?

- R. Que les studieux sont grandement obligez à Fracastor, pour auoir ouuert les yeux à plusieurs en la recherche de quelques causes, & particulièrement de celle du mal de Naples, lequel ayant commencé de se faire voir en Italie en l'an 1495. tous les hommes creurent constamment qu'il s'estoit espandu en tout le vieux monde par la seule contagion des personnes infectées, qui estoient venuës de nouveau; & peut-estre qu'une telle opinion eust tousiours duré si Fracastor ne l'eust examinée, & n'eust monstré avec de combien foibles fondemens elle est entrée en la croyance des hommes, à sçauoir que Naples estant assiegée on y trouua des soldats qui estoient venus avec Christoffe Colomb, infectés de ce mal, & que par artifice les Italiens les firent couler en l'armée Françoisse, comme escrit Falope, comme si on ne sçauoit pas que Charles VIII. Roy de France, sans aucun siege, & mesme sans rompre vne lance, prit avec la ville de Naples, tout le Royaume: &

comme si ce mal qui estoit nouveau, en faisant mourir les François à la façon de la peste, de victorieux, les deust rendre vaincus : or son voit dans les escrits des grâds personnages de choses estranges, & qui semblent des oracles à qui ne les veut point examiner, mais elles deuiennent ridicules à l'endroit de ceux, qui ne se contentans point de l'autorité, en recherchent soigneusement la raison.

F. Ce que Manard escrit ne me semble pas moins ridicule, disant que le mal de Naples prit son commencement d'une courtisane fort renommée à Valéce d'Espagne, qui auoit couché avec un Lepreux, & qu'elle en infecta 400. autres, quelques-uns desquels suiuirent Charles en Italie : laquelle opinion suppose que la Lepre des Arabes, & l'elephthiasis des Grecs est vne mesme chose, avec le mal de Naples, ce que Leonicene & Fracastor refutent par leurs escrits ; parce que dit-il, ceste lepre par la conuersation de ceste femme, degenera au mal de Naples : or ie vous laisse à penser, Messieurs, s'il y a de l'apparence ; & pour abbreger, il semble selon Manard que ceste grâde difficulté d'estre nouveau, & engendré par la seule contagion soit claire & desnouée sans beaucoup de peine.

M. On sçait neantmoins qu'on trouue ce mal en l'Isle Espagnolle.

R. Parce qu'il y est autant familier comme la lepre en Egypte, & en Iudée.

F. Si ma memoire ne me trompe, il me semble d'auoir entendu des Medecins & des Historiens encores, qu'une certaine maladie regne en quelques endroits

endroits du nouveau monde, qu'ils disent estre semblable à celle-cy que nous appellons mal de Naples, mais ils disent aussi qu'elle est fort legere & familiere à ce peuple-là: ce que s'il est vray, il fault confesser qu'il y a grande difference entre ce mal-là & celuy de Naples: & qui en voudra sçauoir la verité, peut-estre qu'il verra que le mal de Naples ressemble plustost à l'elephantiasis des Grecs, qu'à la maladie des Indes.

M. Vous ne pouuez nier qu'on n'aye descouuert ce mal parmy nous, depuis qu'on a trouué le nouveau monde.

F. Que concluez-vous par là?

M. Je conclus qu'il naist où il se treuve.

F. Je ne vois pas si clairement que ce mal de Naples se trouue en ce pays-là; dauantage qu'une chose ayt esté trouuée apres vne autre, cela ne fait pas que la premiere soit cause de la seconde: La peste est familiere en Egypte, si doncques elle venoit en Italie, concludroit-on qu'elle vint d'Egypte? non veritablement.

R. Vous vous pourriez encores seruir de ceste raison, qui est bié forte, & de laquelle vous vous estes seruy contre la cõmune opinion de la peste; parce que si le mal de Naples a peu croistre par tout le monde avec tant de furie, à cause de trois nauires qui retournerent avec Christofle Colomb, comment peut-il auoir perdu sa force maintenant? pourquoy n'est-il allé plustost en croissant, puis que la contagion, & la cause d'icelle s'augmentoient, tant parce qu'il estoit desia espars, comme à cause de soixante flottes plus grandes qui sont depuis reuenues des Indes?

M. Ils dirōt peut-estre qu'il s'est familiarisé parmy nous, comme avec eux.

F. Ils ne sçauroient; parce qu'il naist en ce pays-là ainsi doux & benin, ou à caute de l'air, ou du boire & manger, parce que vne maladie commune, comme dit Galien, ne peut venir d'ailleurs, ny pareillement se conseruer: & Falope me fait estonner quand il dict que selon Hipp. il y a trois causes des maladies communes, à sçauoir le manger & boire, l'air, & les actions humaines: premiere-ment, ie voudrois voir ce passage d'Hipp. qui dit plustost le contraire comme il me semble, ne voulant point d'autre cause commune que l'air, comme nous auons desia monstré: dauantage, supposons que ce passage soit d'Hipp. comment peut dire Falope, que le mal de Naples est commun, parce qu'il a la cause commune, qui sont les actions humaines, à sçauoir s'entre-toucher & manier? veu que si cela est, le mal de Naples doit auoir esté de tout temps.

M. Il vent peut-estre dire que la cause a esté le formes qu'on a apporté des Indes, mais que venant à croistre, il s'espandit par le moyen de telles actions.

F. Il le deuoit dire comme cela, puis qu'il auoit ceste opinion, mais il ne l'a pas dict pour éuiter parauenture l'inconuenient qui en naistroit, c'est à dire qu'un mal si commun ayt vne cause particuliere, ce qui est contraire à la raison, à l'autorité d'Hipp. & à l'experience qu'on a des maladies communes, comme nous auons desia prouué, d'où ie cognois d'autant plus la grande difficulté qui se trouue en la recherche de la cause des cho-

ses: mais si les hommes doiuent pancher du costé où la raison a plus d'apparence, ils doiuent à mon aduis suiure l'opinion de Fracastor, touchant les causes du mal de Naples, & bien que nous con-
cediõs qu'on l'ayt apporté des Indes, nostre opi-
nion touchant la peste ne s'en affoiblist point,
ains s'en fortifie, parce que si le mal de Naples ne
se prend que par contagion, il faut croire qu'il
ne nous quittera iamais, puis que nous n'auons
peu nous en affranchir en l'espace de 87. années
qu'il nous afflige: s'il est donc impossible de net-
toyer le monde du mal de Naples, qui se prend
plus difficilement que la peste, à plus forte raison
ne se pourra-on iamais nettoyer de celle cy, mais
l'experience faisant voir le contraire, monstre que
la peste ne se prend point par contagion.

- M. Cependant le vulgaire estime vne grande ex-
perience celle des religieuses, mais plus grande
celle des deux hospitaux, où il y a tât de malades,
ausquels si l'air eust esté pestilent, il se fust plus
particulieremēt attaché qu'aux personnes saines.
- F. Encores que ceste difficulté comme vous dites
ne soit fascheuse qu'au vulgaire, si despleust-elle
beaucoup à vn Medecin qui ne se prise pas peu:
à laquelle avec nos fondemens, il est aisé de res-
pondre: & premierement, il n'est pas veritable
que tous les Monasteres se soient conseruez sans
aucun accident de peste, parce qu'il mourut vne
religieuse à sainte Marthe avec vn bubon, & i'en
ay guery vne autre qui auoit la mesme marque,
& d'autres encores avec d'autres accidés de peste
tous visibles: il en mourut vne sans bubon ny
charbon au Monastere de saint Sebastien, qui

auoit des signes encores plus dangereux, bien que pour ne scandaliser le lieu, on ne les iugea point pour estre accidens de peste; mais supposons que toutes les Religieuses ayent esté garenties de tout mal, que s'en-suit-il pour cela ?

M. Que le grand soin qu'elles ont eu pour se garder de la contagion les a conseruées, qui n'eust de rien seruy si l'air eust esté pestilent.

F. Nous auons desia monstré que c'est que l'air pestilent, & qu'il n'est point également tel dans vne ville infectée: les Monasteres des Religieuses sont fort nets, & peut-estre plus que les maisons des riches, & partant la mesme responce que nous auons faict au doute touchant les riches, sert à celuy des Monasteres, outre que les Religieuses en tel temps s'exposent moins à l'air que les autres, parce qu'elles dorment la nuit dans leurs chambres, & sont presque tout le iour dans le cœur, c'est pourquoy il ne se faut point estonner si elles ont iouy de ce priuilege, & si ceux qui n'entendent point la nature de la peste ont proposé ces difficultés & plusieurs autres: & pour monstrier dauantage la foiblesse de celuy qui a mis en auant ceste difficulté, ie demâde si quinze mille personnes se sont garenties dans Genes avec les valées de Bisagno, & Possauere ?

M. Comment, quinze mille, plus de cinquante mille.

F. Pourquoy n'ont-elles donc esté frappées parmy tant de morts & de malades qui estoient enfeuelis dans la peste iusques à la gorge.

R. Ils répondront que leurs corps n'y estoient point disposez.

F. Grand Dieu, s'ils ne trouuent point estrange que quarante mille pauvres personnes se soient garanties parmy la peste, où l'air est beaucoup plus pestilent, pourquoy s'estonneront-ils que mille Dames presque toutes nobles, sobres, & enfermées en des lieux fort nets, & où l'air est moins corrompu, se soient garanties de la peste? comme si la responce qu'ils donnent pour les cinquante mille déreglées ne valoit rien pour mille qui vivent sobrement, encores qu'elles fussent logées en mesme lieu.

R. Je suis fort satisfait de ce que vous dictes.

M. Et moy aussi, mais ie ne sçay si vous pouuez dire le mesme des Hospitaux.

F. Je me souuiens qu'au mois d'Auril ie feus au grand Hospital (lequel on ferme aux malades au temps de la mortalité) pour faire sortir sept ou huit femmes avec des bubons & charbons ouuerts, qui y auoient esté introduites par vn bourgeois de Pieuerane, village qui est esloigné d'un mille de la ville, & plusieurs autres y entrerent encores qui estoient infectez, que les seruiteurs de là dedans toucherent & seruirent, sans que iamais aucun d'entr'eux prist la peste, hormis vn sommeillier, qui depuis quatre mois, vers la fin d'Aoust beut tant de vin de Pierre-noire, qui est fort violent, qu'une fiebre pestilente le saisit, avec des resueries, & ensemble deux ou trois charbons sur les iambes, & qui mourut dans trois iours, & neantmoins il seruoit & manioit toutes choses, les charbons estans ja dehors, de maniere, que si on deuoit deuenir malade dans l'Hospital pour la hantise des pestiferez, ils le

deuoient deuenir alors, & mourir trestous de la peste : & toutesfois personne, excepté luy ne le fut, qui ne hanta avec aucun au dehors, & duquel on sçait le desordre qu'il commit en beuant : & veritablement c'estoit vne chose ridicule, que durant sa maladie on l'examinoit avec vne grãde diligence, pour sçauoir avec qui il auoit esté ce iour, ceste sepmaine, & ce mois, quoy qu'on sçeuft le desordre du vin, qu'il estoit d'une complexion aduste, & en vne pareille saison, en temps de peste, & qu'on cogneust trop clairement la cause de sa maladie : & bien qu'on trouuaft qu'il n'auoit hanté avec personne, parce qu'il y auoit long temps qu'il ne sortoit point de l'Hospital, on creust neantmoins assurement qu'il estoit mort pour auoir seulement frequenté avec quelqu'un, sans penser à la vraye cause de son mal : on sçait que le petit Hospital des incurables ne reçoit que les phtifiques, hydropiques, Napolises, & autres atteints de maladies incurables, comme chancres, lepres, fistules & semblables ; or si le Medecin qui me proposa ce doute eust consideré que ces malades sont plus aduantageusement armez contre la peste que les autres qui sont sains, peut-estre qu'il ne l'eust pas fait avec tant de hardiesse.

M. Comment, ils sont plus aduantageusement armez ?

F. Ouy Monsieur, parce que la nature ayant accoustumé d'euoyer toutes les humeurs vicieuses en ces playes, ou parties malades ; les semences pestilentes espargnant les parties nobles, se purgent & se dissipent plus facilement.

- R. Et partant on voit que plusieurs en temps de peste affoiblissent, ou font quelque playe aux parties moins nobles, afin que la nature aye vn lieu pour y enuoyer le venin, lequel sans cela par aduenture se tourneroit vers le cœur, ou le cerueau, avec vn manifeste danger: & de là vient qu'en tel temps ces personnes-là, & celles qui ont la goutte, ou quelque autre infirmité se preseruent plus facilement de la peste.
- M. I'ay oüy de bon cœur ce que vous auez dict des Hospitaux, ie crois que chacun en sera satisfait, & que les plus fortes machines de vostre opinion se doiuent tourner contre le mal Galantin, lequel prouenât de l'air a presque couru toute l'Europe, sans espargner ny pauvres ny riches.
- F. Cest argument qui semble le plus fort de l'opinion contraire, tombe de soy-mesme, la nature de l'air pestilent estant cogneüe, laquelle consiste entierement aux vapeurs & semences pestilentes engendrées materiellement de la pourriture, laquelle ne se faict point en l'air, mais en la terre: & bien que l'air soit corrompu, & au mal galantin, & en la peste, le vice & la cause d'iceluy en l'vn & en l'autre sont bien differens, parce que le vice qui se treuve en l'air pestilent, n'est autre que la vapeur ou semence pestilente, & au mal galantin vne simple intemperie & immoderation: & la cause formelle en l'air pestilent ne vient point de l'air, mais de la pourriture engendrée en la terre du pays où la peste se trouue; mais la cause formelle du mal galantin naist du vice de l'air, qui vient de la Mer mediterrannée, ou des lieux plus esloignez.

Or l'air austral qui produit la peste ne la produit point comme austral, mais comme pestilent, duquel la cause formelle vient, comme i'ay desia dict, de la terre du propre pays : laquelle n'est pas semblable par tout, puis que la pourriture s'engendre plus en vn lieu qu'en vn autre : d'où l'on voit que l'air austral comme tel, est commun à tous ceux qui sont exposez aux vents meridionaux tant riches que pauures, parce qu'il entre tel dans le pays : & si l'air austral y entroit pestilent, sans doubte il seroit commun à tous : mais il n'y entre point, ains y deuiet pestilent, & partant il n'est pas commun à tous esgalemment, car il regne dauantage où il y a des pourritures plus grandes : & nous auons desia monstré qu'elles le sont tousiours parmy le peuple & les pauures, & partant l'argument ne vault rien, l'air austral est commun à tous, doncques le pestilent le doit estre ; parce que n'estant pas commun à tous, vous voyez Messieurs, qu'il offence dauantage ceux-là que ceux-cy, & l'austral qui est commun à tous peut remplir facilement toutes les testes, & produire le mal galantin.

M. Si le mal galantin vient sans autre moyen de l'air humide & froid, qui entre comme cela dans le pays ; & la peste aussi de l'air humide ; mais par l'entremise non seulement de la pourriture, ains encores des semences pestilentes. Donques les causes qui concourent à la generation de la peste, sont en plus grand nombre que celles du mal galantin : aussi n'est-ce pas sans raison si la cause d'un grand effect, comme

la peste est plus grande que la cause d'un petit, tel que celui-là.

F. Vous auez fort bien tiré vostre conclusion M. & i'y adiouste pour plus grande preuue, qu'encores qu'on fust d'acord que l'air est également pestilent en tout vn pais, il n'infecteroit pas pourtant les hommes si facilement que le vent de Midy les appesantit, parce qu'il est d'autant plus mal-aisé d'infecter que causer vne fluxion, qu'il est plus difficile de corrompre que d'alterer, or le mal Galantin est vne alteration que toute legere constitution de l'air est capable de produire; mais pour infecter les hommes, qui est autant que les corrompre, toute constitution australe n'est pas suffisante, mais il faut qu'elle soit longue & vehemente, & que la disposition des corps soit grande, puis que toutes les choses sont naturellement portées à leur propre conseruation: de là vient que ces maux Galantins arriuent souuent, c'est à dire ces vniuerselles, & salutaires maladies; mais les pestilentes rarement: d'où ie concluds que si la peste qui vient de l'air infecté n'est tres-cruelle, elle ne sera iamais si commune que le mal Galantin, & quand mesmes elle seroit tres-cruelle, elle ne seroit iamais commune aux riches comme aux pauures, comme on voit en la peste de l'année 1528. & en celle de 1348. Et quād bien nous accorderions que l'air fust également pestilent & dans les maisons des riches, & dans celles des pauures, toutesfois les corps de ceux-là sont tousiours moins disposez à la peste, que de ceux cy. Vous voyés donc Messieurs, que

ceste raison du mal Galantin qui sembloit estre si forte, se desnouë & se destruit d'elle-mesme, pour vous monstrer combien la cognoissance du fondement est necessaire en toute difficulté, car nous n'auons pas plustost entendu la nature de la peste & de l'air pestilent, que toutes les difficultés ont cessé.

M. Mevoila content : mais toutesfois c'est vne grande merueille que ceste peste venant de l'air, elle aye plustost attaqué vn lieu qu'un autre, cōme Ceriane, Ponte - Decimo & Nerui, & vn quartier de la ville qu'un autre, comme Serazano, plustost que Pré.

F. Je ne crois pas qu'on puisse treuver aucune peste quoy que grande & vniuerselle, où l'on ne puisse former le mesme doute. Mercurial escrit que les Venitiens & les Padouans l'ont ressentie dernièrement, & que les Milanois n'en ont point esté garantis, & Mathieu Villani, si i'ay bonne memoire, dit que la peste vniuerselle de l'an 1348. qui rauagea tout le monde avec l'Italie, n'offença pas beaucoup Milan; & le mesme Mercurial assure d'auoir leu dans l'Historien Bretcian, que Bresse avec tous ses bourgs, ne ressentit point la grande peste qui du temps de Gal. affligea l'Italie durant l'Empire de Marc Anthonin: c'est pourquoy ce n'est pas sans raison s'il dit que celuy-là est heureux qui cognoit la cause des choses. Que si parmy quatre qui hâtēt ceux qui sont infectez, ou de la peste ou du mal de Naples, le mal se prend à celuy qui sembloit estre le plus sain, & de la meilleure complexion, ie crois qu'il est impossible d'en sçauoir la cause.

- R. On donnera la raison vniuerselle que Galien donne, qui est la complexion de celuy-là, que nous ignorions auparauant.
- F. Je la donneray aussi avec quelque fondement aux exemples que i'ay propolés: parce que Ceriane est vn lieu fort humide, sale & plain d'ordures, non pas tant pour l'abondance des eaux lesquelles y ont leur source, comme pour le grãd nombre de pourceaux dont elle est remplie: & le Siroc se faict fort sentir à Ponte. Decimo pour vne certaine concavité que les montagnes y forment comme il me semble, & à cause de plusieurs moulins d'eau, car les vapeurs pourries qui s'en esleuent, & celles que le Siroc y apporte n'ont point d'ysuë. Pour le quartier de la ville deuers Serazane, outre qu'il est plus rempli de peuple, il est encores plus exposé au vent austral; & celuy deuers Pré & saint Thomas n'est point si rēply, ny si exposé à ce vent, outre que le quay & le port le defendent mieux. On dit le mesme de la ville de Nerui qui est incommodée du vêt austral, sans que l'Aquilon la deffende aucunemēt. Et veritablement en cecy l'air pestilent est semblable au feu, lequel estant sous differentes matieres combustibles, commence à brusler les plus faciles; & en continuant il brusle celles qui le sont moins, mais finalement il les consume toutes, car il a commencé d'infecter les lieux & les personnes qui estoient plus disposees à recevoir l'infection, & il eust infecté ceux lesquels y sont les moins disposés s'il eust persueré davantage; mais la Tramontane a esté la Teriaque qui nous a garantis de plus grand mal.

- M.** Si la peste a esté incognuë iusques auourd'huy, il n'est pas possible qu'on y ayt apporté le soin qui est nécessaire pour s'en pouuoir garantir, c'est pourquoy il ne vous reste qu'à nous le faire cognoistre.
- R.** Nostre discours seroit autrement imparfaict: mais il me semble qu'il est bien tard, & puis nostre profession nous contraint de quitter bien souuent les lieux qui sont les plus agreables pour aller là où l'on n'entend que plaintes & lamentations.
- F.** Il est vray, nous pouuons laisser ceste partie pour demain, & cependant allons-nous-en, apres auoir baisé les mains au Seigneur Estienne.
- M.** Vous aués raison, allés-vous-en à la bonne heure.

Fin de la sixiesme Iournée.



SEPTIESME ET DER-
niere Iournée.

- M. VOÛS soyez le bien venu Monsieur R. assiez-vous, & dictes-moy ie vous prie ce qu'il vous semble de ceste nouvelle doctrine?
- R. Le mesme qu'à vous Monsieur, mais la doctrine n'est point nouvelle, parce qu'elle est tirée d'Hippocrate, de Galien, & de tous les autres Medecins renommez, accompagnée de plusieurs experiences que personne n'auoit encores si bien obseruées; ouÿ bien l'opinion qu'ils en tirent, au moins depuis cinq cens ans en çà: Il est bien vray, que si en matieres difficiles il faut pancher du costé où les raisons sont plus fortes, ie suis presque contrainct en ceste difficulté de la peste, de suiure ceste nouvelle opinion, qui est si bien establie, tant par l'authorité & la raison, que par les experiences.
- M. Le monde donc est d'autant plus obligé à son inuenteur, que ceste opinion est veritable, & qu'il a fait voir clairement vne chose si importante.
- R. Le monde est veritablement obligé à ceux qui trauillent pour son bien, mais voicy Monsieur Facio: vous nous auez si bien satisfaitz tous ces iours passez M. que nous esperons d'estre en-

cores contans aujourd'huy.

F. Dieu vueille que vous le foyez autant de l'effect, que vous le deuez estre de la volonté que j'ay de vous seruir : mais pour instruire le Seigneur Estienne des moyens qui sont necessaires pour se garantir d'un tel ennemy, ie crois qu'il est à propos de dire auparauant, comment est-ce qu'on le peult preuoir; parce que il n'est pas moins veritable, que commun de dire, que les mesmes remedes qui seruent à chasser le mal present, seruent aussi à le destourner quand on les fait auant qu'il arriue.

R. Ceste entreprise sera aisée, parce qu'il ne fault que repeter les causes qu'on a desia dictes, qui se font cognoistre auant que la peste arriue.

F. Il est vray, mais ie ne pense pas que pour veoir quelqu'une de ces causes, on puisse tirer quelque certitude du futur effect.

R. Ie ne dis pas qu'on la puisse tirer de toutes: mais quand les causes paroissent, on en peut craindre quelque chose, & encores estre asseuré que quelques-vnes peuuent engendrer la peste, comme le boire & le manger qui est corrompu.

F. Repetons-les doncques, afin que nous voyons ce qu'on doibt plus ou moins craindre: nous auons dict qu'elles sont trois principales, l'air, le manger & boire corrompu, & les figures celestes: lors donc que quelque grande conionction malheureuse se prepare au Ciel, & qu'on voit souuent des Cometes, des Ecclipses du Soleil, & de la Lune, il est raisonnable que nous craignons ce qui a de coustume de suivre ces signes, selon l'observation des Astronomes.

- R. Laissez maintenant à part les figures du Ciel qui sont marques, & peut-estre causes, mais esloignées; & auxquelles les Astronomes se trompent quelquesfois, comme l'euenement le monstre, & venons à l'air, & aux alimens vicieux.
- F. L'air, comme nous auons desia dict, peut deuenir pestilent pour plusieurs causes; à sçauoir pour les vents meridionaux, pour les tremblemens de terre, pour les marests, & les corps priuez de sepulture, & bien quil soit difficile de predire les maladies communes par le changement des saisons, nous voyons toutesfois qu'Hippocr. qui y estoit extremément versé, a predict des maladies déterminées; mais si nous parlons des pestilentes, ie crois qu'on a besoin de plus grands signes pour les pouuoir asseurément predire. Celuy donc qui obserueroit en vne année trois, ou deux & vne saison encorés, qui fut grandement australe, avec vne pluye menuë, ou nuageuse & sombre, chaude & sans vent, & qu'il adioustast à ces saisons la situation du lieu, basse, humide, & paradanture subiecte aux vents de Midy, comme Cranon, & qu'il veit vne abondance extraordinaire de fructs sans goust, il pourroit iustement craindre la peste; mais s'il voyoit vne quantité des animaux qui naissent de la pourriture, comme souris, grenouilles, vermisseaux & semblables, lesquels on voit souuent à terre, & à l'entour des herbes, & qu'une telle constitution ne fust point corrigée de la Tramōtane, il pourroit predire vne peste tres-assurée, & particulièrement si le peuple se nourrissoit alors d'alimens pourrissables, & qui causent des opilations.

M. Il fault donc cognoistre plusieurs choses auparavant.

E. Oiiy Monsieur, si l'on veut faire vne prediction assuree : il est vray que la peste pourroit bien arriuer sans tant de signes, qui ne sont pas tous necessaires pour faire qu'on la puisse predire ; mais parce que plusieurs causes nous sont incogneuës, lesquelles estant opposées à celle de la peste, la peuuent destourner, il est difficile de la predire par la mutation des saisons, si d'autres signes ne suruiennent.

R. Il est vray, mais quand on voit que l'air chaud & humide continuë, six, sept, & huit mois, on a occasion de craindre.

F. Tres-grande, & si alors le Prince ne s'esueille, il merite d'estre blasme : mais qui en concludroit vne peste assuree sans d'autres signes, il se pourroit tromper pour les susdites raisons.

M. Je crois qu'il est bien difficile d'en predire vne certainement, suiuant ce que vous auez dict.

F. Il est vray Monsieur, parce qu'il fault que la terre s'entr'ouure, & qu'il en sorte des vapeurs venimeuses, ce qui n'arriue ordinaiemēt qu'aux grands tremblemens, comme nous auons desia montré.

M. Je crois bien que de six ou sept mille cadauers sans qu'ils soient enterrez, on en peut predire vne peste certaine.

R. Je suis de mesme opinion.

F. Et moy aussi, moyennant qu'ils fussent proches des lieux qui sōt habitez, car s'ils en estoient loing, peut-estre que les vents, & particulièrement la

la Tramontane empescheroient que les vapeurs qui s'esleuent ordinairement de la pourriture ne s'estendissent si loing.

M. Croyez-vous qu'on puisse predire le mesme des marestz & des estangs?

R. Non, à cause de la grande difference qu'il y a entre les eaux & les cadauers, d'où naissent des pourritures fort differentes. Il est bien vray que qui apprehenderoit vn grand marestz, comme par exemple vne riuere, qui arrouseroit vn grand pays, que son apprehension ne seroit point sans raison.

F. De là vient que les terroirs & les pays qui sont en lieu bas, sont presque tousiours mal sains, nonobstant les canaux & aquedus, & les habitans sont subiects aux fiebves malignes, & sur tout en Automne.

R. Celuy qui est assureé que l'eau qu'on boit, ou de laquelle on se sert deux ou trois mois pour faire du potage dans vne armée est marescageuse, & a demy pourrie, il peut assureément predire la peste: Et semblablement, si au lieu de l'eau le froment est à demy pourri, ou si au lieu du froment les autres alimens sont de mauuaise nourriture, comme il est arriué en plusieurs famines, apres lesquelles on peut presque tousiours faire ceste prediction.

M. Je croy que ces pestes que nous venons de dire, arriuent plus souuent dans les armées, que parmy les peuples, parce qu'ils sont plus subiects à manquer de nourriture pour plusieurs occasions.

R. Mais auant que parler de la guerison, dites-

moy M.F. si vous croyez que ceux qui ont la peste ayent toujours la fiebvre.

F. Il semble qu'en la peste, qu'Hipp. décrit au troisième des Epidemies, les pestiferez estoient quelque-fois sans fiebvre, ce que Galien assure, d'autant qu'ils ne sont pas tous esgalement infectez, mais les vns cruellement, & les autres mediocrement: & ceux-cy à mon avis sont quelque-fois sans fiebvre, parce qu'ils n'ont pas beaucoup d'accidens, & partant ils sont facilement surmontez par la nature: & de là il peut arriver que quelqu'un aura vn charbon & sera sans fiebvre, encores que Galien vueille que la fièvre soit toujours avec le charbon, ce qu'on peut par aventure entendre de ceux qui sont furieusement attaquez de la peste.

R. Il semble que Galien & Fernel le vueillent ainsi, disans que celuy est sans fiebvre duquel la pourriture est superficielle, la nature ayant chassé le venin à la peau.

F. Il me vient encores vn doute, à sçavoir si tous ceux qui sont infectez en vne peste, doivent necessairement avoir vne mesme maladie ou diuerse.

R. D'un costé il semble, selon la doctrine de Galien & d'Hipp. que les maladies communes sont distinguées des diuerses, que les Grecs appellent sporadiques, parce que celle-cy sont telles que le nom le porte, & celles-là en affligent plusieurs de mesme façon: d'un autre costé, nous sçavons par la peste qui est descrite par Hipp. que les maladies communes & diuerses compâtissent ensemble, comme il est clair par la diuersité des

maladies qui suruindrent durant ceste peste : & partant ie dis que c'est assez que la cause soit commune pour l'establissement d'une maladie commune, encores que selon la diuersité des subjects & des humeurs peccantes, les diuerses maladies viennent à naistre.

F. Et pour confirmer cecy, ie dis que celuy qui considerera Hipp. & Galien, il ne verra point qu'ils vueillent distinguer les maladies communes des diuerses, en façon que celles-cy ne puissent estre communes, ny que les communes soient composées d'une seule maladie, mais ie croy qu'ils veulēt distinguer les maladies communes qui ont leur cause commune d'avec les maladies qui ne suruiennent qu'à peu de personnes, lesquelles ordinairement par vne cause particuliere, offensent aujourd'huy l'un & demain l'autre : mais si en mesme temps plusieurs deuenoient malades d'une mesme, ou de diuerses maladies, il est certain que l'effect & la cause en seroient communs ; bien que ie ne nie pas que les maladies communes affligent le plus souvent avec maux de mesme nature.

R. Ie le crois aussi. Mais venant maintenant aux remedes qui guerissent & preseruent, ie ne suis point d'aduis qu'on parle des particuliers, ny du moyen de guerir les charbons ou bubons, ny qu'on dispute à sçauoir quel emplastre a plus ou moins d'efficace, mais ie crois qu'il sera à propos de parler des ramparts & deffences generales que les Princes doiuent plustost procurer que les Medecins.

F. Vous m'avez fait plaisir de m'en faire sou-

uenir, non pas tant pour ne seruir le Seigneur Estienne avec des emplastres & des vnguens, que pour ne point redire les choses que plusieurs autres ont escrites en traictant de la peste, & comme il se faut comporter quãd quelqu'un en est attaqué sans marque, & quãd le charbõ ou bubõ, ou le pourpre apparoiſſent: & il me sèble que c'est encores vne chose superfluë de dire la diligence que l'on doit apporter en ces accidens de peste, car tous les Medecins en parlent, qui ne doit pas estre moindre qu'à l'endroit de ceux qui ont aualé du Napel, parce que le venin n'arreste point, d'entrer dans les grandes venes, & d'esteindre promptement le malade: & ie ne m'estendray point non-plus à repeter la regle d'Hipp. qu'on doit soigneusement garder en ces accidents, qui est de suiure les mouuements de nature qui se font par les lieux conuenables: car si elle se descharge par le vomissement, par le flux de ventre, par les sueurs, par les bubons, charbons, ou pourpre, on ne la doibt point des-tourner, mais plustost il la faut ayder, encores que le Medecin iudicieux doiue estre bien sur ses gardes quand il est question d'ayder vn vomissement ou vn flux de ventre: & ie ne mettray non-plus en auant les remedes dont il se faut seruir pour ayder la nature en ses susdicts mouuements, parce que tous les Liures en sont remplis.

M. Dites ie vous prie, quelle regle on doit garder en ces malades qui sont si trauaillez, sans qu'on voye par quel lieu la nature se veut descharger.

F. En tels cas si ie n'auois point d'antidotes que

ie cogneusse pour en auoir fait l'experience, au-moins sur les bestes, ie me seruirois selon ma coustume, des remedes qui purgent les humeurs qui semblent dominer & affliger les corps, lesquelles en ces occasions n'attendent point la preparation des Syrops:

M. Puis que vous en estes sur ceste matiere, dites-nous quelques remedes, desquels vn chacun se puisse seruir pour se preseruer de ce mal.

F. Ie n'en vois point de meilleurs que ceux que Galien touche, non moins doctement que briefuement, lequel supposant selon la doctrine d'Hipp: que le principal de la peste consiste en la pourriture, il ne l'a pas si tost preueüe, qu'il s'employe à dessecher les corps humides pour les preseruer, & à maintenir en leur constitution ceux qui sont secs, & à oster les superfluitez & les opilations qui se treuent aux autres corps, en quoy consiste veritablement toute la force de la preservation, & presque celle de la guerison; & partant ie loüerois grandement que chascun feust bien réglé en son viure, en mangeant & buuant sobrement les choses qui engendrent le moins d'excremens, & point d'opilations, & qui sur tout ne se pourrissent point facilement; que tous obseruassent ce qu'vne infinité d'autres Medecins ont desia escrit, non seulement en ce qui regarde le manger & le boire, mais encores l'air, l'exercice & le repos, le veiller & le dormir, & les autres choses non naturelles, comme l'e-uacuation & la retenuë des excremens, & les passions de l'ame, en s'abstenant sur tout des femmes & du baing: voila ce que tout le mon-

de doit faire, & non pas comme ont fait quelques-uns durant nostre peste, lesquels en se gardant du fomes estoient en tout le reste fort desreglez; & comme ils donnoient du nez à terre, ils cherchoient solement par, ou en quelle façon la peste estoit entrée en la maison. Je conseillerois encôres que les corps humides, & qui abôdent en excrements se purgeassent legerement, avec des remedes benins, & que ceux qui ont trop de sang s'en fissent tirer, & que tous se conservassent avec les choses qui desseichent beaucoup. Je laisse à part les antidotes simples & composez desquels les Liures sont plains: l'en nommeray seulement deux fort renomméz entre les autres, encôres qu'on ne les trouue que difficilement en ce pays, dont l'un est simple, à sçauoir la Pierre Bezoard, & l'autre composé, qui est la Theriaque, lesquels ne profitent pas seulement contre la peste, mais aussi contre tous les autres venins, & qui ne pourra auoir ces antidotes, qu'il employe toutes ses forces à se desseicher, dont les moyens sont escrits par tous ceux qui discourent de la peste, entre lesquels i'en nommeray vn qui desseiche sans aucune notable chaleur, duquel plusieurs se sont seruis par mon aduis en ceste peste, & moy-mesme en ay vsé, qui a beaucoup de force, non seulement pour préserver, mais encôres pour résister à des manifestes commencemens de la peste: c'est l'Aloës simple mis en pillules ou avec du vin, ou de l'eau rose: & ie crois véritablement que les pillules de Ruffus qui sont tant renommées, doiuent leur reputation à l'Aloës qui y entre en

fort grande quantité: & on ſçait que les corps morts ne ſe preſeruent pas long tēps de la pourriture ſinon preſque auec le ſeul Aloes, ce qui ne vient que de ſa faculté deſſeichante, laquelle (comme dit Galien, duquel i'ay tiré tous ces aduertiffemens) eſt directement oppoſée à la pourriture, mere de la peſte: & à ce propos parmi les remedes preſeruatifs ie louë les cauterés aux bras & aux iambes, remede qui n'eſt pas ſans raiſon, & que tous eſtiment, & Mercurial Medecin tres-fameux particulierement, lequel aſſeure de n'auoir veu en la derniere peſte de Padouë qu'vn ſeul Preſtre parmi vne infinité d'autres qui fuſt mort auec vn cautere. Or pour venir aux remedes, leſquels pour eſtre vniuerſels contre la peſte, & non point contre les accidens peſtilens, profitent dauantage; ie diſ que celuy qui veut deſtourner ou chaffer vne maladie, il faut qu'il la cognoiſſe, & qu'il ne la cognoiſtra iamais ſ'il ne cognoiſt la cauſe qui la produict. Les cauſes de la peſte ſont celles qui ont eſté deſia par nous recitées, & que Galien recite briefuement au 4. chap. du Liure premier de la difference des fiebvres: Et partant puis que le Prince ſçait que la multitude des corps qui ſont ſans ſepulture tant des brutes que des hommes, peut infecter l'air, il les doit promptement faire enterrer pour ſe garantir de l'infection, & meſme en pays d'ennemy apres la victoire, & doit ſoigner qu'on ne trouue point aucun corps mort dans tout ſon Eſtat (& particulierement aux lieux qui ſont habitez) ſans ſepulture. On ſçait que la peſte feut produite en Toſcane par

vne Balene qui estoit morte & pourrie sur le riuage de la mer : Et Coirus faict mention d'vne peste qui feut à Milan en l'année 964. causée par la grande multitude des vers : & qui voudra fueilleter les histoires, il trouuera que plusieurs autres sont venuës de ce qu'on n'auoit point enterré les corps des animaux qui estoient morts. Le Prince sçait pareillement que la peste peut venir d'vn tremblemēt de terre, & que le dommage de ce tremblement est present, & celuy de la peste futur. Or s'il pouuoit en ce cas, afin d'éuiter l'vn, & peut-estre l'autre inconuenient, retirer son peuple loin de là, il se garantiroit de la peste, & paradventure aussi des dommages du tremblement, bien qu'vn remede si salutaire aye de l'impossible : Il sçait encores que le māger & boire qui est corrompu peut engendrer la peste, & que pour l'éuiter & se rendre agreable à Dieu & aux hōmes, il est obligé de moyenner que son peuple ne manque point de viures necessaires : & au contraire, s'il n'empesche la cherté, quand mesme il faudroit engager son Sceptre & sa Couronne, qu'il offence Dieu, se rend odieux aux hommes, & se met en vn manifeste danger de la peste, & peut-estre de la perte de son Estat : car il doit plustost engager son Domaine (s'il n'y a point d'autre remede) que de permettre que son peuple se nourrisse du grain à demy pourry. Or le Prince qui apporte vn tel soin pour le salut de son peuple est veritablemēt bien-heureux, s'acquerant par ce moyen le cœur & les affections des hommes, par la vertu desquels il regne longuement. Et les gene-

raux des armées doiuent receuoir ces instructions, parce qu'il leur arriue souuent de manger du mauuais grain, & de boire de l'eau qui est pire: Dauantage, le Prince n'ignore pas que les eaux croupissantes, & les terroirs marescageux infectent l'air, & partant il ne doit rien esparagner afin que les eaux s'escoulent par canaux & aquedus, dequoy les generaux des armées se doiuent particulièrement souuenir, quand ils se mettent opiniastremēt au siege d'vne ville, parce qu'on lit que plusieurs armées ont esté desconfites & ruinées, parce que les ennemis en se seruant de ceste seule occasion auoient rompu lesdits canaux & aquedus. Si doncques la peste entre dans le pays pour l'vne des susdites occasions, le Prince ne merite point d'estre excusé, parce qu'il a veu lors qu'elle venoit, & a eu le pouuoir de la destourner: mais si elle y entre à cause du continuel soufflement des vents de Midy, accompagné des autres signes qui ont esté desia remarquez, alors il merite qu'on l'excuse, s'il a recours aux Medecins.

M. Si la peste vient le plus souuent d'vne telle cause, on profiteroit beaucoup en donnant le moyen de la destourner.

F. Je croy qu'il est impossible, si le Prince ne faisoit ceste resolution que de sortir luy avec tout son peuple hors du lieu où ces vents regnent avec tant de violence, ce qu'il ne sçauroit faire le plus souuent: C'est pourquoy il se doit informer en tout temps des Medecins, pour sçauoir en quel estat sont les choses qui regardent la santé, & qu'est ce qu'on peut craindre & attendre

à l'aduenir: Et cognoissant qu'à cause de la malice des saisons on peut craindre la peste, & mesme la voyant comme fondre sur son estat, il doit promptement faire sortir de la Ville tous les pauvres, & ceux qui sont en necessité, & les loger spacieusement par la campagne, & dans les villages, qui est vn remede dont les Venitiens se sont seruis fort heureusement, & doit prouoier à ce qu'ils soyent nourris d'alimens & breuuages conuenables: & ensemble eslire des Medecins hommes d'honneur, avec authorité de commander que les pauvres ayent à se tenir nettement dans leurs maisons; & qu'ils soient reglez quant a ce qui regarde le manger, & les moyens de se conseruer: Et en fin toute la diligence qu'un Prince scauroit apporter en faueur des pauvres, quand mesmes elle seroit extraordinaire, ne peut estre inutile, puis qu'ils sont à la veille de la peste, & partant qu'il employe toute sa puissance, pour faire qu'il ne reste aucune occasion de pourriture, que le pays soit sans estang ou mareltz, soit petit ou grand, que la Ville soit nettoyée de toute sorte d'immondices avec vne extreme diligence; que tous les canaux par ou la Ville se nettoye ayent le passage libre, que non seulement les corps mors, mais encores tous les excremens, fumiers herbages qui se pourrissent ou dans la Ville ou dans les iardins, soyent cachez dans la terre; & partant qu'il face creuser quelques grandes fosses vn peu à l'escart pour les y enterrer; qu'il commande que tous les porceaux & autres animaux fort excrementeux & qui font du fumier, soyent en des lieux

esloignez de la Ville; que les habitans, s'il est possible, quittent les endroitz où les vents marins regnent dauantage, pour se retirer aux quartiers qui sont plus exposez à la Tramontane; que chacun s'eslargisse dans sa famille le plus qu'il pourra, & dās sa maison: Et puis que les mesmes remedes qui aydent contre le mal qui est desia fait, seruent aussi pour le destourner, ou pour le moins à faire qu'il ne soit si furieux: Si l'on voit que la peste nous menace à cause de tant de pluyes & humiditez vaporeuses qui mouillent, & ensemble pourrissent tout, Que l'on s'estudie suiuant l'auis de Galien, que nous auons desia dit, à se desseicher, ce qu'on ne peut faire plus conuenablement qu'avec le feu, duquel Hipp. s'est serui fort heureusement, comme Galien le recite: Et partant que le Prince commande qu'on alume des feux les plus odoriferans qu'on pourra, comme avec Cipres, Genevre, Laurier, Meurthe, Romarin, Sabine, Galange, Stoëcade, Sonchet, Encens, Myrre, bois d'Aloës, Styrax, Benjoin, Gerofles, Canelle, Squenanthe, Spicanard, Terebinte & semblables, desquels sont remplis tous les liures qui parlent de la peste: Encores que durant les chaleurs d'Esté, les odeurs d'eau rose, d'eau de fleurs d'orange, de vinaigre rosat, d'eau de nymphee, les odeurs des Sandaux, de Camphre, de Limons, des escorces de Cedre, & de choses semblables qui desseichent sans chaleur soient plus recommandables. Le Prince doit semblablement constituer des Medecins Physiciens, & des Chirurgiens pour la guerison des malades, avec telle recom-

penſe qu'il puiſſe rencontrer des hommes de quelque mérite en telle neceſſité, comme il en treuuera toujours moyennant qu'il fauoriſe la vertu; mais que ſur tout il adiouſte à tous les appareils les armes qui ont accouſtumé de nous rendre fauorable la Diuine miſericorde.

M. Croyez-vous que ces rampars profitafſent beaucoup?

F. Je n'en doute point, non pas qu'ils deſtournafſent la peſte, mais qu'il eſt impoſſible qu'aucun Prince puiſſe, par vne diligence meſmes extraordinaire, faire enleuer toutes les choſes pourriſſables tellement que la pourriture ne s'en enſuiue, n'y empêcher que les corps, & particulièrement ceux des pauvres n'abondent en opilations & humeurs ſuperflus; mais ils diminueroient la mortalité tellement qu'ils euſſent garantiſſe mille perſonnes parmy 40 mille qui ſont mortes.

M. Voilà vn grand ſecours, pour lequel le Prince ne deuroit pas meſme eſpargner la Couronne: Mais il faudroit ſçauoir maintenant ce qui eſt neceſſaire quand la peſte eſt deſia alumée.

F. Tout ce que nous auons dit, en y adiouſtant les feux publics qu'on doit alumer par tout, & particulièrement là où la pourriture eſt plus grande, & par conſequent la peſte eſt plus cruelle. Quant aux hôſpitaux i'ay eſté long temps en doute pour ſçauoir ſ'ils ſont profitables ou non; car d'vn coſté, il ſemble qu'ils le ſont, parce que tous les malades eſtant enfermez en vn lieu peut eſtre qu'on peut euitter la contagion, qui eſt la fin pour laquelle ils ont eſté inſtituez,

quoy qu'on ne l'aye iamais attainte en aucune peste, dont nous-nous puissions souuenir: Car si bien tous les infectes & les suspects avec leurs habitz y ont esté enfermez dès le commencement, toutesfois la peste s'est tousiours acreeüe tant dehors que dedans; ce qui montre assez la vanité de ceux qui pensent que la peste vient, & se conserue par la contagion; outre qu'il est necessaire que tous ces malades estans reduitz en vn mesme lieu, l'air y deuiene plus pestilent, d'où vient qu'il y en meurt si grand nombre, non moins pour ceste cause, que pour plusieurs autres. Le Prince donc qui a soin de son peuple doit defendre ces maisons de la santé; car si les habitans sont au large dans la ville, & dans les villages ils sentiront l'air qui ne sera pas si pestilent: là où s'ils sont en vn mesme lieu, la pourriture croist qui empoisonne l'air dauantage, dont les malades meurent, & les sains en sont attains.

M. On oppose à ce conseil l'incommodité de nourrir les pauvres, & de seruir les malades.

F. En cecy le Prince peut faire reluire sa vertu, & s'obliger eternellement son peuple, assistant les personnes miserables, non seulement d'un logement spacieux hors de la ville, & de litz, mais encores de viures & d'argent, procurant sur tout qu'il ne manquent point des choses necessaires en resignant le soin de tout cecy à quelques Gentilshommes qui soyent riches, & qui craignent Dieu. Et qu'il ne croye pas de deuenir iamais pauvre pour vne si charitable munificence ou que ses forces en diminuent, mais qu'il s'assure qu'elles croistront, & qu'il en sera plus

agreable à Dieu. Or pour seruir les malades en toutes les choses necessaires, que personne ne doute que les Peres & Meres; enfans, freres, sœurs & seruiteurs les assisteront mieux dans leurs propres maisons que dans les Hospitiaux.

M. Il est vray, parce que l'amour & l'interest aiguillonne ceux-cy à bien seruir, ce que parauenture on ne voit point dans les Hospitiaux, ou ny l'un ny l'autre n'oblige personne à bien seruir les malades. Mais d'un autre costé on n'a point de Medecins aux maisons, & on en treuve dans les Hospitiaux, parce qu'on les paye. D'auantage, ceux qui seruent dans les maisons encourent le danger de la peste; & parauenture les malades n'en mourroient point, si on les enuoyoit aux Hospitiaux.

F. Monsieur on ne manque point de Medecins dans les maisons, moyennant que le Prince y vueille trauailler; parce que s'il est homme de discretion, voyant que ce mal est contagieux, & que les Medecins pour entrer en tant de chambres, ou l'air est necessairement plus malicieux à cause des malades, s'exposent au danger; proposera vne telle recompense qu'on ne manquera point d'hommes de merite: & tout ainsi qu'on ne trouue pas facilement de bons Medecins & des Chirurgiés pour les Hospitiaux, & que ceux qu'on trouue sont ordinairement hommes qui sont pauures, non moins de doctrine que d'argent, de mesme trouueroit-on facilement des habiles hommes pour voir les malades dans les maisons priuées, lesquels en cognoissant le danger beaucoup moindre, & alchez de la recom-

penſe & de la faueur du Prince, le feroient de bon cœur: Et afin de répondre à tout, ſ'il y a du hazard pour les parens des infectez, pourquoy eſt-ce qu'il n'y en a dauantage pour ceux qui ſeruent à l'Hospital? outre que ce mal, comme nous auons monſtré, n'eſt pas ſi contagieux que les parens en ſoient neceſſairemēt infectez, pour toucher aux malades; parce que i'en ay veu pluſieurs en ceſte peſte qui viuent encores, leſquels ont ſeruy & touché leurs pere, mere, freres, ſœurs, femme, enfans, & marys infectez, & qui ont dormy dans les meſmes chambres, & quelques-vns dans vn meſme liēt, ſans en eſtre atteints, & vne infinité d'autres qui ſont morts ſans auoir ſeulement touché vne aiguillette: & afin qu'on ſe garantiffe mieux, on peut deputer dans vne maiſon où il y a vne famille quelqu'vn pour toucher au malade, & les autres pour ſeruir aux autres neceſſitez.

M. Je croy comme vous dites qu'il en mourroit beaucoup moins.

F. Qui cognoit la nature de la peſte ne peut dire autrement, car il en meurt dauantage où il y a plus de ſemences & de vapeurs peſtilentes, qui ſe trouuent où il y a plus de pourriture, laquelle eſt plus grande aux lieux où ſe rencontrent plus de pauures, & particulièrement eſtans malades: De ſorte que laiſſant à part les Hôſpitaux, avec l'ordre qu'on a dict, il n'en mourroit pas la moitié de ceux qui meurent avec l'ordre qu'on a gardé en ceſte peſte.

M. Voila qui va bien, mais il faudroit vn grand nombre de Medecins, parce que durant que le

Chirurgien, pour exemple, est auprès d'un malade, il n'est pas raisonnable qu'il sorte pour conuerser avec les sains iusques a ce qu'il aye fait la quaranteine suiuant la coustume.

F. Ie ne sçay à quoy seruent ces quaranteines, dont on vse en toutes les pestes d'Italie.

M. Tous les Princes s'en seruent, & tous les Medecins les approuuent, car il semble qu'elle soit l'unique remede: Ioinct qu'il n'est pas raisonnable qu'un qui a touché vn pestiferé, ou des bubons ou charbons, & que chascun estime estre infecté, aille conuersant avec ceux qui sont escartez des pestiferez.

F. Si nous auons desia monstré par des experiances plus claires que le Soleil que les pestiferez mesmes n'infectent que difficilement, à quel propos craindra-on ceux qui ne le sont point? & ie ne vois point que ces quaranteines, ces clochetes, croire l'un infecté, & l'autre non, seruent de rien qu'à espouuanter le monde, tellement que si quelqu'un auoit touché par malheur la robe d'un Corbeau, il en reçoie vne telle frayeur qu'il en meure; & à causer vne mortalité d'autant plus grande que ces quaranteines se font avec rigueur; ce qui n'est pas sans raison: car les habitans estant enfermez (& sur tout les pauures qui sont en grand nombre) dans leurs maisonnettes ou l'air est necessairement plus pestilent, comme nous auons desia prouué, facilement ils tumbent malades & meurent: Ces quaranteines sont doncques inutiles, puis qu'elles ne profitent iamais, & sont faittes sans raison: & qu'il soit vray, il est mort vn nombre infi-

ny de personnes en la peste de Venise, de Milan, & en toutes autres, pendât qu'on les faisoit tres-estroitement: que s'il a semblé quelque-fois que la quarantaine ayt esté profitable, ils ne voyoient pas que la peste alloit en declinant, ce qu'ils iugeoient prouvenir de la quarantaine: que si on l'eust faicte quand elle commençoit, on eust descouuert la vanité d'un tel remede: dictes-moy donc, Monsieur, pourquoy est-ce que le Prince l'ordonne ?

M. Afin de deliurer son Estat de la peste.

F. Je sçay que cecy est la dernière & principale fin; mais ie voudrois sçauoir en quelle façon la quarantaine le conduit à ceste fin.

M. En ostant la conuersation, & par consequent la contagion: car la contagion estant esteinte, chacun croit que la peste le soit aussi.

F. Ne voyez-vous pas leur erreur, Monsieur, apres auoir cogneu que c'est que la peste, & l'air pestilent, & quelles en sont les causes, entre lesquelles c'est vne folie de mettre la pure contagion? or la peste venant le plus souuent de la malice de l'air, qui est tousiours plus grande parmy la multitude, & dans les puantes & miserables maisons des pauvres; vous voyez, dis-ie, maintenant que la quarantaine estant vn remede qui nuit d'auantage qu'il ne profite, elle doibt estre mesprisée du Prince. La crainte aussi qu'on a d'un qui se porte bien, encores qu'il eust manié mille bubons, & charbons, est sans apparence, puis que nous voyons par vne infinité d'experiences que les pestiferez mesmes, & leurs habits, n'infectent que rarement.

M. Je crois neantmoins que vous aurez bien de la peine à persuader cecy aux Italiens ; car s'ils auoient seulement touché vn Corbeau, i'oseray dire qu'ils s'estimeroient desia morts.

F. Il est vray, parce que l'opinion contraire est des long temps grauée dans leur esprit, d'où ceste crainte leur vient, & non pas du danger : car tout ainsi que si vn Prince ordonnoit que quelqu'un feust pendu, & neantmoins qu'il deffendist secrettemēt qu'on ne luy fist aucun mal ; la crainte de celuy qu'on meneroit au gibbet ne laisseroit pas d'estre fort grande, & de nuire beaucoup à sa vie ; de mesme si quelqu'un auoit touché le manteau d'un Corbeau, il croiroit d'estre mort, quoy que vainement, encores qu'il eust experimenté que ceux qui touchent aux infectez n'en sont pas seulement malades, tant s'en faut qu'ils en meurent. Je sçay qu'il y a quelques foibles raisons contre ceste opinion, comme de dire, qu'il ne repugne point que quelqu'un en portât dans ses habits ces semences pestilentes, ne soit pas disposé pour en receuoir du dommage, & qu'en touchant à vn autre, il l'infecte, & d'autres semblables qui s'en vont par terre, si l'on prend garde à la nature, & à la cause de la peste, & si l'on met en auant les experiences susdites qui battent au contraire, & sur lesquelles finalement nostre profession est fondée : & suis bien asseuré si le grand Turc, ou le Roy de France estoient Seigneurs de l'Italie, qu'en introduisant leurs Coustumes, on n'auoit autre crainte pour la peste, que celle qu'on a ordinairement pour les fièvres malignes, & autres maladies cōragieuses :

Mais reuenant à nostre discours, ie dis qu'il n'est pas raisonnable d'empescher que les Medecins, les Chirurgiens, & tous ceux qui n'ont point de mal dans les maisons des malades, ne sortent, & aillent où ils voudront, moyenant que plusieurs personnes ne s'y assemblent.

M. C'a esté doncques vne grande cruauté que de les pendre?

F. Pardonnez-moy, puis qu'ils ont violé les loix du Prince.

M. Il est vray, mais la Loy est donc bien injuste?

F. Elle ne l'est point, si on suppose le fondement de l'opinion commune, bien que de sa nature elle soit tres-iniue, puis qu'elle condamne à mourir ceux qui ne font point de mal.

M. Croyez-vous que si les pestiferez mesmes entouroient les personnes saines, qu'ils meritaissent la mort?

F. Ils ne la meriteroient pour autre chose, que d'autant qu'ils pourroient communiquer leur mal à quelqu'un qui conuerseroit avec plusieurs personnes, comme pourroit faire encores celuy qui auroit quelque autre maladie contagieuse.

M. Commēt à quelqu'un? on les pend, parce qu'on croit qu'ils nourrissent la peste pendant qu'elle est allumée, qu'ils la font croistre quand elle commence, & qu'ils la renouellent quand elle est esteinte.

F. S'ils les pendent pour cela, ils ont tort; car tout ainsi qu'il est impossible, qu'une personne (quoy que pestiferée) puisse renoueller la peste, quand elle est esteinte, de mesme il n'est pas possible qu'on la fasse croistre quand elle commence, ny

qu'on la nourrisse quand elle est alumée : & en fin c'est vne incroyable vanité de penser que la contagion soit si grande chose, comme nous auons monstré par des viues raisons, & sensibles experiences.

M. Vous voudriez donc qu'on traficast indifferement ?

F. Il n'est pas defendu à ceux qui craignent, quoy qu'en vain, de se garder de tout le monde : mais par ordonnance du Prince, ie permettrois le trafic à tous, sinon aux malades ; estant assurez que la liberté de ceste conuersation est tres-profitable, & qu'elle ne nuit aucunement ; & qu'au contraire, c'est augmenter la mortalité, que d'enfermer les personnes dans leurs maisons, comme nous auons desia proué.

M. Que voudriez-vous que le Prince ordonnast touchant les meubles qui sont dans les maisons infectées ?

F. Non pas la diligence dont on vse en Italie, & moins celle dont nous-nous sommes seruis à Genes, par-ce qu'elle ressemble à vn pillage, & les peuples qui sont opprimés de la peste, meritēt plustost d'estre assiste, que saccagez : car ie me souuiens de certaines personnes d'honorable extraction, auxquelles on osta ce peu de lambeaux qui leur restoient seulement après l'affliction de la peste : & partant ie serois d'auis que le Prince laissast ces meubles à ceux qui en sōt les maistres ; le soin desquels est plustost surabondant que necessaire, s'ils en nettoient, ou font essorer d'autres, comme on dict communément, que ceux dans lesquels estoient enuolopez ceux qui sont morts,

ou qui estoient malades de la peste : Quant aux draps, materas, conuertures, & choses semblables qui peuvent conseruer les semences de la peste, & particulièrement quant aux pellices, qu'on les estende durant vn mois à la Tramôtane, ne blasmant point ceux qui pour leur plus grande satisfaction voudront mettre à la lesciue les choses qu'on peut lauer sans les gaster : & que le Prince ne craigne point que ces meubles puissent conseruer, ou renoueler la peste, mais qu'il prenne garde soigneusement aux aduertissemens dont nous l'auons fait souuenir, qui seuls le peuvent ayder, par-ce qu'ils regardent la racine de ce mal : & sur tout, qu'il bouche ses oreilles à ceste commune chanson des Italiens, qui est, qu'on peut porter la peste en son pays par le moyen des meubles : par-ce que les pestes de delà les Monts ne sont pas plus priuilegiées que celles d'Italie : que si elles s'esteignent entierement sans aucun soin, à plus forte raison celles-cy s'esteindront avec tant de rampars, dont nous auons desia parlé, lesquels s'opposent à la vraye cause d'un si grād mal, duquel Dieu nous vueille preseruer.

M. Puis qu'on ne parle point d'auantage, il semble que nous sommes à la fin de ce discours : Or ie ne puis faillir, si ie dis que i'ay ony des choses durant ces sept iournées, lesquelles non moins pour leur importance que pour leur nouueauté, & peut-estre pour la verité, meritent en faueur de la Republique humaine d'estre cōmuniquées à tous.

R. On met sur la presse tant de choses qui ne profitent que bien peu, ou du tout rien, qu'on feroit vn grand tort au monde, de n'y mettre point celles qui sont si importantes, & si vtilés.

M. Il est vray, mais le tout consiste à s'en ressouuenir.

F. Messieurs, en parlant vous auez tousiours les yeux sur moy, & i'entends ce qu'ils desirent, c'est pourquoy ie m'oblige de faire vn recueil de toutes les choses pour le moins qui sont plus essentielles, dont nous auons discouru ensemble par l'espace de sept iours, & de leur faire voir le iour, & pour voir si ie m'en souuiens, ie dis qu'en la premiere iournée, apres l'entrée de nostre discours nous prouuasmes que la peste est vn mal plus grand que la guerre ny la famine: en la seconde on proposa la difficulté qui fut non seulement pour sçauoir si nostre peste venoit du fomes ou de l'air pestilent, mais encores si la commune opinion est veritable, qui porte que la peste se peut allumer en quelque lieu par les habits d'vn pestiferé: on monstra la foiblesse qui accompagne quelquefois les opinions cōmunes, & qu'entre les autres celle de nostre peste n'est fondée sur aucune preuue: & ie me souuiens que M. Ratto preuua ce iour là auec de bien forts arguments que la peste se pouuoit introduire dans les provinces par le seul fomes, & que la nostre n'estoit point venuë de l'air pestilent: En la troisieme, on parla des causes qui nous meuent à sçauoir les choses nouvelles, & puis on commença à rechercher la nature de la peste par ses effets: on parla

de la contagion, de ses especes, des semences pestilentes, de la varieté des analogies, & si c'est vne chose essentielle à la peste que d'estre cōtagieuse: on discourut apres des maladies populaires, & on les diuisa, & sous-diuisa. En la quatriesme, ie crois qu'on discourut, à sçauoir, si l'on deuoit manger plus sobrement au matin qu'au soir, & des causes tres-communes de toutes les maladies, des liures legitimes d'Hippocrate, & l'on prouua que toutes les maladies communes doiuent auoir leur cause commune, & qu'on en toucha quelques-vnes, mais on dict que l'air en estoit la cause le plus souuent. Il me semble qu'on discourut encores des mutations ordinaires de l'air, des saisons de l'année, de la nature des biens, & des maux qui en prouiennent, de l'année qui est salubre ou non, des vents, des mutations extraordinaires de l'air, des constitutions qu'Hipp. en a escrites; & qu'on vint à conclurre qu'il est necessaire que toute maladie commune aye sa cause commune. En la cinquieme, on considera la qualité de ces Medecins anciens qui ont voulu que la peste aye tousiours sa cause commune, & non point particuliere, & sur tout celle de ceste pure contagion: on rechercha s'il y auoit eu des Medecins experts en la matiere de la peste: on monta par apres aux authorities des Historiens, pour voir si par leur tesmoignage on pourroit former quelque coniecture que la peste eust esté produite quelquefois de la contagion par l'entremise de ce fomes: & de là nous vinsmes à voir quelles estoient ces causes communes, desquelles la peste procede seulement:

mais on discourut auparauant des influances ce-
 lestes, & apres des autres deux causes, à sçauoir
 l'air, & les alimens vicieux, & puis de l'air pesti-
 lent, qui est presque tousiours chaud & humide,
 & de ces differences: nous racontasmes la peste
 d'Hipp. & disputasmes si l'air estoit corrompu en
 la peste, & on expliqua que c'est que l'air pestilēt
 comme tel: on discourut de l'air qui est pestilent
 pour les tremblemens de terre, pour les cadauers
 sans sepulture, & pour les eauës marecageuses,
 (ensemble de la peste d'Athenes) & en fin on parla
 de l'air, qui est pestilent à cause des vêts du Midy,
 & pourquoy ceux-cy sont pestilens, & partant on
 vint à parler en suite de la pourriture, des fieures
 pourries, si la bouë des apostemes est vn sang par-
 faictement pourry, des degrez de la pourriture,
 de la generation & corruptiō, de la voye à la peste,
 & l'on monstra que l'air est plus pestilent où il y
 a plus de pourriture: & apres qu'on eust parlé de
 la peste qui vient de l'air, on parla de celle qui viēt
 des alimens corrompus, & l'on conclud que la
 peste a tousiours sa cause commune, & qu'elle ne
 peut estre produite par vn fomes pestilent: on
 monstra par apres que nostre peste venoit de l'air,
 on disputa pourquoy est-ce que les Corbeaux
 estoient morts en tēps humide, & nō point en tēps
 sec, on considera encores si la peste est vne mala-
 die contagieuse, & en quelle façon, si les semen-
 ces pestilentes multiplient, si la propagation qui
 se fait en la gale & en la peste, est semblable ou
 non, où l'on preuua que la gale est plus cōtagieuse
 que les accidens de la peste; & finalement on feit

veoir avec des argumens qui sont pris presque tous de l'experience, que le fomes ne peut estre la cause de la peste. En la sixiesme on respondist par ordre aux fortes raisons de M. Ratto, & premierement à celle de la bonté de l'air de Genes, & puis à ceux qui veulent que les animaux sans raison meurent les premiers aux pestes qui viennent de l'air. On vint apres à respondre à ceste fameuse question de la mort des pauvres & des riches; & on rechercha pourquoy il arriue que les pauvres meurent plustost que les riches en temps de peste, contre Fracastor, & que presque tous, tât les riches que les pauvres ont ressenteny la peste de Genes: on respondit à la raison de la contagion, & aux exemples allegués au contraire, & à l'opinion des Princes: on satisfit par apres à la raison qui est tirée du mal de Naples, & on reuoqua en doute la commune opinion de ce mal: on monstra que la raison des hospitaux & Monasteres estoit sans force, & celle aussi du mal galantin, & pourquoy la peste afflige dauantage vn lieu qu'vn autre. Auourd'huy nous auons recherché si l'on peut preuoir la peste auant qu'elle arriue, si la fieure accompagne tousiours les pestiferés; & si tous les pestiferés ont vne mesme maladie, & puis nous sommes venus à quelques aduertissemēs particuliers qui nous garentissent de la peste, & aux remedes qu'vn Prince doit pratiquer pour en deffendre son estat; & ce qu'il peut faire à l'encontre de celle qui vient des vents du Midy, si les Hospitaux sont necessaires, cōme on doit pouruoir aux malades, si les quarantaines profitent ou

non ; si ceux qu'on a pendu pour estre sortis des maisons des pestiferés l'auoient merité ; & qu'est-ce qu'il faut faire touchant les meubles de ceux qui sont infectés.

M. Vous auez la memoire fort heureuse, mais armez vous bien contre les mesdisans qui sont en grand nombre, car ayât eu quelque vent de vostre nouvelle opinion, ils en rient desja, & croient qu'elle est plustost fondée sur des raisons apparentes que veritables, & partant ils disent ouuertement que vous-vous trompez.

F. Ceux qui demeurent quelque temps estonnez aux choses grandes, comme en la peste, sont excusables, mais non pas ceux qui ne s'en veulent point demesler ; i'ay esté des premiers, mais ie suis resolu de n'estre point des derniers : car ie crois qu'il est honorable, apres vne longue ambiguité, & qu'on a pesé les raisons, de pancher du costé où elles pesent dauantage, & où il semble que la verité se monstre ; or ceux qui se voudront opposer à ces discours, apres les auoir soigneusement examinez, meriteront le mesme honneur que ceux qui sont amoureux de la verité, & qui sont vtils au monde : mais ceux qui les blasmeront en ne daignant pas seulement de les regarder, ils trauailleront à monstrier leur ignorance & presomption, parce qu'ils seront tesmoins solempnels de leur bassesse & de leur arrogance, en parlant par les coings des rues contre ceste doctrine, sans vouloir prendre la plume à la main : car ou ils seront Medecius, ou non, s'ils ne le sont point, ils auront tort de

iuger d'une chose qu'ils n'entendent pas, & s'ils le sont, quelle sera leur lascheté de ne vouloir escrire des choses si importantes, & qui ont vne si estroitte alliance avec leur profession? car si l'on vouloit qu'ils escriussent de l'art militaire, de l'Agriculture, ou des Mathematiques, ils se pourroient excuser, en disant que ces choses sont trop esloignées de la Medecine; dauantage, s'ils sont Medecins, ou ils entendent les choses ou non, s'ils ne les entendent point, qu'ils s'en aillent à la bonne heure practiquer quelqu'autre profession, & qu'ils desisttent desormais avec leur faulse & vaine monstre de science, de tuer les pauures malades qui s'abandonnent à eux; que s'ils les entendent, ils ne se doiuent point ennuyer s'ils en traictent, car ils en seront grandement estimez, & en receuront vne ample recompense des habiles hommes.

M. Je ne pense pas qu'on puisse repliquer quelque chose à cecy, dequoy ie suis resolu de combattre ceux qui d'un plat & bas langage abayeront contre vostre opinion en ma presence, laquelle m'a donné vne extreme consolation en l'escoutant, demeurant fort vostre obligé, & de Monsieur Ratto: & afin que ie ne vous sois pas dauantage importun, allez-vous-en, ou demeurez, selon qu'il vous plaira.

R. C'est nous, qui auons ressenty ceste consolation, en iouÿssant de la douce conuersation d'un si braue & genereux Gentil-homme, & afin que nous n'en abusions pas, nous vous baisons tres-humblement les mains.

F. Monsieur Ratto ayant fait les complimens pour nous deux, il ne me reste autre chose qu'à vous souhaiter toute sorte de bon-heur & de contentement, & à vous prier que vous me conseruiez autant en vos bonnes graces, que ie desire de les meriter.

Fin de la septiesme & derniere Journée.

Acheué d'imprimer le 24. Avril 1620.

Extrait du Priuilege du Roy.

PAR grace speciale de sa Majesté, il est permis à M. Barthelemy Baralis, Docteur en Medecine en la Faculté de Paris, de faire imprimer, vendre & distribuer vn Liure intitulé *Paradoxes de la Peste*, pendant neuf ans, à commencer du iour que ladite impression aura esté paracheuée : faisant deffen-ces à tous Imprimeurs & Libraires, & autres, de quelque qualité qu'ils soient, d'entreprendre ladite impression, & vente, sans le congé & permission dudit Baralis, à peine de mil liures d'amende, confiscation desdits Liures, ainsi que plus à plein est contenu aux lettres dudit Priuilege, Donné à Paris le 22. iour d'Auril 1620. Signé par le Roy en son Conseil, Rousseau, & scellé du grand seel en cire jaulne.

Faultes suruenüs à l'impression.

Pag. 29. lig. 9. & partant, lis car. Pag. 45. lig. 27. lis & partant ce n'est pas de merueille. Pag. 60. lig. 25. d'herbes, lis d'Erz. Pag. 62. lig. 10. d'avec, lis avec. Pag. 65. lig. derniere, charge, lis change. Pag. 80. lig. 30. & 31. peruertisse, lis peruertit. Pag. 82. lig. 29. secheresse, lis seiche. Pag. 98. lig. 5. ceux, lis ceux-cy. Pag. 111. lig. 22. les, lis leurs. Pag. 116. lig. 24. salée, lis sale. Pag. 118. lig. 8. commune, lis comme En la mesme pag. lig. 9. comme, lis commune. Pag. 155. ligne premiere, nostre, lis vostre. Pag. 169. lig. 32. ie puis, ie ne puis. Pag. 213. lig. 3. ou l'air, lis & où l'air.